

# WANTOK

NIUSPEPA BILONG OL PAPUA NIUGINI STRET

Ernst & Young audited/  
circulation 15,177

44 pes

Namba 989

Wik i stat long Fonde, Jun 17, 1993.

40 toea

Amnesti Intanesenel laikim wok sekap kamap nau ...

## INDAI BILONG MAN BOGENVIL

### Wingti stat sekap long dipatmen bilong em yet

VERONICA HATUTASI i raitim

AMNESTI INTANESENEL i gat bikpela wari long ol ripot we i tok PNG sekyuriti fos na BRA i bin bagarapim laip na sindaun bilong planti pipel long taim bilong ol hevi long Bogenvil.

Long dispela taim i gat ripot long tripela man Bogenvil we planti man i ting ol i dai pinis. Tripela man ya em Ken Savia, man husat i bin Helt minista bilong Not Solomons provinsal gavman bipo na wanpela minista long interim gavman em Francis Ona na Joe Kabui i go pas long en, Gabriel Tameung na Mista Toromura.

Amnesti Intanesenel i askim nau PNG gavman long tokaut stret long wanem samting i bin kamap long dispela tripela man.

Taim ol sekyuriti fos i tekova long Arawa taun long mun Februari, ol i bin stap insait long grup em ol ami i kisim na kalabusim long Arawa Wait Haus.

Bihain ol i kisim ol i go long Wakunai kea senta. Tasol Savia i no bin stap namel long grup i go long hap.

Planti stori i kamap olsem Savia i dai long han bilong ol sekyuriti fos.

Long ABC Foren Korespondens progrem, ripota Sean Dorney husat i bin kam bek long Bogenvil i kisim sampela toktok long ol lain bilong Savia. Na ol i bilip olsem em i dai pinis.

Amnesti Intanesenel i kisim tu ol ripot olsem Savia i bin dai long 14 Februari.

Nau Amnesti i laikim PNG gavman long sekap long dai bilong Mista Savia. Na tokaut long pablik long wanem samting tru i bin kamap long em.

Bihainim dispela, *Wantok* i sekim opis bilong Praim Minista na Difens hetkwata long Mosbi bilong kisim tru as toktok long dispela samting.

Opis bilong Praim Minista i tok em i tru olsem ol i harim stori bilong Savia i dai pinis taim em stap aninit long lukaut bilong ol sekyuriti fos. Tasol ol i no kisim yet opisal tok save i kam long het opis bilong Difens.

Opis bilong Praim Minista i tok gavman bai sekap long dispela samting na planti arapela stori long pasin bilong bagarapim laip na sindaun bilong ol Bogenvil pipel long han bilong ol sekyuriti fos na

HARLYNE JOKU i raitim


LONG pinisim ol pasin bilong paulim mani insait long kantri, Praim Minista Paias Wingti nau i statim pinis ol wok painimaut long dipatmen bilong em yet.

Dispela wok painimaut bai stat long ol lain bilong klinim opis i go antap long ol pablik sevan na bos bilong ol.

Planti krismas i go pinis, ripot bilong Odita Jenerel i save tok planti pablik sevan i save ranawe long kot. Long wanem i no gat gutpela rekot i stap bilong soim wanem rot tru wan wan dipatmen i bihainim na yusim pablik mani.

Mista Wingti i tok ol bikman tasol i save kisim hevi bilong ol wokman bilong ol. Olsem na nau gavman bai stat long daunbilo i go antap. Long i go moa long pes 2

BRA. Dispela bai kamap taim sindaun long ailan i orait. Olsem bai ol wokman inap raun na mekim wok bilong ol long sekap long ol dispela stori. Mipela i bin kisim wankain toktok long opis bilong i go moa long pes 4



*Ol Fiji kam...Inap long Joshua Kouoru bilong PNG (ralthan) i stapim Noa Nadruku bilong Fiji olsem em i bin mekim long Martin Offiah bilong Ingran o nogat? Sapos em inap, PNG Presidens X111 bai win. Nogat, Fiji bai winim pilai na go bek. Lukim stori insait long Ragbi Lig Nius.*

TIM bilong Fiji husat bai kam pilai wantaim Papua Niugini Presiden X111 bai kamap long Mosbi long Fraide moning.

Dispela tim i gat 25 pilaia na 4-pela tim opisal. Ol bai kamap long Fraide na pilai

## Bula Bati ... Vinaka

long Sarere na go bek long Sande.

Ol lain pilaia husat bai kam long Mosbi em Tony Benaca, Niko Baleiverata, Vilikesa Driu, Noa Nadruku,

Aseri Bose, Manoa Thompson, Levai Nalagilagi, Noa Naya-cakalou, Mitieli Vasu, Vula Dakuitoga, Save Tuilakeba, Ropate Senikuraciri, Filipe

Taga, Eneri Rakatia, Pio Kumbuwai, Manasa Duanakamkana, Aliferiti Dere, Kaiava Kaila, Mesake Seavula, Ulaiasi Revonu, Tomu Koroi, James

Pickering, Dranivesi Baleiwai na Ian Siagatu.

Ol tim opisal em Pauliasi Tabulutu (kosa), Moape Kaoumaria (menesa), Hari Karan (namba tu menesa) na Mike Dennis (teknikel dairekta).

### STRONGPELA TRU NA INOPILAI NABAUT TRAK

**DELTA**  
DABOL KEBIN BILONG DABOLIM  
PLANTI MOA MANMERI INSAIT

## Ela Motors

OLGETAHAP LONG PAPUA NIUGINI



EM4489

# Ol Morobe eks sevisman les pinis long wetim mani

CLEMENT MIRIA i raitim

PRESIDEN bilong ol eks sevisman long Lae, Gedi Gesa i askim nau ministri na dipatmen bilong Difens long baim hariap ol olupela soldia bilong Morobe provins.

Mista Gesa i tok planti bilong ol dispela soldia

gavman i bin ritrensing ol namel long 1982 na 1990. Em i tok ol i wet longpela taim nau. Na i no kism yet mani bilong ol.

Gesa i tok long Ogas 24, 1992 olupela sekeri teri bilong dipatmen

bilong Difens, Peter Peipul i bin raitim wanpela leta i go long ol.

Long dispela leta em i tok olsem dipatmen bilong Difens bai baim ol. Tasol i kam inap long nau, ol i no kism yet dispela mani.

"Ol lain ya i laik save wanem taim tru bai dipatmen bilong Difens

i givim aut mani bilong ol," Gesa i tok.

Em i tok ol i bin kism dispela samting i go long kot. Na kot i tokaut olsem gavman i mas baim ol. Tasol no gat wanpela samting i kamap yet.

Mista Gesa i tok planti wanlain bilong ol long Mosbi i kism pinis mani bilong ol. Tasol ol lain bilong Lae i wok

long wet yet long gavman i baim ol.

Gesa i go moa na tok olsem ol olupela soldia long Lae i no laik long kism lo i go long han bilong ol yet. Olsem na ol i stap isi na wetim mani bilong ol. Tasol em i tok sapos gavman i no mekim wanpela samting hariap, ol bai kism lo i go long han bilong ol.

## PNG inap kism moa mani nau long fiseris

DOMINIC KAKAS i raitim

PAPUA Niugini na narapela 15 Saut Pasifik kantri i gat sans nau long kism moa mani i kam long Amerika.


Dispela sans i kamap ples klia bihain wanpela seremoni bilong Saut Pasifik Rijnol Triti bilong Fiseris i kamap long Mosbi.

Insait long dispela seremoni, sekeri teri bilong Foren Afeas, Gabriel Dusava i givim dispela fiseris triti i go long ambeseda bilong Amerika long PNG William Robert Farrand.

Dispela triti i tok orait long samting olsem 50 sip bilong Amerika long kam na painim pis long solwara bilong Saut Pasifik. Na wan wan bilong ol dispela 50 sip bai baim K100,000 bilong painim pis long solwara bilong Saut Pasifik.

Mista Dusava i givim dispela triti i go long Mista Farrand bihain long toktok i bin go het inap long 15 mun olgeta. Toktok i bin wok long kamap namel long ol opisa bilong Amerika na ol bin long Saut Pasifik.

Mista Dusava yet i bin go pas long ol opisa i go moa long pes 19



□ Gordon Bilney, Minista bilong Developmen Koperesen na Pasifik Ailan Afeas, i givim toktok long ol lain bilong Papua Niugini/Australia Bisnis Kaunsel. Mista Bilney bai stap inap long tripela de we em bai raun lukim na toktok wantaim ol bikman bilong kantri.

## Bisop Singkai kamap ples klia

### ... na sutim tok long gavman long sik bilong em

BOS bilong lotu Katolik long Bogenvil, Bisop Gregory Singkai i tokaut nau olsem em i no moa gutpela.

Bisop Singkai i tok em i sik nogut tru.

Dispela em i namba wan taim Bisop Singkai i kamap long ples klia na tokaut long sik bilong em. Na tu long hevi em planti manmeri

na pikinini long Bogenvil i wok long bungim o painim bihain tasol long gavman i putim sampela kain tambu long ol sevis i go long Bogenvil.

Long wanpela pas Bisop Singkai i salim i go long opis bilong Wol Kaunsel ov Sios insait long Pasifik, em i sutim tok long gavman long

dispela sik bilong em.

Insait long pas bilong em, hap tok i go olsem, "Mi laik bai olgeta manmeri insait long wol, sios na Pop i save olsem mi no moa gutpela hia wantaim ol pipel.

"Tasol bai mi stap yet wantaim ol pipel long ailan na karim pen wantaim ol bilong wanem ol yet i mekim

mi kamap pater.

"Mi laik bai olgeta manmeri long wol i mas pait strong na tokim gavman bilong PNG long rausim dispela tambu long ailan pastaim long olgeta manmeri na pikinini i pinis nating.

"Mi singaut nau i go long Pop Jon Pol, olgeta wanwok bilong mi long PNG na Solomon Ailan long wokim wanpela samting nau long helpim ol dispela pipel bilong God. Olsem wasman bilong ol, bai mi stap na karim pen wantaim ol."

Bisop Singkai i tok tu olsem sios bilong Solomon Ailan i no ken ting olsem ol i mas helpim ol pipel tasol long gutpela taim. Em i tok sios i mas helpim ol long taim nogut tu.

Em i tok sios i mas soim ol pipel olsem em i stap bilong helpim ol long wanem ol pipel i kamapim sios.

Bisop Singkai i tok sios i no ken sindaun long baksait bilong em

tasol na lukluk long ol pipel i karim hevi ol yet. Na em i tok moa olsem em i lusim dispela wok nau wantaim ol wanwok bilong em long PNG na Solomon Ailan.

Wanpela bikpela tok Bisop Singkai i mekim, i askim gavman long tingim ol laip bilong ol pipel long Bogenvil. Em i askim gavman tu long lusim politik pastaim na tingting long ol hevi we ol pipel bilong Bogenvil i wok long pilim.

Em i tok Pop i singautim em long i go long Rom na tu long go bek long ol wanwok bilong em, tasol em i no laik ong wanem ol pipel bilong em i no sindaun gut yet.

Em i tok tu olsem ol pipel bilong Bogenvil nau i kism taim tru. Long wanem taim ol sekyuriti fos i kamap gen long ailan, ol i pasim ol rot bilong Solomon Ailan we ol pipel i save go kism helpim long en.

## Wingti statim wok sekap long dipatmen

i kam long pes 1

wanem planti manmeri i save sutim tok long ol bikman tasol.

Long las wik olupela Praim Minista, Rabbie Namaliu na Paul Pora i winim kot bilong tupela. Long wanem i no gat gutpela as long kot bilong tupela, Mista Namaliu i tok stet i bringim tupela long kot long wanem Mista Wingti i gat sampela bel hevi wantaim em long sait bilong politik.

Insait long dipatmen bilong Wingti yet, plis i sasim tripela opisa pinis long paulim pablik mani.

Plis i sasim narapela opisa tu long wanpela pasin raskol we i kamap long opis bilong Praim Minista taim ol stilman i ranawe wantaim K25,000

pe bilong ol wokman.

Mista Wingti i tok taim em i go insait long ileksen sampela mun i go pinis, em i toktok long pait na rausim pasin paul. Olsem na em bai lukim olsem dispela i kamap tru long taim bilong em insait long gavman.

Em i tok gavman bilong em tu bai bihainim sampela rot em Ombudsmen Komisen i givim long gavman taim ol i mekim wok painimaut long Poreporena Friwe.

Dispela wok painimaut i bin tok long olgeta dipatmen i mas bihainim stret ol lo bilong yusim pablik mani na i no long kamapim paul pasin nabaut.

PLIS  
RIPOT



**RABAU:** Wanpela ten-nain (39) man bilong Keravat haus kalabus i brukim haus kalabus long las wiken na ranawe.

Ripot i kam long Rabaul i tok planti em ol man husat i kilim narapela man na stil.

Dispela ripot i tok stat long Fraide i kam inap long Mande, ol man i wok long ranawe wan wan long haus kalabus bihain long ol i katim wanpela hul long banis.

Ol woda i no save long dispela inap long taim ol i laik kaunim ol long Mande apinun.

Ol woda i bilip ol kukboi bilong haus kalabus i mas plenim dispela wok wantaim ol kalabusman.

Tasol plis wantaim ol bikman bilong woda i tok dispela pasin i soim ples klia olsem ol woda husat i was long dispela taim i wok wantaim les na i no laik sekim gut ol kalabus man.

Komisina bilong CIS i tok long asde olsem em bai kamapim wanpela komiti bilong lukluk long dispela hevi.

**SIMBU:** Wanpela pikinini meri husat i gat tempela (10) krismas tasol i bin dai taim paia i kukim haus we em i slip long en.

Plis ripot i kam long Kundiawa i tok dispela yangpela meri i bin slip insait long wanpela haus long Gembogl stesin taim paia i kirap long samting olsem 10 klok long las wik Trinde nait na kukim em.

Plis i bilip olsem lam we em i laitim long nait i kamapim dispela birua.

Plis i no tokaut long nem bilong dispela pikinini yet.

**MADANG:** Wanpela plisman i stap nau long bikpela haus sik long Madang. Sampela raskol man i bin sutim em wantaim gan long las wik Trinde nait. Ripot i kam long Madang i tok olsem dispela plisman wantaim wanwok bilong em i wok long nait bilong traime painim sampela kalabusman husat i ranawe long Beon Haus kalabus tupela wik i go pinis taim tupela i bungim dispela birua.

Kostel Rijn komanda, Tom Kulunga i tok dispela tupela plisman i wok long sekim Sek bris bihain long tupela kalabus i stilim samting bilong wanpela famili antap long bot.

Tupela i stilim tu wanpela .22 gan long wankain taim tasol.

Plis i bilip dispela tupela man tasol i kamapim dispela birua na i askim pinis ol pipel bilong Sek long helpim ol na tokaut sapos ol i lukim tupela.

Plis i givim nem bilong tupela olsem John Dumunga bilong Bogia na Jack Kori bilong Gumine long Simbu.

**MOSBI:** Sauten Rijn Plis Komanda, Philip Taku i givim strongpela tok lukaut pinis i go long ol man husat i save stilim ol pikinini.

Em i tok plis bai givim bikpela mekim save long ol lain husat i save stilim ol pikinini na bihain askim long kism mani.

Asisten Komisina Taku i mekim dispela toktok bihain long sampela lain i stilim wanpela pikinini long Mosbi na tripela de bihain ol i askim papamama bilong pikinini long baim ol pastaim long ol i ken givim pikinini i go bek long ol.

Tasol mama bilong pikinini i tok ol i bin go long stua wantaim na mama i i wok long baim ol kaikai. Na tupela minit bihain tasol, pikinini i lus pinis.

Asisten Komisina Taku i tok ol manmeri husat i save stilim ol pikinini i mas ripot long NBC o plis stesin hariap sapos ol i painim ol lus pikinini.

Em i tok tu olsem ol i no ken askim mani. Bikos plis bai mekim save long ol.

**IALIBU:** Distrik Kot long Ialibu, Sauten Hailans i rausim pinis kot bilong Gavana Jenerel, Sir Wiwa Korowi bihain long wanpela meri bilong em, Mone i kotim em long i no baim mentenens long pikinini we Sir Wiwa i givim long em.

Ripot i kam long Mendi i tok Mone i askim kot long askim Sir Wiwa long narapela K4,900 interes mani em Sir Wiwa i no baim tu.

Mejistret long dispela taim, Damien Ipuke i rausim dispela kot long wanem Mone wantaim loya bilong Sir Wiwa i tok bai ol i stretim dispela hevi long pasin tumbuna ausait long kot.

# Moa kalabus ranawe long las 5-pela mun

## CLEMENT MIRIA I raitim

OPIS bilong Koreksenal Sevis (CIS) i tokaut pinis asde olsem ol kalabus man i brukim haus kalabus na ranawe 56 taim olgeta stat long mun Jenueri i kam inap long mun Me.

Insait long dispela taim, 102 kalabus man i ranawe. Ol i holim tasol 31 na narapela 71 i stap yet ausait.

Dispela ripot i soim olsem namba bilong ol kalabus man

husat i ranawe i bikipela winim narapela tupela krismas i go pinis.

Planti bilong dispela pasin i kamap long Bomana, Baisu na ol narapela haus kalabus long kantri tu.

Long 1991, 200 kalabus man i ranawe tasol i luk olsem namba bilong dispela yia bai winim namba bilong ol narapela yia.

Koreksenal Sevis Employis Asosiesen (CSEA) i tok CIS i mas lukluk long stretim dispela hevi hariap. Na sotim namba bilong ol

man husat i save brukim haus kalabus na ranawe.

Ol i tok long bipo i kam inap nau, CIS i no save mekim ol wok painim aut taim ol kalabus i ranawe.

CSEA i tok as bilong dispela em long wanem ol woda i no amamas tumas long wok bilong ol.

Presiden bilong CSEA, Simon Sobaim i tok ol paul pasin long ol wok bilong ol bikman insait long dipatmen i mekim na ol memba i no wok gut.

Em i tok CIS i mas stretim dis-

pela hevi pastaim long ol woda i ken wok gut na dispela i mas stat long opis bilong komisina i kam daun long ol haus kalabus.

Em i tok 18 komanda bilong ol haus kalabus insait long kantri i no wokbung wantaim ol lain bilong bikipela opis long Mosbi.

Em i tok i gat sampela hevi bilong haus, pe na sampela arapela helpim we ol inap long kisim tasol nogat olsem na wok bilong ol i no gutpela tumas.

Mista Sobaim i givim wanpela

tok piksa long Bomana.

Em i tok 20 opisa husat CIS i rausim nem bilong ol long pe rol i slip yet long haus bilong wok.

Em i tok dispela i mekim na planti woda i pilim hevi.

Mista Sobaim i tok tu olsem taim ol bikman i laik makim ol sinia opisa, ol i save wantok sistem tumas.

Em i tok sampela bilong dispela ol opisa i gat nem nogut tasol ol i go het long makim ol.

# Moa senis bai kamap long ol wok bilong fores

## HARLYNE JOKU I raitim

LONG stat bilong dispela yia, ol wokman na meri bilong Fores dipatmen i mekim kain kain toktok long nupela dipatmen het bilong ol.

Long wanem, nupela dipatmen het i wok long sampela kranji pasin insait long Fores dipatmen.

Insait long wanpela ripot ol i tok olsem dipatmen i no luksave long ol. Na i save kisim ol man bilong ol narapela kantri i kam na givim ol wok olsem ol edvaisa. Ol i tok ol Papua Niugini manmeri husat i wok long dipatmen i mas kisim wok long dispela.

Mis Jean Kekedo, nupela dipatmen het na menesing dairekta bilong Papua Niugini Fores Atoriti na

Nesenel Fores Sevis i autim pinis sampela toktok. Ol toktok bilong em i bihainim dispela komplek bilong ol wokman na meri.

Mis Kekedo i tok em i no gutpela tumas long lukim ol sinia wokman bilong dipatmen i kamapim dispela samting. Em i tok dipatmen i nidim gutpela na stretpela helpim bilong helpim gavman ranim wok bilong fores. Long wanem long ol yia i go pinis, wok bilong ranim Fores dipatmen i no bin ran gut.

Long ripot bilong ol, ol i tok olsem rispek, loyalty na psin bilong givim ol yet long mekim wok wantaim Mis Kekedo i no gat. Na tu ol i tok olsem ol Papua Niugini manmeri i no kisim

sampela kain wok insait long Nesenel Fores Sevis (NFS).

Em i tok bai i gat bikipela senis i kamap long dipatmen bilong Fores. Na olsem het bilong dipatmen, em i wok long stretim yet ol samting. Long wanem senis i no inap long kamap hariap. Kekedo i tok senis bai kamap bihain long sampela taim.

Kekedo i tok bod bilong NFS i tok orait pinis long kisim 8-pela wokman. Faivpela em ol Papua Niugini manmeri na tupela i wok nau wantaim dipatmen.

"Ol senis insait long dipatmen i wok long kamap gut. Tasol bai i no inap long kamap long wanpela o tupela wik. Nogat. Senis bai kamap bihain long sampela taim," Kekedo i tok.

# Bisnis long PNG na Australia no gutpela

## DOMINIC KAKAS I raitim

NAMBA bilong ol samting Papua Niugini i save baim long Australia i wok long go daun. Na ol samting Papua Niugini i salim long Australia i stap wan kain wantaim no gat bikipela senis.

Nesenel minista bilong Developmen

Kopresen na Pasifik Afeas bilong Australia, Gordon Bilney i tok wok bisnis bilong tupela kantri i no kamap bikipela olsem tupela i ting bai kamap. Maski tred namel long tupela kantri i bin kamapim samting olsem K2 bilien long

las yia.

PNG em i wanpela long ol top 5 kantri Australia i save salim samting bilong em long ol. Australia tu i wanpela kantri em PNG i save salim planti ol samting bilong em.

"Yumi mas luksave olsem tokorait namel long tupela kantri long wok bung wantaim i go moa long pes 5

# Ol meri bilong Lions klab helpim Red Cross



• Ol memba bilong Red Cross sosaiti na Lioness klab i traim ol wilsia na stik bilong wokabaut.

## IVAN BAYAGAU I raitim

PAPUA Niugini Red Cross Sosaiti long Mosbi i kisim pinis sampela moa helpim long Trinde, Jun 16.

Red Cross Sosaiti i kisim dispela helpim i kam long wanpela klab bilong ol meri i stap long Mosbi, ol i kolim long Lioness Klab bilong Waigani.

Lioness Klab i givim ol wilsia na stik bilong wokabaut i go long PNG Red Cross Sosaiti. Lioness

Klab i baim ol dispela samting long stua bilong Johnson Pharmacy. Kos bilong ol inap long K1,500.

Red Cross Sosaiti bai putim dispela ol wilsia na stik bilong wokabaut i go long wanpela haus bilong ol wilsia na stik bilong wokabaut. Red Cross Sosaiti i wokim dispela haus long tripela mun i go pinis.

Dispela ol wilsia na stik bilong wokabaut bai stap dispela haus. Na ol lain manmeri husat i painim bagarap long bodi bilong ol bai yusim.

# Australia tok Bogenvil em bilong PNG gavman yet long stretim

OPOSISEN lida, Jack Genia i bin bung wantaim minista bilong Developmen Kopresen na Pasifik Afeas long gavman bilong Australia, Gordon Bilney long asde.

Ol hevi bilong Bogenvil i wanpela samting tupela i toktok long en tu.

Mista Genia i givim liklik toktok tu long sampela senis we i kamap long wok politik insait long

kantri.

Wanpela long ol dispela toktok em Intanel Sekyuriti Ekt na pasin bilong bosim laik bilong ol narapela. Em i tok gavman bilong Wingti nau i wok long bihainim dispela tupela samting.

Mista Genia i tokim Mista Bilney tu olsem em bai go long ol provins bilong skulim na tok save long

i go moa long pes 5



# WANTOK

NIUSPEPA BILONG OL PAPUA NIUGINI STRET

## Skelim gut wok painimaut

Dispela wik Praim Minisita Paias Wingti i tokaut long bikpela wok sekap bai kamap long ol gavman dipatmen na ol politisen wantaim. Wingti i tok as bilong dispela em long painim na pinisim pasin bilong kisim grismani na paulim mani.

Mista Wingti i tok oltaim ol bikman i kamap long kot tasol ol i no save kalabus. Oltaim ol i save winim kot. Olsem na nau bai em i kirapim bikpela wok long painim na pinisim ol manmeri husat save mekim dispela kain pasin.

Em i tok tu olsem bai ol opisa i no sekap tasol long ol bikman. Bai ol i lukluk tu long ol tibo, ol taipis na ol kuskus na lukim sapos ol dispela lain tu i asua.

Dispela ol toktok bilong Wingti i gutpela. Tasol bai em i mekim wanem long taim dispela wok i pinis. Bai em i kotim ol dispela lain o bai kot bilong ol i go wara nating gen? Planti taim na mani i save lus nating long kamapim ol kain bikpela kot olsem. Olsem na ating mobeta gavman i skelim gut wok pastaim na kamapim dispela wok painimaut. Dispela wok painimaut tu bai kostim bikpela mani. Gavman bai kisim mani we na mekim dispela wok. Na husat tru bai mekim dispela bikpela wok? Dispela em ol askim bilong ol pipel. Save i stap long gavman.

# Ripot bilong ol wok kamap long Bogenvil ailan Ren bagarapim 14,000 long Siwai

VERONICA HATUTASI  
i raitim

NESENEL Disasta na Imejensi Sevis (NDES) i helpim pinis moa long 14,000 pipel bilong Siwai eria insait long Saut Bogenvil.

NDES i givim helpim bihain long bikpela ren i pundaun na wara i bagarapim ol gaden kaikai bilong ol.

Stat las wik Trinde, bikpela ren i bin pundaun long Siwai na Buin eria. Na moa long 35,000 pipel i painim hevi.

Ripot i kam long opis bilong

NDES i tok wanpela sip ol i kolim M.V. *Biumaris* i lusim pinis solwara bilong Rabaul long asde apinun. Antap long dispela sip i gat 200 tan kaikai na ol arapela samting bilong helpim ol pipel husat i bungim hevi long bikpela ren.

Wanpela narapela sip ol i kolim M.V. *Tukana* bai lusim Rabaul long dispela wik Sande wantaim narapela 100 tan kaikai bilong ol pipel long Siwai. Kos bilong ol kaikai em K483,000.

Ripot ya i tok moa olsem bikpela ren i bagarapim nau rot long Siwai i go long Buin.

Rot long Tonu, Konga na i go long Mamagota i bagarap olgeta. Nupela rot long Konga i go olsem long Mamagota nambis tu i bagarap. Wara i tait na rausim bris long Siwai. Tonu ples balus we ol sekyuriti fos i wok long yusim olsem hetkwata bilong ol i bagarap olgeta. Na ples balus i pas long dispela taim. Ol wokman bilong gavman tu i painim hat long go long wok bikos ol wara i tait.

Ripot ya i tok tu olsem olgeta gaden kaikai long Siwai i stap aninit long wara. Na ol gaden kaikai we i stap klostu

long ol bikpela wara i bagarap olgeta. Long ples Morokaimoro graun i bruk. Tasol no gat ripot yet long wanem kain bagarap i kamap long pipel na ol narapela samting.

Wara i karim wanpela man bilong ples Kiriui long Konga eria. Tasol ol bin painim em long arere long wara Mopiai.

Opis bilong NDES i tok bikpela ren i wok long pundaun yet long Siwai eria. Sampela opisa bilong NDES long Rabaul i go pinis long Bogenvil long lukim ol bagarap we i kamap.



•Banana tu ya....Sampela lokol fama i soim tu ol kain kain banana na suga ken long Mosbi so long las wiken.

## Amnesti Intanesenel laikim wok sekap kamap long indai bilong man Bogenvil

i kam long pes 1

Stet minista, Michael Ogio husat i lukautim tu ol Afeas bilong Bogenvil.

Mausman long opis bilong Mista Ogio i tok ol i harim planti ausait toktok long dai bilong Savia taim em i stap aninit long lukaut bilong ol sekyuriti fos.

Tasol ol tu i no kisim yet wanpela klia tok save i kam long Difens opis long dispela samting.

Wantok i no inap kisim klia stori long dispela samting long Difens het opis. Difens minista Paul Tohian i stap long ilektret bilong em. Na Difens Seketeri na Komanda tu i no bin stap long givim ol toktok bilong ol bilong putim long niuspepa.

Amnesti Intanesenel i singaut strong nau long PNG gavman long larim ol ausait grup olsem Intanesenel Red Cross, Amnesti Intanesenel na ol arapela long go insait long Bogenvil na sekap long ol kain ripot na stori olsem.

## Singaut bilong gutpela sindaun kamap gen

WANPELA bikpela askim i go nau long olgeta saveman bilong Bogenvil na ol arapela hap bilong kantri long wokbung wantaim bilong kamapim gutpela sindaun long Bogenvil ailan.

Ekting siaman bilong wanpela nupela komiti bilong Bogenvil we i save toktok long pasin wanbel, Thomas Anis i bin putim kamap dispela askim.

Mista Anis i kamap wantaim dispela askim taim em i givim bikpela tingting long komiti bilong em. Gutpela sindaun we i stap nau long ol hap we

gavman i lukautim i bin kamap long hatwok bilong ol sief na pipel bilong ples yet.

Mista Anis i laikim ol saveman bilong Bogenvil long sapotim wok bilong pis komiti long karimaut wok bilong en. Wankain olsem nesene gavman i bin givim tok orait long mekim dispela wok.

Mista Anis husat i siaman bilong Buka Interim Atoriti i askim tu long pipel bilong Bogenvil i mas save olsem gutpela sindaun i wanpela bikpela samting. Olsem na pipel long Bogenvil ailan i laikim olsem dispela samting i mas stap namel long olgeta pipel.

## Komiti kamap bilong traim bringim gutpela sindaun gen

OL lida bilong Bogenvil i fomim pinis wanpela komiti long mekim ol pipel bilong Bogenvil yet i painim rot bilong kamapim gutpela sindaun. Oli kolim dispela komiti olsem "Not Solomon Peace and Negotiating Monitoring Committee."

Wok bilong dispela komiti em long toktok na kamapim pasin wanbel na gutpela sindaun.

Komiti ya i gat tingting olsem i gat rot i stap bilong toktok wantaim ol BRA lida. Na ol ovasis sapota bilong ol na traim kamapim gutpela sindaun gen long Bogenvil.

Dispela komiti i bin holim namba wan kibung bilong en long Sohanu ailan long Buka long tupela wik i go pinis. Long dispela miting ol ilektim ol opisa husat bai mekim wok bilong komiti. Na tu ol bin lukluk long ol toktok we bin kamap long Pan Bogenvil lida bung long Epril. Na ol rot bilong bihainim long kamapim gutpela sindaun gen long Bogenvil Long dispela miting ol makim Peter

John Momis olsem siaman bilong Komiti. Thomas Anis husat i siaman bilong Buka Interim Atoriti i kamap namba tu bilong Pater Momis na James Togel i kamap eksekutiv opisa.

Komiti i gat 17 memba insait long en husat i kam long 7-pela Interim Atoriti long Bogenvil na-Atols, tripela memba bilong nesene palamen, ol lain husat i makim ol sios, meri na tu bisnis oganaisesen.

Ol i luksave olsem komiti i gat bikpela wok tru long mekim long traim kamapim gutpela sindaun long ailan. Ol i tok sapos ol i laikim wok bilong komiti i karim kaikai, orait, ol i mas wok klostu wantaim nesene gavman.

Ekting siaman bilong komiti, Thomas Anis i tok komiti i mas stap bilong em yet. Na i no ken harim ol kain toktok i kam long ol ausait manmeri.

# WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO  
Telepon Namba: 25 2500  
Feks Namba: 25 2579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00





□ **KANAGE** wok olsem wanpela windo klina (man bilong klinim ol windo) long haus bilong wanpela waitman long Lae. Wanpela de em i klinim ol windo i stap na wanpela yangpela misis tu i waswas i stap long rum waswas. Kanage wok na ai bilong em i go kisim stret dispela yangpela misis. Em nau misis i waswas pinis na wokabaut i go long kisim taul long klinim skin bilong em. Taim misis ya i kisim taul, em lukim Kanage na em i sanap lukluk long Kanage i wok i stap. Taim Kanage i lukim olsem misis ya i wok long lukluk long em, olgeta bun bilong em i slek na ol masol bilong em i kamap olsem mau popo. Em nau Kanage kirap na tokim misis ya olsem, "Wanem samting nau ya misis. Yu no save lukim ol man i klinim windo bipo. Em nau, kain samting olsem ya, misis. Tasol yu lukaut. Mi stap long gia ya, i no brek."

Alphonse Boina,  
11 Mail, LAE.

□ **KANAGE** kalap long balus long Rabaul na i go long Hagen. Taim balus i lusim ples balus na i go antap, Kanage i pilim swit stret. Balus i go na kamap klostu long Hagen. Tasol bikpela ren i pundaun na klaut i karamapim ples olgeta. Na pailot i no inap tru long lukim ol maunten. Olsem na em i tokim ol pasindia long tok inglis olsem em bai tanim balus na ol i go bek long Rabaul. Tasol Kanage i no save long wanem samting pailot i toktok long en. Em i amamas tasol na sindaun i stap. Taim balus i go kamap long Rakunai, Kanage i lukluk i go ausait long windo na lukim solwara na Kokopo plantasin wantaim Rabaul taun tu i slip krangi i stap. Em kirap na tok, "O...io. Kol peles Hagen tu ya olsem Rabaul taun stret. Hagen i gat solwara na kokonas tu ya. Ol manmeri save giamanim mi na tok i no gat kokonas na solwara long Hagen."

Alphonse Boina,  
11 Mail, LAE.

□ **WANPELA** taim Kanage wantaim tupela pikinini man bilong em, John na James i go waswas long Wara Dagi long Kimbe. Kanage i pasim laplap. Ol i go kamap long wara na bikpela win tru i kam. Taim Kanage i wokabaut i go daun long wara, win i kam strong tru na laplap bilong em i lus na pundaun. Na em i wokabaut asnating i go insait long wara. Tupela pikinini bilong em lukim na kirap singaut, "Lukim em. Draipela lapun ya, as bilong em i no sem liklik." Kanage harim olsem na kirap tokim tupela pikinini bilong em olsem, "Yutupela no ken wokim pani long mi. Tambaran ya i no save kamap ples klia bipo. Nau tasol em i kamap ples klia na yutupela i lukim."

Mathew Dawer,  
KIMBE, W.N.B.P.

□ **KANAGE** karim wanpela lek bilong pik na i go bungim poro bilong em long Bird of Paradise hotel long Goroka. Kamap long hap nau na Kanage i laik baim wanpela botol bla long poro bilong em. Tasol poro i no laik. Olsem na Kanage kirap na askim poro bilong em, "Olsem wanem, yu misin man a?" Poro i kirap na bekim, "Kain samting olsem." Tupela lusim hotel na i go ausait na Kanage askim poro bilong em gen, "Se, yu save kaikai pik tu o nogat?" Poro i kirap na tokim Kanage, "Yes, mi save kaikai pik. Tasol mi save kaikai pik long ol Sarere tasol. Na i no long ol arapela de." Kanage bel hat na lusim poro bilong em na tekov i go long haus bilong em long Pliswara Kompaun.

Papa Kanage,  
GOROKA.

moa tok pilai long pes 20

# Anisi autim Is Sepik kebinet

GODFRIED NIAKA i raitim

NUPELA primia bilong Is Sepik, Alex Anisi i tokaut pinis long ol kebinet minista bilong em long las wik Fraide.

Mista Anisi i tokaut long kebinet bilong em taim nupela provinsal asembli i holim wanpela bung las wik.

Ol memba long sait bilong gavman husat i kisim wok minista em Jeffrey Yuamiamba (Sausso)-Sosel Sevis na Komyuniti Developmen, Martin Apiningi (Ambunti)-deputi primia na Edukesen, Nelson Omagan (Yuat)-Helt, Laura Martin (Wewak Taun)-Fainens na Plenjing, Tom Waleyegre (Boikin)-Praimeri Industri, Toby Ofmo (Apa Sepik)-Kalsa na Turisim, Barth Waki (Burui Kunai)-Forestri na Lens Mobaalisesen,

Nick Muriki (Albiges Mamblep)-Lokol Gavman na Viles Sevis, Eric Wangihau (Is Yangoru)-Provinsal Afeas na Distrik Sevis, Jack Sakar (But/Dagua)-Woks, John Kandi (Maprik/Wora)-Komes

na Ismael Tramba (Midel Sepik)-Fiseris na Marin Risoses.

Primia Anisi yet i stap olsem minista bilong Edministresin Sevises.

Primia Anisi i tokaut long kebinet bilong em. Tasol i gat ol toktok i wok long kamap namel long ol memba, Long

wanem pastaim long ol nupela memba i bin makim em (Anisi) olsem primia, em i bin stap olsem wanpela kendidet bilong Melanesien Alaiens (MA) pati. Bihain tasol long ol memba i makim em olsem primia, em i tokaut olsem em bai lusim MA. Na i go joinim Lig bilong

Nesanel Edvensmen (LNA).

Disisen bilong Anisi i bihainim sampela toktok bilong memba bilong Wewak long Nesanel Palamen, Bernard Narokobi.

Mista Narokobi i bin mekim sampela toktok we Anisi i pilim i no gutpela tumas.

## Klinim Madang taun progrem stat pinis

CLEMENT MIRIA i raitim

MADANG Taun Interim Komisen (MTIC) i kamapim pinis wanpela progrem bilong klinim Madang taun long las wik. Na dispela progrem i wok long go het nau long sampela eria insait long taun.

Astingting na MTIC i kamapim dispela progrem em long klinim na mekim taun i mas stap klin, rausim ol natnat long taun eria na kirapim tingting bilong ol manmeri insait long taun long lukautim wan wan hap bilong ol. Na tu bilong helpim komisen long wokim ples i mas stap klin olgeta taim.

Siaman bilong MTIC, Peter Hill i tok dispela progrem bai go het yet. Na wan wan famili long taun i

mas klinim hap bilong ol.

Em i tok aninit long dispela progrem, wok bilong komisen em long kisim ol pipia na karim i go long ples bilong tromoi pipia. Komisen bai mekim dispela wok fri.

Mista Hill i tok i no taun atoriti i mekim wok bilong klinim taun. Nogat. Ol manmeri long taun i mekim dispela wok. Na wok bilong komisen em long rausim ol dispela pipia na i go tromoi long ples bilong tromoi pipia.

Em i tok bihain long ol manmeri i klinim haus bilong ol, MTIC bai go raun na lukluk long wan wan hap eria bilong wan wan famili. Husat famili i gat gutpela na klinpela eria bai winim sampela kain prais.



*Aitape bris...Nawae Construction kampani bilong Lae i wok long stretim nau dispela bris klostu long Aitape taun. Olgeta wok bilong Nou bris i bin pinis long tupela wik i go pinis. Foto: Felix Ramram.*

## Haiwara karamapim ol ples long Saut Flai

IAN KAKARERE i raitim

BIKPELA haiwara long Saut Flai i mekim na planti manmeri bilong ples nau i wok long ron antap long ol kanu bilong ol tasol.

Kuskus bilong Kiunga Distrik Kot tu i wok long ron long kanu long dua bilong em i go long wok na i kam bek.

Dispela olgeta samting i kamap tupela wik i go pinis. Na i wok long i go het yet.

Ripot i kam long Kiunga i tok samting olsem 400 manmeri bilong Not Flai nau i wok long painim hevi. Long wanem bikpela ren i mekim na Flai Riva i solap na karamapim olgeta samting bilong

ol.

Em i tok tu olsem wara i kam antap olgeta, klostu long plua bilong haus.

Sampela lain husat i mekim haus antap liklik i orait, tasol planti i kisim taim.

Nau yet wara bilong dring i sot na ol haus i kol nogut tru long nait.

Sampela lain Saut Flai i askim provinsal gavman long saplaim ol kaikai. Tasol kodineta bilong Not Flai, Vincent Kadibu i tok nogat. Long wanem sapos em i givim ol kaikai, planti moa pipel bai tingting long lusim ples bilong ol na i kam stap long ol setelmen we ol i ken kisim kaikai i kam long gavman.

Em i tok planti bilong ol i save bungim wankain hevi long bipo na ol i save stap strong yet.

## Bogenvil hevi em bilong PNG long stretim

i kam long pes 3

ol pipel long ol samting o senis nau i wok long kamap insait long kantri. Na tu em bai toktok wantaim ol pipel long sampela rot bilong helpim stapim lo na oda hevi insait long kantri.

Mista Genia i tok ol oposisen i no tingting tumas long senisim gavman hariap inap long sampela taim bihain.

Em i tok ol i no inap kamapim vot i nogat biilp

hariap long pulim sapot nating. Long wanem dispela bai bagarapim kantri na ol bai wetim tasol taim bilong em stret.

Tasol long nau yet, Mista Genia i tok em i sapotim sampela senis we gavman i kamapim, long wanem dispela i gutpela long kantri.

Long bekim bilong em i go long Mista Genia, Mista Bilney i tok Australia bai wok yet long givim bikpela helpim mani i kam long PNG.

## Bisnis no gutpela

i kam long pes 3

long bisnis, PATCRA i no wok gut long kamapim wok bung namel long tupela kantri. Yumi mas tingting, olsem yumi mas lukluk ken long wok bung long kamapim bisnis. Na wokim painim aut sapos i gat rot i stap bai yumi stretim samting i kamap gut ken," Bilney i tok.

Mista Bilney i bin wokim ol dispela toktok taim em i bung wantaim ol memba bilong PNG/ Australia Bisnis Kaunsil (PNGABC) long Mosbi long dispela wik Trinde.

Em i bin kam long kantri long wokim tripela de lukluk raun bilong em. Em bai go long Rabaul na Buka long lukim stret long ai bilong em wanem samting i wok long kamap long Buka.

Mista Bilney i tokim PNGABC em i bilip olsem ol kampani bilong Australia husat i wokim wok long PNG i ken go pas long developim planti samting long salim i go long arapela kantri.

Bihainim wanpela tok orait ol opisal bilong tupela kantri i sainim long las yia, Australia bai no inap givim mani long sapotim mani plen bilong PNG. Ol bai stapim olgeta dispela samting long yia 2000 o 2001. Tasol bai senis wantaim nupela helpim.

Australia bai givim tasol mani long samting em ol i laikim gavi i go moa long pes 19

## TU MINIT TINGTING

## WELKAM! MIPELA I HEPI LONG LUKIM YU

EM i pasin bilong yumi, long taim wanpela man o meri i kamap na yumi no bin lukim em inap longpela taim yumi save tok, "Welkam! Mipela i hepi long lukim yu gen."

Yumi save tok olsem long taim ol yangpela i kam bek long skul. Yumi save mekim wankain long taim planti memba bilong famili i save stap nabaut nabaut long kantri na ol i kam bek long ples bikos wanpela brata/susa i marit nupela, o wanpela i dai pinis.


Ating olgeta nupela papamama i no save tok olsem, tasol ol i save ting olsem, "Welkam! Mipela i hepi long lukim yu," long taim meri i karim namba wan pikinini. Long wanem, i tru, ol i bin wetim dispela bebi inap planti mun. Na ating tupela i bin bihainim sampela tambu long kaikai na pasin bilong ol. Nau bebi i kamap na ol dispela wari i pinis. Em i welkam; ol i hepi tru long lukim pes bilong em.

Orait, yumi manmeri i save tok tok olsem long yumi wan wan. Tasol ating long Krismas yumi save tok olsem long pikinini Jisas, "Welkam! Mipela i hepi

long lukim yu." Em i wanpela mining bilong Krismas. Yes, yumi hepi long lukim Jisas, long wanem, em i kam daun long dispela graun na kisim bodi bilong yumi. Em i laik kisim ekspiriens long stap olsem yumi yet, na pilim olgeta samting yumi save pilim. Na em i kam bilong soim rot bilong go long heven. Na em i bin kam bilong kisim bek yumi, bai yumi kamap pren bilong Gold Papa gen. Olsem, na Jisas i welkam tru. Yumi hepi long lukim pes bilong em.

Long sait bilong God Papa, em i save tok: "Welkam! Mi hepi long lukim pes bilong yu," long olgeta nupela pikinini i kamap long graun. Planti planti pikinini i no save harim dispela tok welkam long taim ol i kamap. Long planti hap bilong graun, nupela pikinini em i wanpela nupela wari tasol. Em i wanpela maus moa i mas painim kaikai - na kaikai i sot o i no stap olgeta.

Olsem na ol bebi i no welkam. Sore, i gat planti ol i dai long rot. Ol man na meri i kilim ol i dai; na ol i no inap harim dispela tok welkam bilong papamama o



FRANK MIHALIC i raitim

bilong God.

Dispela tok, "Welkam! Mi hepi long lukim yu," em i kam long stori bilong baptais bilong Jisas long han bilong Jon. Yumi save ritim long Matyu 3:17. Jisas i kisim baptais pinis na em i kamaut long wara na ol i harim wanpela nek i kam long heven na i tok, "Dispela em i pikinini bilong mi. Mi laikim em tumas." I olsem em i bin tok: "Welkam! Mi hepi long lukim yu." Long wanem, nau Jisas bai statim

wok bilong autim Gutnius. Bilong dispela na em i bin lusim heven na i kamdaun long graun. Olsem na God Papa i welkamim em.

Long taim pikinini o bikipela man/meri i kam long kisim baptais, ating God Papa i save tok wantaim moa, "Welkam! Mi hepi long lukim yu." Na em i save mekim wanpela tok moa, olsem em i bin mekim long taim bilong baptais bilong Jisas. God Papa i save tok long wan wan man o meri o pikinini i kisim baptais olsem, "Yu pikinini bilong mi." Long wanem, long baptais sol bilong yumi i kamap klin na God i save go insait long wanpela spesel we. Yumi save tok olsem: yumi serim laip bilong God nau. Olsem Sen Pol i tok long 1 Korin 3:16, "Ating yupela i no save, yupela i haus bilong God yet, na God i stap insait long yupela?" Olsem na ating God Papa i save welkamim yumi olsem pikinini bilong em nau. Yumi no moa haiden.

I gat wanpela stori bilong bipo yet, we wanpela Kristen mama i save givim kis long bros long nupela bebi bilong em. Long

wanem, bebi i bin kisim baptais pinis na mama i pilim olsem: God i stap nau insait long dispela bebi long wanpela spesel we. Olsem nau God i stap klostu long dispela meri bikos em i stap long bebi bilong em. Olsem na God i bin kam insait long haus na famili bilong em long wanpela spesel we. Dispela mama bilong stori i save holim bebi klostu long susu bilong em yet na i save pre long God i stap insait long bebi. Em i wanpela gutpela Kristen pasin i soim bebi em i wanem samting tru, na baptais em i wanem samting tru.

I gat wanpela taim moa we yumi save yusim dispela tok, "Welkam! Mipela i hepi long lukim yu," na em i long taim man o meri o pikinini i kisim baptais na i kamap memba bilong sios. Sios nau i tok welkam long dispela nupela memba bilong en.

Las tru, yumi olgeta i wetim dispela de we yumi bai sanap long ai bilong God na long dua bilong heven, na yumi tu i laik harim dispela tok, "Welkam! Mi hepi long lukim yu."

## Sambus Lutheran yut bung long strongim wok

## JAMES KILA i raitim

MOA LONG 600 manmeri i bin kamap long bikipela bung bilong Sambus Lutheran Yut (SLY) long 2-Mail long Lae las wiken.

Ol senta husat i bin kamap long dispela bung bilong ol yut em

Wau, Mumeng, Bulolo, Sambus, Timini, Hagen, Mosbi na Lae.

SLY i bin stat bihain long ol lain pipel bilong Sambus insait long Mumeng eria bilong Morobe provins i ting dispela em i gutpela rot long bringim Tok bilong God i go long ol pipel. Na tu bilong helpim na kamapim gutpela sin-

daun insait long ol famili.

Sampela ol bikipela toktok SLY long ol wan wan senta i bin toktok long en long miting i pas wantaim wok bilong sios na ol we ol yut long ol dispela ples i ken karim wok.

Ol lida bilong SLY i bin toktok tu long ol kain rot we i ken

helpim ol yangpela manmeri long kamapim gutpela Kristen sindaun na lotu wantaim na bringim Tok bilong God i go long ol narapela.

Insait long bung, ol lida i bin askim ol SLY grup bilong wan wan senta long givim ripot bilong ol long wanem wok ol i bin kamapim

long ples.

Dispela miting i bin skeljem ol rot we i ken helpim na kirapim wok bilong SLY. Na tu i bin wanpela gutpela taim ol yut i ken sindaun wantaim na skelim ol gutpela tingting na skul bilong Baibel.

Long stat bilong bung long Sarere, ol lida i mekim wanpela bikipela tok pait long ol yet long ol we o rot bilong daunim ol bikhet pasin ol sampela memba bilong yut bilong ol i save mekim.

Wanpela strongpela tok wanpela lida i bin askim em long rot bilong daunim na stapim dispela pasin bilong smokim spak-brus. Ol lida i tokaut olsem i gat sampela memba bilong yut husat i save wokim dispela pasin nogut bilong bagarapim bodi.

Long bung yet, planti lida i laikim olsem husat ol yangpela man i save smokim spak-brus i mas go stret long han bilong plis. Tasol sampela lida i tokaut

strong olsem dispela pasin i no gutpela. Ol i laikim olsem lotu o yut yet i mas pre o mekim lotu na askim God long helpim na senisim pasin bilong ol dispela yangpela man.

Planti kaikai tru i bin kapsait taim ol manmeri i sindaun long bung.

Ol mama bilong Lae i redim bikipela kaikai stret long givim long ol lain manmeri husat i bin kamap long bung.

## Bikipela Gospel musik singsing kamap long Madang

## DANIEL MONA i raitim

NAMBA wan gospel musik festival long PNG i bin pulim planti Kristen singsing grup long Madang na narapela hap bilong PNG. Ol i bin bung wantaim, amamas na liptimamim nem bilong Jisas.

Lotu singsing festival i bin kamap long Laiwaden Oval long Madang stat long Fraide Jun 12 i go inap long Sande.

Bung i save kamap long 6 klok apinun na pinis long hap pas 11 long nait.

Moa long siks tausen pipel i bin kamap na amamas long dispela taim.

Tupela biknem man bilong kamapim planti gutpela gospel singsing, Sikal Kelep na Max Manimbi i bin go pas. Bikos ol i laik traime apim gospel musik insait long kantri.

Tenpela gospel grup bilong PNG, sevenpela bilong Madang yet, i bin kamapim ol musik bilong ol long dispela taim. Ol grup we i bin kam long narapela provins em Hearts of Fire bilong Hohola long Mosbi, Four Square Gospel Grup bilong Lae na Adoption Band bilong Kobua Famili long Hagen.

Ol gospel grup bilong Madang provins yet em Id

Amut Ben bilong Karkar ailan, Praise and Unity bilong Saidor, Siar Yut grup, Yomba Katolik yut, ol yut bilong Yunaitet Sios, Lutheran Kristen Gospel grup na Laits bilong Madang.

Gospel Lighthouse wantaim helpim bilong ol narapela lotu long Madang i kamapim dispela gospel musik festival insait long kantri.

Pasto bilong Gospel Lighthouse Yut long Madang, Komorah Salum i tok pe bilong holim festival i bin stap long mak bilong K7,000.

Gospel Musik Ministri bin lukim planti hevi bilong ol yut i wok long kamap bihain long ol i saspemim Madang provinsal gavman. Na ol i putim dispela festival long helpim ol yut long strongim rot bilong gutpela Kristen pasin.

Pasto Salum i salim tok amamas i go long ol lain husat i givim helpim long dispela taim. Sampela em Ho Kit, Stanley Pil na Smugglers Inn. Tu bikipela tok tenkyu i go long ol lain husat i bin painim rot bilong go singsing na stap long festival bilong dispela yia.

Em i tok wankain samting bai kamap long neks yia. Na em i ting bai pulim planti moa gospel musik grup na ol arapela manmeri.

Pasto Salum i tok tu olsem festival i bin kamap gutpela tru bilong amamasim wiken bilong planti pipel insait long Madang.

## Bung bilong ol PNG na Solomon Ailan Katolik bisop kamap nau

## VERONICA HATUTASI i raitim

WANPELA bung bilong ol Katolik bisop bilong PNG na Solomon Ailan bai kamap long Mosbi.

Dispela bung bai kamap neks wik, stat long Jun 21 i go inap long Jun 26.

Ol ripot i tok samting olsem 50 Katolik manmeri, ol pater, bruder na sista bilong ol provins tu long PNG bai kamap long bung ya. Orait long namba bilong ol bisop yet, i luk olsem 20 Katolik bisop bilong PNG na Solomon Ailan bai kamap.

Dispela-bung bai stap inap long wanpela wik.

Bikipela toktok bilong bung bai sut long famili laip insait long PNG na Solomon Ailan.

Sios i luksave nau olsem i gat bikipela hevi na senis i kamap long kain sindaun na laip bilong ol famili insait long komyuniti na kantri. Dispela em ol kain hevi bilong marit i bruk, paitim meri, wanem wok bilong ol papamama na ol marit.

Ol bisop bai glasim, skelim na tok tok long ol dispela samting.

Long olgeta yia, ol Katolik bisop bilong PNG na Solomon Ailan i save bung long dispela miting. Na ol i save toktok long ol kain kain samting insait long wok lotu na sindaun bilong man na meri.

## Mosbi daiosis kamapim tok orait wantaim ol Engligen long Nova Skotia

## FAY DUEGA i raitim

GUTPELA wokbung inap kamap nau namel long tupela Engligen daiosis bilong Mosbi na Nova Skotia long

Keneda.

Dispela i kamap bihainim wanpela tok orait em Biso Issac Gadebo bilong Mosbi daiosis i bin kamapim wantaim bisop bilong Nova Skotia daiosis

long Jun 3.

Tupela bisop ya i bin mekim olsem long taim Engligen Sios i holim namba 126 wol sinod bung bilong en. Bung i bin kamap long biktaun bilong Nova Skotia

long Halifeks. Na i save kamap bihain long olgeta tupela yia.

Aninit long dispela tok orait, tupela daiosis nau inap wokbung wantaim na glasim wanem samting ol inap

mekim long strongim Kristen bilip bilong ol memba bilong ol. Na tu long wanem kain rot ol inap bihainim sapos i gat hevi i kamap insait long wok bilong sios.

Long wankain taim tu,

ol bai inap senisim ol memba bilong ol long go raun na lukim wanem samting narapela daiosis i mekim.

Tok orait nau i karamapim ol progrem inap long 5-pela yia.

Na bihain long dispela taim, ol bai bung na skelim wanem kain ol wok kamap i stap. Sapos ol i lukim olsem planti samting i kamap, ol bai skruim yet dispela samting i go.

# Nilkare tok lukaut long ol lida na grup

OL WAN WAN grup na lida husat i laik stapim o bagarapim wok bilong Nesenel Eksekutiv Kaunsil (NEC) bai kisim taim nogut.

Dispela em strong-pela toktok bilong minista bilong Viles Sevis na Provinsal Afeas, John Nilkare.

Mista Nilkare i mekim dispela toktok bihainim planti tok kros na stop-wok em sampela lida bilong kantri, provins na ol wokman bilong

gavman i mekim. Long wanem ol i no amamas tumas long sampela samting em nesenel gavman i mekim.

Wanpela bikpela hevi we i wok long pulim bikpela kros nau i kam long planti lain man na grup em taim NEC i save makim ol edministreta na namba tu bilong ol.

Mista Nilkare i tok sampela taim i go pinis, ol man na grup i hatim NEC long senisim tingting bilong

em. Tasol dispela i no inap kamap nau.

Em i tok ol lida i mas wokbung wantaim long stretim hevi bilong ol pipel.

Long wankain taim tu, Mista Nilkare i singaut i go long ol lida bilong Wabeg, Madang na Morobe provins long wokbung wantaim i go inap long taim nesenel gavman i rausim saspensen bilong ol gavman bilong ol.

## Narapela haus kot op long Kundiawa

MICHAEL KOMA i raitim

NULAIGAUMA haus lain insait long Kundiawa distrik nau i gat haus nupela kot bilong ol.

Samting olsem 200 manmeri na pikinini i bin kamap long dispela bung taim wanpela patrol opisa bilong Kundiawa, Paul Kune i opim haus i kot long Trinde, 9 Jun.

Long taim Mista Kune i opim dispela haus kot, em i tokim ol manmeri long lukautim dispela haus na tu long rispektim ol viles kot mejstret, pis opisa na lo bilong kantri.

Wanpela pater bilong Yobar Katolik misin, Pater Peter i bin go pas long lotu bilong dispela bung.

Ol manmeri bilong ples yet i bin kilim 5-pela pik na wanpela bulmakau long amamasim dispela de.



• *Kisim nogut....* Draiva bilong dispela ka i spak na ai bilong em i paullm em na i abrusim rot na ran i go insait long bus. Dispela em ausait long Kundiawa taun. *Poto: Michael Koma.*

## Toktok kamap yet long K12.5 milien bilong Is Sepik provins

GODFRIED NIAKA i raitim

NESENEL gavman i wok long paitim toktok nau wantaim gavman bilong Korea long kisim K12.5 milien. Na taim nesenel gavman i kisim, dispela mani bai go long Is Sepik provins.

Taim dispela mani i kamap Is Sepik provins, Wewak Taun Komisin (WTC) bai yusim dispela mani long stretim na developim ol eria insait long taun. As tingting em long putim kamap ol komesel haus na tu haus bilong ol manmeri long slip.

Nesenel gavman bai givim 25 pesen bilong mani WTC bai yusim long karim aut dispela wok. Na gavman bilong Korea bai givim 75 pesen. Dispela 75 pesen em dispela K12.5 milien nesenel gavman i wok long toktok wantaim gavman bilong Korea long kisim.

Long lukim olsem dispela samting i

karim kaikai, WTC i stat pinis long toktok wantaim ol papagraun bilong Wewak taun. Dispela em long skulim ol na askim ol long wokbung wantaim gavman na WTC long developim graun bilong ol insait long taun eria.

Siaman bilong WTC, Luke Umbo i tok ol bai yusim tu dispela mani long wokim ol baret long ol eria we i gat wara. Dispela em long rausim wara long dispela ol eria. Na wokim ol komesel haus na haus bilong ol manmeri long slip.

Mista Umbo i tok wok bilong wokim ol baret na rausim wara long ol eria i gat wara bai stat long mun Jenueri long narapela yia. Na wok bilong rausim wara long ol dispela eria bai pinis bihain tripela o fopela yia.

Em i tok WTC yet bai supavaisim wok bilong wokim baret na rausim wara long ol eria we i gat wara. WTC bai kisim planti yangpela man husat i stap insait long Wewak taun long mekim dispela wok.

# WARA PAWA

## OL MAN I SAVE LONG DISPELA JOHNSON.

## LUKIM LIST BILONG OL MAN I WOK HAT TRU!

Royal Papua New Guinea Constabulary

Royal Australian Army and Navy


Surf Life Saving Association of Australia

Queensland Water Police & Solomon Islands Police

Johnson autbot engin i winim olgeta long strong na ron bilong em, wantaim 70 yias rekod bilong kamapim ol nambawan marine engin.

Johnson 25hp, 30hp na 40hp autbot i givim gutpela mak long fuel, moni na

i nogat nois, isi long ronim, ino inap long ros, igat olgeta samting i stap long taim, ol narapela autbot moto ino inap long em. Olsem na ol man na ol bikpela bisnis laini laikim olgeta long marine autbot, i makim Johnson.



Johnson OUTBOARDS




TOBA MOTORS

PORT MORESBY 21 7874  
LAE 42 2611  
RABAU 92 1866

Agents: KIMBE 93 5035 Mt HAGEN 52 1855 WEWAK 86 2784


# YAMAHA

Marine



**NIUELA NAMEL CONSOLE**

I kam wantaim olgeta samtum, mekim olgeta samtum i wok long wanpela hap tasol na i gat ful stia sistem, dispela nupela console inap givim yu bikpela hap bilong lukluk, hevi bilong ol kago bai go long olgeta hap, na yu no inap wari long bot i tantanim nabaut. I gat i stap nau bilong ol 14ft, 19ft na 24ft model long olgeta stua bilong Ela Motors long Kantri.



**HAMAMAS TRU LONG WOKIM LONG PNG**

Sampela bilong ol ekspiriens man stret bilong Kantri i save wokim ol dispela Yamaha FRP Bot long Milen Be Provins aninit long Yamaha Laisens bilong Japan, wantaim ol nupela Senta Console yunit. Mipela i hamamas tru long sapotim ol lain bilong yumi yet husat inap wokim ol top kwaliti samtum em mipela i save yu olsem yu ken hamamas long kisim na pinisim laik wantaim.

**YAMAHA**  
Marine

## Ela Motors







*Daunpasin i win tru...* Mama Teresa bilong Kalkata long India i sindaun arere long bikpela kaunsoi bilong Dublin, Erman Gay Mitchell. Mitchell i bin kolim Mama Teresa olsem "Santu husat i stap lalp yet" tasol Mama Teresa i les long dispela nem.



*Birua bilong soka...* Ol nes na dokta i traim long helpim yangpela ya husat i bin kisim bagarap taim wanpela bom i pairap long wanpela soka pilai graun long Sarievo. Tenpela man i dai na planti i kisim bagarap.



*Las gutbai...* Masako Owada i tok gutbai long ol wanwok bilong em long embasi bilong Japan long Amerika na i go bek long Japan we em i maritim Prins Naruhito long Japan las wik. Nem bilong em bai senis nau i go ong Prinses Masako Owada.



*Pret long sik...* Tupela plisman bilong Amerika i holim tupela man Saina (name) husat i ranawe long kantri bilong ol na go kamap long Kalifonia. Olgeta i pasim maus na nus bilong ol wantaim hap laplap long wanem ol i pret nogut ol lain long Saina i karim nupela sik i kam long Amerika.



*Refuji bikhet...* Sampela yangpela refuji bilong kantri Teki long Jemani i soim bel hevi bilong ol na kalap nabaut antap long wanpela ka. Bikos long las wik, sampela man i bin kilim 4-pela wantok bilong ol.

*Soka trabel...* Ol plisman bilong kantri Nowe i was long sampela yangpela sapota bilong ol soka tim bilong Ingran bihain long ol i bagarapim tru wanpela stua long Oslo, biktaun bilong Nowe.

# Marit insait long famili bilong king na kwin

LONG Jun 9, ol pipel bilong Japan i amamasim marit bilong nupela king bilong ol, Prins Naruhito wantaim meri bilong em, Masako Owada.

Nem bilong Masako nau bai senis i go long Prinses Masako.

Dispela marit bilong tupela i makim wanpela nupela samting long laip bilong famili bilong king na kwin bilong Japan.

Prins Naruhito i kisim ples bilong papa bilong em,

Akihito husat i dai long las yia. Tasol meri bilong em Prinses Masako i no kamap long kain lain olsem em yet.

Papa bilong Masako i wanpela minista nating bilong Foren Afeas long Japan. Na Prinses Masako yet i wok long opis bilong embasi bilong Japan long Amerika. Tasol taim Prins Naruhito i tok long maritim em, Prinses Masako i lusim wok

i go moa long pes 19



• Wanpela bilong ol kain taim em tupela nupela marit bilong Japan i bung. Long lephan em Prins Naruhito na meri em i maritim i sindaun long raithan, Masako Owada.

## Bikpela marit bilong Japan long poto



• Olsem ol yangpela, Prins Naruhito na Prinses Masako i raun long bikpela gaden bilong king na kwin bilong Japan.



Antap: Prinses Masako wantaim tupela lik-lik susa bilong em, Reiko na Setsuko long mun Novemba, 1970. Masako i sindaun long lephan kona. Long lephan: Yangpela Prins Naruhito i asasais raun long Akasaka Imperiel Pales long mun Februeri, 1990. Daunbilo: Prins Naruhito i pilaim vaiola long wanpela musik konsert.



• Prinses Masako i lainim ol pasin bilong bihainim long haus bilong king na kwin bilong Japan.



## Gris bilong kwikmani bai bringim moa hevi bihain

BAI yu bilip sapos mi tok Papua Niugini i wanpela long ol kantri husat i laki long i gat ol bikpela bus insait long wol tude o nogat?

Planti bilong yumi bai tok "yes" tasol yumi 'giaman'. Long wanem ol bikpela bus bilong yumi i wok long pinis isi isi nau, na i no longtaim bai yumi stap olsem ol lain Afrika o blakman bilong Australia long ol ples we i drai na i no gat ol gutpela win, abus, ples bilong wokim gaden na planti samting moa.

Yumi lukluk i go bek long laip bilong yumi long ples we bikpela sapot i save kam olsem long ol kain kain kaikai long bus.

Em hapwok bilong yumi ol man bilong ples.

Nau long planti hap bilong kantri, ol timba kampani i wok long katim ol gutpela diwai bilong yumi.

Taim ol i katim ol diwai, ol abus olsem pisin, wailpik na planti bilas bilong bus bai ranawe tu.

Tasol yu save wanem bikpela hevi o strafe bai kamap sapos yumi wok long bagarapim ol bus bilong yumi o nogat?

Insait long wol nau, planti kantri i wok long mekim bikpela kempen long skulim ol man long ol pe bilong bagarapim bus.

Namba wan samting em ol i kolim long 'Green House Effect' na astingting bilong en i olsem

ples bai drai na hot nogut tru. Na san bai kukim stret olgeta samting.

Narapela samting em olsem, sapos bikpela ren i pundaun, graun bai tekewe na gris bilong graun bai lus. Ol kaikai yumi planim i no inap karim o kamap gut.

Orait, dispela gutpela win nau yumi save pulim tu bai bagarap. Na bai yumi pulim ol kain kain ges o win nogut we i ken kilim yumi.

Na bai yu bilip sapos mi tok ailan bilong yumi i ken sink o i go aninit long solwara?

Yes, dispela em i tru.

Mi laik givim yupela sampela tok piksa. Long wanpela ailan bilong Indonesia ol i kolim long Yamdena, gavman i bin tambu long katim diwai long em. Tasol long 1991, gavman i rausim dispela tambu na ol kampani i go katim diwai.


Ripot i kam long wanpela envairomen grup ol i kolim long SKEPHI i tok dispela ailan nau bai i go aninit long solwara.

Ol timba kampani i tok ol i no asua, ailan i sruk i go aninit long laik bilong em yet. Tasol dispela i no tru. Em draipela giaman stret.

Orait long ailan Tapak Kuda, ol timba kampani i rausim olgeta diwai mango.

I no longtaim i go pinis, dispela

### PNG na DEVELOPMEN



wantaim ELLIOT RAPHAEL

ailan i wok long sruk i go aninit long solwara na taim gavman i lukim dispela, em i kirap nogut long asua bilong em yet long givim laisens long ol timba kampani long katim diwai long hap. Na i askim ol pipel long lusim dispela ailan.

Dispela ol ailan i sruk i go daun long wanem ol rop bilong diwai i save holim graun na taim yu katim olgeta diwai pinis, i no gat moa sapot bilong graun olsem na ailan i sink.

Yumi lukluk long Nu Ailan provins. Klostu olgeta hap fores o bus bilong ol i pinis. Long wanem ol timba kampani i kam katim olgeta diwai.

Long sampela hap tu, ol ston i wok long kam aut long graun. Dispela i kamap tu long sampela hap long Madang na Is Nu Briten tu.

Ating insait long narapela 50 krismas, olgeta gutpela graun bai lus na ston tasol bai stap na bai yumi nogat ples long planim kaikai na hangre bai kilim yumi.

Ol pipel bilong Nu Ailan yet bai tokim yumi olsem ol gutpela abus bilong ol long bus i wok long pinis nau.

Tasol bai ol i sutim tok long husat? Em asua bilong ol yet.

Nau ol bai tok... "Oh, taim ol Korea o Japan i kam stretim tok long katim diwai bilong mipela, ol i no skulim mipela long ol hevi we mipela i ken painim sapos ol i katim ol diwai bilong mipela."

Em nau. Dispela tok i tru tasol bai yu sutim tok long husat? Yumi save guria tru taim yumi lukim pes bilong mani tasol yumi no tanim bek na traim lukluk long ol hevi yumi i ken kamapim long ol pikinini bilong yumi long bihain.

Planti taim ol kampani i save wokim ol rot na giamanim yumi long ol kainkain developmen nambaut tasol long lukluk bilong planti saveman bilong envairomen, dispela ol developmen i bilong grisim ol papa graun tasol.

Em bai i no inap stap longpela

taim.

Long Rabaul na Madang, ol timba kampani i giaman na putim kolta na wokim ol et pos taim ol i stap na katim timba yet.

Orait taim ol diwai i pinis na ol i sruk i go long narapela hap, ol i no moa tingting long i kam bek na stretim ol kolta we i wok long bruk na ol et pos we i sot long marasin.

Ol papa graun i kirap na hatim gavman long stretim ol dispela samting.

Yes, gavman i ken helpim tasol husat tru i mas i go pas. Gavman, ol pipel o timba kampani?

Mi no tok nogat long developmen. Mi laik kantri bilong yumi i mas develop. Tasol yumi mas skelim ol gutpela samting na nogut samting em wok developmen i ken bringim.

Sampela developmen i ken bringim planti gutpela samting wantaim liklik hevi o bagarap tasol sampela developmen bai bringim planti hevi o bagarap na liklik amamas.

Timba em wanpela kain developmen we bai bagarapim stret ol gutpela bus o diwai, abus, graun o ailan bilong yumi na bikpela samting tru em laip bilong yumi.

Yumi gat ol planti narapela gutpela rot long bihainim na painim mani, bilong wanem bai yumi guria long 'kwik mani'?

## Disebel long PNG go antap nau

BEN TAUMAI i raitim

MAN husat i save lukautim wok bilong ol disebel manmeri long Westen Hailans provins, Alphonse Pu i tok tude i gat 4 handet tausen disebel manmeri long kantri.

Insait long dispela namba, 200 em ol meri. Stat long ol liklik, bikpela na i go inap long lapun.

Sik disebel i karamapim aipas, yau pas, maus pas, han o lek nogut, het longlong, olgeta hap bilong bodi i bagarap na ol arapela kain sik long bodi.

Mista Pu i tokaut long dispela samting long namba 11 bung bilong Nesenel Kaunsil bilong ol Meri (NCW). Dispela bung i bin kamap long Madang las wik.

Em i tok Westen Hailans provins yet i gat 15 tausen meri husat i disebel. Na long ol arapela provins long kantri, 10 pesen bilong populesen bilong ol meri i disebel.

Pu i tok taim ol manmeri i painim

bagarap long bodi bilong ol na kamap disebel, ol i save pilim olsem ol i no moa memba bilong komyuniti. Bikos ol i ting olsem no gat man o meri bai laikim ol, lukautim ol, ol i no inap long marit, ol bai no gat mani na planti narapela kain tingting nogut olsem.

Long dispela bung, Mista Pu i givim wanpela pepa i go long Nesenel Kaunsil bilong ol Meri. Dispela pepa i toktok long ol disebel meri insait long kantri.

Olsem na Pu i askim NCW long lukluk na plenim tu wanpela kalenda. Na putim wok bilong ol disebel meri long program bilong ol long ol yia i kam bihain.

"Ol disebel manmeri i gat rait long stap long dispela graun. Olsem na yumi mas luksave long ol na traim helpim ol," Mista Pu i tok.

Sampela senta husat i save mekim wok bilong lukautim ol disebel manmeri em Nesenel Kapitel Distrik, Morobe, Madang, Is Sepik, Isten Hailans, Westen Hailans, Sauten Hailans na Oro provins.

## Em winim 70 krismas tasol Laura strong yet



• Laura Martin wantaim ol sapota bilong em i sanap na wet long provinsal ilektoral opis long givim nem bilong em.

GODFRIED NIAKA i raitim

OL meri long Is Sepik provins husat i bin sapotim Laura Martin long provinsal ileksen i gat bikpela amamas nau. Bikos em i winim ileksen na stap insait long gavman.

Narapela samting tu i olsem Primia Alex Anisi i givim em wok minista bilong lukautim ministri bilong Fainens na Plening.

Meri husat i bin go pas long kempen wok bilong Laura Martin, Evangeline Kaima i tok ol i gat

strongpela bilip long Laura Martin.

"Mipela i bin save olsem sapos em i win long ileksen, em bai kamap namba tu primia o minista bilong Fainens na Plening," Mis Kaima i tok.

Ol sapota bilong em (Laura Martin) i tok ol i gat bikpela amamas olsem driman bilong em long kamap wanpela memba long provinsal gavman i karim kaikai. Na i tok olsem ol bai sapotim em na wokbung wantaim em long dispela taim em i stap olsem memba bilong ol. Na tu memba bilong ol pipel bilong Wewak Taun.

## Tripela grup gen kamap memba bilong Nesenel Kaunsil ov Wimen

TRIPLETA grup bilong ol meri i kamap pinis olsem memba bilong Nesenel Kaunsil bilong ol Meri (NCW). Ol i kamap memba bilong NCW long las wik taim NCW i holim namba 11 bung bilong en long Madang.

Dispela tripela grup bilong ol meri husat i

kamap memba bilong NCW em Wanchef Wimen Asosiesen bilong Markham long Morobe provins, Anglican Wimen Asosiesen bilong Papua Niugini na Yunivesiti Wimen Asosiesen long Yunivesiti bilong Papua Niugini long Mosbi.

Dispela tripela grup

bilong ol meri i bringim nau namba bilong NCW i go antap long 22. Ol tripela grup ya nau i no inap long baim affiliates fi bilong ol i go long provinsal kaunsil long wan wan provins ol i stap long en. Ol bai baim fi i go stret long NCW.

Tasol i bin i gat liklik

hevi i kamap tam dispela tripela grup i kamap memba bilong NCW.

Presiden bilong Morobe provinsal kaunsil bilong ol meri (MPCOW), Galeki Mesa wantaim ol lain bilong em i kirap lusim miting na go ausait.

Long wanem ol i no amamas long NCW i larim Wanchef Wimen Asosiesen i kamap wanpela memba.

"Mi pilim olsem em i no gutpela. Long wanem Morobe provinsal kaunsil bilong ol meri i stap o l s e m m a m a

asosiesin. Na Wanchef i mas kam aninit long em," Misis Mesa i tok.

Loya husat i wok long skulim ol eksekutiv i tok long nau yet, i gat planti hul i stap long mama lo bilong NCW.

Na em i wok bilong ol eksekutiv long lukluk

na tok orait long dispela tripela grup long kamap olsem memba.

Na taim ol i vot, 13 grup bilong ol meri i tokorait long dispela tripela grup i kamap olsem memba. Tinpela i no tok orait na tupela grup i stap tasol long namel.

# Recipe of the Week

## HEREFORD PAI (inap long foapela man)

6

- 2 HEREFORD Corned Beef 200g tinmit
  - 2 namel sais anion, katim i go liklik
  - 2 tispun paura garlic
  - 2 tispun paura kawawar
  - 2 kol shortcrust pastry o bret
1. Praim anion, garlic na kawawar wantaim liklik wel long praipan inap long anion i malumalu.
  2. Putim liklik wel long wanpela 8 ins pai plet.
  3. Putim wanpela shortcrust pastry

- antap long dispela pai plet.
4. Kapsaitim tupela Hereford Corned Beef tinmit antap long anion sup na tanim gut. Bihain putim 2 ti spun kari paura na tanim gut gen.
  5. Putim dispela mit na anion sup i go insait long shortcrust pastri o bret na karamapim.
  6. Putim dispela pai insait long avena na wet inap long 30 minit o inap long taim kala bilong dispela pai i go braun.

7. Yu ken kaikai taim em i hot wantaim ol kumu o salad.



**THE BEST FOR LESS!**

Bai yu no inap Peim moa long K1.00. Mosbi na Lae lasol!



# 1993 Mosbi So win tru

OL LAIN komiti husat i stretim olgeta samting bilong Mosbi so i tok olsem so bilong dispela ya i win tru.

OL i tok tu olsem dispela so i bikpela na i bihainim stret tingting na laik bilong planti manmeri.

Insait long dispela tripela de, samting olsem 100,000 manmeri na pikinini i kamap long so. Long las ya 96,000 manmeri tasol i bin kamap.

I no bin gat bikpela birua long taim bilong so.

Samting olsem 433 plisman olgeta i bin wok long dispela taim tu long lukim olsem no gat hevi i kamap.

Sampela bilong ol em ol nupela plisman long Bomana plis koles, ol risev plisman, trefik, jenerel duti na spesel konstabol.

Bikman bilong ol plisman long so, Thomas Eluh i givim tu bikpela tok amamas i go long ol plisman long gutpela wok ol i mekim.

I bin gat ol liklik bikhet pasin olsem ol spakman i bikhet, ol mangi i stil na ol lain husat i kalapim nating banis long kam insait.

Planti bilong ol dispela bikhet man i kisim taim long han bilong plis. Na plis i kisim sampela i go longwe tru long so graun, lusim ol na tokim ol long wokabout i kam bek.

Sief Inspekta Eluh i tok 6-pela pikinini i lus long dispela taim, tasol ripot i kam long plis i tok, ol i painim pinis ol pikinini ya.

Mosbi So presiden, Harry Lewis i tok em i amamas tru olsem dispela so i kamap gut. Long wanem, planti pipel i kam long lukluk.

Het tok bilong 1993 Mosbi So em "Ol manmeri bilong Papua Niugini stret."

Sampela grup bilong ovasis husat i bin kamap na pulim planti pipel tru em "Sunrise" pawa ben bilong ol blakman bilong Australia na ol lain papa graun bilong Amerika husat i soim sampela kain tumbuna danis bilong ol.

Wanpela grup bilong Australia tu husat i save ron na kalap long motobaik, hos na kapsait krangi tru long ka, i kamap tu long amamasim ol dispela de.

Ol pawa ben bilong kantri yet i pulim planti manmeri tu.

Ol boksen grup tu i kamapim pait bilong ol, ol man i apim ol kainkain hevi samting, sampela lain i soim kung fu stail bilong ol, sampela i kalap long parasut antap long skai na ol kauboi i ron antap long ol bulmakau.



Ol ka tu i resis long dispela taim.

Tasol wanpela samting we i pulim planti manmeri em draipela snek bilong 'Circus Bruno' we ol i lusim long kantri na i go bek long Australia.

Ol bisnis kampani long Mosbi na sampela hap bilong kantri tu i soim ol kain kain samting ol i save salim o wokim.

Egrikalsa Dipatmen tu i soim ol kau bilong ol long so graun we ol manmeri i ken lukim.

Nesenel Brodcasting Komisen tu i wokim wanpela liklik studio bilong em long so graun yet long soim ol manmeri long wanem samting ol i save mekim insait long bikpela opis bilong ol.



Long antap tru lephan kona em ol man i resis long goapim diwai i gat gris na kisim ol samting, orait daunbilo long em, ol yangpela i kalap pinis antap long motobaik na redi long kirapim das. Long hapsait, em ples ol lain bilong Egrikalsa Dipatmen i soim ol kain kain samting bilong ol. Daunbilo gen em wanpela singsing grup bilong Hailans husat i kukim ples long Sarere. Tupela las poto long lephan stat antap: Maureen Dise wantaim liklik Nancy i go aigris long ol singlis em Word Publishing i salim. Na las poto em wanpela yangpela resa bilong Morobe i bilas na soim stret stail bilong em. *Ol poto: Michael Sogiromo na Leo Wafiwa.*



## Luteran sios maski askim papamama long mani

**Dia Edita,**  
Mi wanpela manki long hap bilong Salamaua distrik long Morobe provins. Mi laik autim bel hevi bilong mi long wanem samting mi lukim we i no stret long ai bilong mi.

Mi save lukim olsem Luteran sios long ples bilong mi Gwado i save singaut long ol papamama long ples long givim mani i go long peris o seket.

Mi ken tokaut stret olsem olgeta taim ol lida bilong Luteran sios long Gwado i save askim ol papamama long givim mani. Taim ol i givim mani, sios i save yusim dispela mani long baim pasta.

Taim mi lukim dispela pasin long liklik ples bilong mi, mi kisim wanpela tingting na tok ating dispela kain pasin i save kamap tu long ol arapela hap. Olsem na mi gat wanpela bikpela askim i go long bikpela siping kampani bilong Luteran sios. Yupela ol bikman bilong dispela siping kampani i save tingim tu ol liklik peris o seket bilong Luteran sios tu o nogat? I luk olsem yupela i mas tingting tasol long wok bisnis. Na i no tingim ol liklik peris o seket husat i wok long mekim wok bilong Bikpela Jisas Kraiss.

**Peki Leo,**  
Salamaua Distrik,  
LAE.

## Papa God i no wokim 4-pela sios tasol long dispela graun

**Dia Edita**  
Mi laik sapatim pas bilong Roni Kengi i bin tok olsem ol man i tok olsem Papa God i wokim 4-pela sios tasol.

Sampela man i save tok olsem Papa God i bin wokim 4-pela sios tasol long dispela graun. Na dispela 4-pela sios em Katolik, Luteran, Anglikan na Yunaited.

Olsem na mi laik askim dispela lain manmeri olsem. Long wanem hap tru long

buk Baibel yupela i lukim o ritim i tok olsem Papa God i bin statim dispela 4-pela sios tasol long dispela graun.

Sapos i tru orait bilong wanem na ol Kristen bilong Katolik sios i save kaikai buai, dring bia na tu mekim ol arapela pasin nogut. Orait long Sande ol i save go lotu long rausim dispela sin bilong ol. Tasol bihain long lotu, ol i save go na mekim wankain samting gen.

## Painim Pren

**NEM:** Jibby Boy Marum  
**KRISMAS:** 20 yia (man)  
**ADRES:** P.O. Box 887, Wewak, Is Sepik Provins.  
**SAVE LAIK:** Raitim pas, pilai volibal na ragbitas, go lotu, harim lotu singsing, ritim *Wantok Niuspepa*, lukim televisen na senisim samting.  
**NEM:** Dave Ninginduo  
**KRISMAS:** 17 (man)  
**Adres:** P.O. Box 887, Wewak, Is Sepik Provins.  
**SAVE LAIK:** Mekim pren, ritim *Wantok Niuspepa*, pilai spot, senisim samting na raitim pas.

## Stopim bikhet pasin long Okapa/Lufa

**Dia Edita,**  
Mi wanpela manki Kainantu tasol nau mi stap long Popondetta. Mi laik autim wari bilong mi i go long ol lain husat i bin wokim raskol pasin na stapim wok bilong rot long Lufa na Okapa.

Long namba wan taim mipela olgeta pipel i bin amamas tru long Isten Hailans rijonal memba Aita Ivarato, taim em i tokaut long brukim mani i go long wokim kolta long Okapa/ Lufa rot.

Tasol sampela samting i bin kamap taim ol mas-tamak i go wokim wok long hap. Ol raskol i bin hensapim ol na kilim wanpela wokman.

Ol wokman i bin stapim wok taim wanpela wan-wok bilong ol dai. Dispela i no gutpela pasin. Ol wokman i no wokim wanpela samting long yupela. Ol i wokim samting em bai helpim yumi olgeta pipel long Okapa na Lufa eria.

Mi askim yupela ol lain husat i wokim dispela pasin long lusim dispela pasin nogut. Yupela i no ken tingting long yupela yet. Traim na tingim ol lain pikinini bilong yupela long bihain taim.

Kain sevis olsem rot gavman i givim em i bikpela samting. Na yumi olgeta pipel i mas wok bung wantaim long stopim ol kain bikhet pasin.  
**Paul Camplee,**  
POPONDETTA.

## Ol raskol man nogat gutpela tingting

**Dia Edita**  
Mi no bin amamas liklik taim mi lukim wanpela stori long *Wantok Niuspepa* long mun Mei long dispela yia.

Wanpela ripot bilong *Wantok Niuspepa* husat i stap long Goroka i bin raitim dispela stori. Stori bilong em i tok olsem "Wok bilong wokim Okapa rot na putim kolta em pinis nau." Long wanem sampela raskol man i bin hensapim man husat i wok

long makim graun long wokim gut rot na putim kolta.

Mi yet olsem wanpela manki Okapa, mi gat bikpela sori na wari long dispela man husat ol raskol i hensapim em na kisim ol samting bilong em long mekim wok. Na tu ol arapela samting bilong em. Dispela pasin ol raskol man ya i wokim i no wanpela gutpela pasin. Long wanem man ya i wokim wok long helpim ol na ol pipel

bilong Okapa. Em i no mekim wok long helpim em yet. Narapela samting tu i olsem em i mekim wok long bringim sevis bilong gavman i go insait long Okapa distrik. Na i no long ples bilong em.

Dispela ol raskol man i no gat tru wanpela gutpela tingting long het bilong ol. Tingting bilong ol i olsem bilong ol wel animol bilong bikbus. Ol i no gat gutpela save long stap isi na larim sevis bilong gav-

man i ken go kamap long ples bilong ol.

Yupela dispela ol raskol man i save hait long bus long ples bilong yupela na i save hambak. Sapos yupela ting olsem yupela ol man tru. Na kam aut long taun na mekim kain bikhet pasin, ol plisman bai brukim ol bun bilong yupela.

**Tokisnayo Kamo Piyo,**  
Buka, NSP.

## Ol meri Sepik i no save givim sans Onaim Sabat

**Dia Edita,**  
Mi laik bekim pas bilong Manki Antap i bin kamap long *Wantok Niuspepa* long namba 6 de bilong mun i go pinis (Mei).  
Brata yu tok olsem yu

wanpela mangi antap. Na nau yu stap long Moem Bareks long Wewak. Yu tok olsem yu wanpela manki antap. Na mi no klia tumas. No gut yu wanpela man long skai i pundaun kam daun long graun na i stap long Moem Bareks.

Mi ting olsem yu mas wanpela laspela soldia boi ya. Na tu yu mas wanpela klina boi bilong ol soldia boi long Moem Bareks.

Yu mas save olsem ol meri Sepik em ol lain no gut ya. Sapos yu laik pilai wantaim ol, ol bai tanim bek na pilai wantaim yu. Long wanem mama i karim mipela long taim no

gut. Olsem na ol i gat we na stail bilong ol tu ya. No ken ting olsem yu wanpela soldia boi na stail bilong yu bai winim bilong ol meri Sepik. Mi ken tokim yu stret olsem em bai hat ya.

Brata, gutpela soldia boi o klina boi. Yu mas tingting gut na toktok. No gut yu krangi na toktok bilong yu bai tanim na givim sem long yu yet. Long wanem ol meri Sepik i no save givim sans. No gat tok. Bikos meri Sepik i ken mekim yu sanap silip long Wewak pos opis wantaim hangre.

**Lyn Jay,**  
La Strit, WEWAK.

**Dia Edita,**  
Mi laik bekim pas bilong Alex Jacob long Kimbe. Pas bilong em i bin kamap long *Wantok Niuspepa* long Mei 27 long dispela yia yet.

Long pas bilong em, Alex i bin toktok long pasin bilong skelim ol arapela manmeri. Na em i bin yusim tupela Baibel ves long pas bilong em. Dispela tupela Baibel ves em Matyu 7: 1 na Roman 14: 5-6.

Dispela tupela Baibel ves i toktok long yumi ol Kristen i no ken skelim nating ol arapela brata na susa bilong yumi.

Alex, mi laik tokim yu olsem yu wanpela lotu man tasol yu no save bihainim olgeta tok bilong Baibel. Olsem na i luk olsem lotu bilong yu bai lus nating.


Mi ken tokim yu stret olsem long buk Baibel, stat long Jenesis i go inap long Revelesen, nogat wanpela samting i hait. Olgeta samting i stap ples klia stret, na i tok Sabat o Sarere em i de bilong God stret.

Olsem na yumi mas rispektim dispela de tasol.

**James Quino,**  
SIMBU.



- OL ENSIN BILONG OL KAIN KAIN WOK
- OL PAM BILONG WARA
- OL JENERETA




SV1400P  
K645.00  
(1.0KVA)




SE 800A  
K626.00  
(0.5KVA)

LONG OLGETA HAP, MIPELA I KARAMAPIM OL JENERETA STAT LONG 0.4 KVA LONG TUPELA BIKNEM SAIS. EM LONG 2 INS NA 3 INS. NA OL ENSIN BILONG OL KAIN KAIN I GO INAP LONG 5.3 HP.

OL SUZUKI JENERETA, PAM BILONG WARA NA OL KAIN KAIN ENSIN I GAT NEM LONG PAPUA NIUGINI. BIKOS KOS BILONG OL I NO BIKPELA TUMAS NA I GUTPELA LONG KAIN PLES OLSEM PNG.



SE 500A  
K557.00  
(0.4KVA)



VP20X  
K337.00  
(2 inch)



V160R  
K402.00  
(5.3HP)



**PNG MOTORS**



PORT MORESBY 25 5788 LAE 42 5533 RABAUL 92 2055 MT.HAGEN 52 2100 GOROKA 72 2648

# BISNIS LONG PAPUA NIUGINI

## K8,000 pis projek kirap long Aitape

### KOPRA

Pe bilong kopra i go antap nau long K30 long wan wan tan long dispela yia. Pe bilong ol bikpela depo olsem Mosbi, Alotau, Lae, Madang, Wewak, Kavieng, Toboi, Kimbe na Kieta i stap olsem:

Smoke	K263
F.M.S	K265
Hot Air	K268

Na pe bilong kopra long ol liklik depo i stap olsem:

SAMARAI	Smoke	K231
	F.M.S	K233
	Hot Air	K236

KANDRIAN na NAMATANAI	Smoke	K228
	F.M.S	K230
	Hot Air	K233

BUKA	Smoke	K227
	F.M.S	K229
	Hot Air	K232

FINSCHHAFEN	Smoke	K223
	F.M.S	K225
	Hot Air	K228

LORENGAU	Smoke	K198
	F.M.S	K200
	Hot Air	K203

KEREMA	Smoke	K218
	F.M.S	K220
	Hot Air	K223

KARKAR	Smoke	K200
	F.M.S	K202
	Hot Air	K205

CMB nau bai i no inap long kisim moa prais sapot long Gavman. Dispela i stat long Janueri 1, 1993.

### KAKAO

PRAIS bilong drai kakao long wanwan tan long Rabaul long Mande inap long Fraide long las wik.

Mande	Tunde	Trinde	Fonde	Fraide
7/6	8/6	9/6	10/6	11/6

Pe ol baiya sasim long papa bilong fementri	K713	K711	K719	K719	K707
---	------	------	------	------	------

Sapot prais	K500	K585	K585	K585	K585
-------------	------	------	------	------	------

Prais ol papa bilong fementri i kisim K1213 K1296 K1304 K1304 K1292 Sapot prais bilong kakao long dispela mun em K628 95. Dispela prais i no wankain olsem pe bilong kakao long ol narapela hap bilong kantri.

### KOPI

Pe bilong drai arabika na robusta kopi long wanwan kilogram long Me 24, 1993.

Dispela i karamapim prais bilong kopi long dua bilong faktori, na i no long sait bilong rot.

Arabika :	
Kainantu	K135 to 140
Goroka	K143
Minz na Banz	K122 to 125
Hagen	K125 to 130
Lae	K105 to 140
Mumeng	K140
Wau/Bulolo	K80 to 120
Madang	K110

Ol ripot i kam long Kopi Industri Kopresen. Mipela i no kisim ripot bilong Kundiawa, Wapenamanda, Mendi, Erap, Aseki, na Wasu.

Robusta :	
Is Sepik	K90
Madang	K70

Ripot bilong oi arapela senta husat i save groim robusta kopi i no kamap.

### RABA

Gavien faktori (ESP) - 21 1/2 kg  
Doa faktori (Sentrel) - 36 1/2 kg inap long 39 1/2 kg

### KADAMON

Prais bilong kadamon em A. T. Agri Ejensi Pty Ltd long Madang i tok aut long en i stap olsem; Drai long san em namel long K0.80 na K1.10. Drai long faktori em namel long K6.50 na K8.00. A. T. Agri i lukautim Kobum Spice em i stap long Bundi we planti ol kadamon i save kam long en.

### PRAIS BILONG OL BENSIN

Ex Pump (Wantaim takis)	
Petrol	47.9 toea
Diesel	37.2 toea
Kerosin	43.8 toea

### FELIX RAMRAM i raitim

long Wes Sepik i lukim hatwok bilong ol i karim kaikai long namba tri de bilong dispela mun (Jun).

OL yangpela bilong Aitape distrik Hatwok bilong ol i karim kaikai taim primia bilong Wes Sepik,

Peien Aloitch i opim Aitape Yut Pis Projek. Dispela projek i kos moa long K8,000 long wokim.

Moa long 2,000 manmeri na pikinini i bin kamap na bung long lukim Primia Aloitch i opim dispela projek.

Ol yangpela bilong Aitape i bin wet long samting olsem 5-pela yia

olgeta long lukim hatwok bilong ol i karim kaikai.

Long toktok bilong em, Primia Aloitch i tok em i gat bikpela amamas long ol lain husat i wokbung wantaim. Na karimaut wok na mekim dispela projek i kamap wanpela trupela samting. Primia Aloitch i go moa na givim

bikpela tok tenk yu na amamas bilong em i go long Siau lokol gavman kaunsil. Long tokorait na givim haus bilong kaunsil we i stap long Aitape maket i go long ol yangpela. Long wanem mani we ol yangpela bai kamapim bai go long helpim Provinsal Yut Kaunsil.

Aloitch i tok gavman bilong em i gat tingting na plen long muvimb dispela projek i go long narapela hap graun long Aitape distrik yet.

Tasol bai i no inap long kamap hariap. Na tu inap long taim we ol yangpela i soim klia gavman bilong em olsem ol inap long ranim dispela projek.

Em i tok i tru olsem dispela projek i stap long Aitape. Tasol projek ya i bilong olgeta yut insait long Wes Sepik provins. Aloitch i tok long yia bihain gavman bilong em bai givim wanpela nupela bot wantaim ensin i go long ol yangpela long karim aut wok bilong dispela projek.

• Primia bilong Wes Sepik provins, Peien Aloitch (wantaim sotpela trausis long namel) i rausim nau laplap long dua bilong haus em ol yut bilong nupela pis projek bai stap na wok long en. Dispela projek i stap long Aitape distrik.

### Viles projek soim luksave bilong gavman

PRIMIA Peien Aloitch wantaim namba tu bilong em, Piamnok Lakurengim i luksave long Viles Sevis Skim. Na tupela i putim i go insait wantaim ol arapela samting bilong gavman bilong tupela. Bikos tupela i laikim developmen i mas go long ol pipel long ples.

Namba tu seketeri long Dipatmen bilong Wes Sepik, Sinur Atang i mekim dispela toktok taim Primia Aloitch i opim Aitape Yut Pis projek long Jun 3.

Mista Atang i tok dispela em i namba wan taim wanpela primia na gavman bilong em i gat tingting long bringim mani i kam long

ol yangpela long dispela kain rot. "Sapos i gat pasin bilong wokbung i kamap namel long gavman, bisnis lain, ol yangpela long ples, ol sevis bilong gavman bai ron gut. Na dispela bai kamapim gutpela sindaun namel long ol pipel," Atang i tok.

Em i tok planti taim ol pipel i save gat dispela tingting long wok long strong bilong ol yet. Na planti taim ol wok we ol i laik kirapim long helpim ol yet i save pundaun.

Atang i tokim ol yangpela olsem dispela em i namba wan projek provinsal gavman i statim aninit

long lukaut bilong Provinsal Yut Kaunsil. Na i wankain olsem ol arapela projek. We ol yangpela i no save ranim gut na i save pundaun.

"Ol projek i save pundaun bikos pasin bilong jeles, tok baksait na bel hevi i save stap namel long ol yangpela. Na dispela i save bagarapim gutpela tingting bilong wokbung na ranim dispela ol projek," Atang i tok.

Olsem na Atang i askim ol yangpela bilong Aitape long wokbung wantaim. Na karim aut wok bilong ranim dispela projek long helpim ol yet.



• Ol lain yut bilong Aitape long Wes Sepik provins i kamapim wanpela pilal bilong soim amamas bilong ol long nupela pis projek bilong ol. Bipo ai bilong ol i bin pas long ol kain projek olsem. Tasol nau olgeta samting i klia tru. Ol foto: Felix Ramram.

### PE BILONG AIR NIUGINI LONG PNG TASOL

KISIM LONG I GO LONG	PE BILONG	
	BALUS	KAGO
POM Alotau	K101	K1.01
POM Daru	K117	K1.17
POM Goroka	K114	K1.14
POM Hoskins	K140	K1.40
POM Kavieng	K234	K2.34
POM Kundiawa	K113	K1.13
POM Lae	K95	K0.95
POM Madang	K129	K1.29
POM Manus	K206	K2.06
POM Mendi	K136	K1.36
POM Misima	K155	K1.65
POM Mount Hagen	K132	K1.32
POM Popondetta	K59	K0.58
POM Rabaul	K187	K1.87
POM Tabubil	K189	K1.89
POM Tari	K153	K1.53
POM Vanimo	K234	K2.34
POM Wapenamanda	K141	K1.41
POM Wewak	K180	K1.80

Ol kago em hevi abrusim 16kg bai gat pe

Exchange Rates		
PAPUA NEW GUINEA BANKING CORPORATION		
Bank buys at:	Notes	T/T
Australia	1.5594	1.5289
USA	1.0540	1.0258
UK	0.7045	0.6773
Bank sells at:		
Australia		1.5159
UK		0.6639
USA		1.0290
Solomon Islands		3.1938
China		0.7762
Fiji		1.5505
Hong Kong		7.8084
India		31.304
Japan		107.17
New Zealand		1.8788
Philippines		27.089
Singapore		1.6221
Switzerland		1.4749
Germany		1.8410
Gold rates (in US\$):		
per ounce		\$373.45
per gramme		\$12.01



## Namba wan wokabaut bilong ol meri Buang karim kaikai

EDDIE SAUNDERS i raitim

NESENEL Kaunsil bilong ol Meri (NCW) i bin holim wanpela kibung bilong ol long Madang las wik.

Na long nambawan taim, ol meri long ples Bunag insait long Morobe provins i salim tupela representativ i go long dispela kibung.

Tupela meri husat i makim ol meri long ples Bunag long dispela kibung em Yasom Yatu (presiden) na Rebecca Seleng, wanpela lida bilong ol meri long ples.

Na tu long namba wan taim, ol i salim ol kaikai bilong ol gaden bilong ol long ol stua na skul long Lae siti. Bikos ol manmeri long Morobe provins yet i no save salim ol gaden kaikai long ol stua na skul long Lae. Planti ol gaden kaikai i save kam long ol Hailans provins tasol.

Grup bilong ol meri long ples Buang i save groim ol kaikai long gaden. Tasol i save painim hat tru long salim ol dispela samt-

ing. Tasol long las wik Trinde, dua i op na ol i stat long salim ol kaikai bilong ol. Na wanpela bikpela stua ol i kolim Papindo na Lae Teknikel Koles i baim ol kaikai bilong ol.

"Mipela i gat bikpela amamas tru long Papindo na Lae Teknikel Koles. Long wanem, longpela taim mipela i bin wok long painim maket long salim ol kaikai bilong mipela," Yatu na Seleng i tok.

Tupela meri ya i tok dispela nau bai opim dua long ol lokol fama long groim ol kaikai na salim.

## Ol meri Westen pret long ol rokrok na palai pis

BEN TAUMAI i raitim

PRESIDEN bilong ol meri long Westen provins, Janice Maravila i tokim seketeri bilong Fiseris, Joe Gabut long las wik olsem ol wara long Westen provins nau i pulap long ol kain kain pis i no olsem bipo.

Em i tok sampela pis i olsem rokrok, sampela i olsem palai na sampela i ken wokabaut long tel bilong ol.

Misis Maravila i askim dipatmen sapos ol i save long dispela.

Em i tok taim ol mama i save go painim pis, ol i save lukim ol pis olsem na pret nogut tru. Long wanem, ol i no save lukim kain pis olsem bipo.

Misis Maravila i askim tu dipatmen sapos ol marasin nogut bilong OK Tedi i kamapim ol dispela kain pis.

Dispela olgeta askim bilong em i kamap long namba 11 bung bilong Nesenel Kaunsil ov Wimen long Madang las wik.

Long bekim bilong seketeri i go bek long Misis Maravila, Mista Gabut i tok olsem em i save liklik long ol kain pis olsem long Westen provins we i save kam long Wes Irian long taim bilong ai hara.

Em i tok tu olsem dipatmen bilong em tu i tingting nau long bringim ol pis i go long ol wara long hailens we ol meri long hap tu i ken painim pis long senisim sampela kaikai nau ol i wok long kisim.

Em i tok ol i ken salim ol pis tu long maket bilong painim liklik mani.

Tasol Mista Gabut i tok long nau yet i no gat tupela maket. Na ol manmeri bilong painim pis i save painim hat liklik long salim pis bilong ol.

## Bikpela ren kapsait nau long Momase rijon

GODFRIED NIAKA i raitim

ATING dispela mun (Jun) na mun i go pinis (Me) em i sisen bilong ren long Momase rijon.

Wantok Niuspepa i karimaut wanpela liklik wok painimaut long dispela wik. Na painim olsem long mun Me na long stat bilong dispela mun i kam inap long dispela wik, foapela provins bilong

Momase rijon i gat ren.

Long Wes Sepik long mun i go pinis, klostu i bin gat ren long olgeta de.

Wanpela gavman opisa i tok ren i wok long pundaun long olgeta de. Em i tok ren bai pundaun i go na stap liklik na bihain pundaun gen.

Em i tok long stat bilong dispela mun na i kam inap long dispela wik, ren i wok long pundaun yet.

Ples i luk tudak na klaut i blak olsem yet na stap.

Gavman opisa ya i tok sapos ren i no pundaun long moning o apinun, em bai pundaun long nait.

Long Is Sepik provins, wanpela opisa (meri) bilong Is Sepik Kaunsil bilong ol Meri (ESCOW), i tokim Wantok olsem ren i no malolo long pundaun.

Meri ya i tok long las mun, ren i bin pundaun klostu klostu. Em i

tok long nait, bikpela ren i save pundaun.

"Man, klostu olgeta nait bikpela ren i save pundaun," meri ya i tok.

Na long dispela mun, em i tok ren i wok long pundaun yet. Em i tok long Mande nait (Jun 14), bikpela ren tru i bin pundaun. Na planti hap insait long Wewak taun i pulap long wara.

Long Tunde moning, wara i pulap long Kreer maket. Na ol

manmeri i sanap tasol na salim ol samtung bilong ol. Na long Boram kompaun, olgeta hap i pulap long wara. Ol narapela hap we i pulap long wara em Wewak pos opis. Wirui stua, Nuigo setelmen. Somare maket, sampela hap long ples balus na planti ol arapela hap.

Long Morobe provins, ren i wok long pundaun yet. Stat long las mun i kam inap long dispela mun

Morobe Beer  
**CRACKERS**  
4 BISKETS IN PACK  
+ 1 BISKET  
FREE

DDA SAVI MOR0244

# Wes Nu Briten inap lusim bikpela mani

STEVEN KADIKO i raitim

KAVUGARA welpam setelmen insait long Wes Nu Briten i bin pas sampela taim i go pinis. Na dispela i givim bikpela wari long ol opisa bilong Praimeri Industri, long wanem ol i tok ol bai lusim bikpela mani.

Wanpela opisa bilong Praimeri Industri long Kimbe i tok Kavugara setelmen i save kamapim samting olsem 8000 tan prut long wan wan yia. Tasol dispela namba i pundaun i kam daun long dispela yia. Long

wanem, ol wokman i bin ranawe lusim dispela setelmen.

Ripot i kam long Kimbe i tok ol lain husat i save stap long dispela setelmen i lusim dispela hap. Long wanem, ol papa graun i askim nesenel gavman long rausim ol na givim graun i go bek long ol papa graun.

Tasol ol papa graun i

tok dispela i no tru.

Wanpela mausman bilong ol papa graun na kaunsol bilong dispela eria, Dominic Kuvu i tok dispela hevi i stap long han bilong ol blokman yet. Na i no ol papa graun.

Em i tok moa olsem ol papa graun i bin askim tasol nesenel gavman long baim hap graun em dispela setelmen i

stap long en. Na i no long rausim ol wokman husat i stap long en.

Ol wokman long dispela setelmen nau i stap wantaim ol pren na wantok bilong ol nabaut long Kimbe taun.

Nau yet Nesenel Imejensi Sevis na Wes Nu Briten provinsal gavman i wok long givim kaikai long ol.

Dispela ripot i tok tu olsem Wes Nu Briten provinsal gavman i lusim pinis K17.000

long lukautim ol dispela lain.


Wanpela delegesen bilong Nesenel Lens na Praimeri Industri dipatmen i bin holim wanpela miting wantaim ol lain bilong dispela setelmen i no longtaim i go pinis.

Insait long wanpela pas ol i salim i go long Nesenel Eksekutiv Kaunsil, ol i askim bai nesenel gavman i baim rot bilong ol i go bek long ol provins bilong ol inap long


gavman i stretim ol papa graun.

Tasol wanpela opisa bilong DPI i tok ol opisa bilong Egrikalsa Beng bai karim wanpela wok painimaut pastaim long wan wan blok bipo long ol i baim ol papa graun. Long wanem sampela lain i gat dinau wantaim beng.

Em i tok dispela bai kisim sampela taim na i askim ol lain long setelmen long wet liklik.



Sipsip bilong so...Egrikalsa Dipatmen i bin bringim tu ol dispela sipsip bilong Nu Silan i kam long Mosbi So. Ol dispela sipsip i stap long Goroka. Foto: Leo Wafiwa.



Stailim tasol...Primia bilong Wes Sepik, Peien Aloitch i sanap arere long wanpela sain i tok save long bris klostu long Aitape em Nawa Construction bilong Lae i stretim. Foto: Felix Ramram.

## Lo bilong kisim dinau strong tumas: Mali

PROVINSAL minista bilong Komes na Industri insait long Wes Nu Briten provinsal gavman, George Mali i askim pinis ol beng insait long kantri long senisim ol polisi o lo bilong dinau we i ken mekim isi na helpim ol liklik bisnis manmeri long kisim dinau i kam long ol.

Mista Mali i mekim dispela askim bihain long opis bilong em i wok long kisim planti askim i kam long ol liklik bisnis manmeri bilong Wes Nu Briten long helpim ol long

sanapim ol bisnis bilong ol yet.

Em i tok opis bilong em i no inap helpim olgeta lain husat i askim long helpim long wanem ol i no gat inap mani.

Long dispela as tasol na em i askim ol beng insait long kantri long daunim ol kainkain lo bilong ol na helpim ol liklik bisnis manmeri.

Em i tok tu olsem planti taim ol beng i save toktok tumas olsem ol i save givim dinau long ol kain kain manmeri

tasol taim ol liklik bisnis manmeri i kam askim long dinau, ol i save tok no gat.

Em i tok ol beng i save giamanim tasol ol liklik manmeri long ol gris toktok bilong ol long niuspepa, redio na TV tasol samting tru em ol i no save mekim wanem samting ol i tok long em.

Long wankain taim tu Mista Mali i tokaut long ol pipel bilong Wes Nu Briten olsem em bai toktok wantaim Premia bilong provins, Bernard Vogae long traime kamapim

wanpela kain skim we bai opim rot bilong ol manmeri long kisim dinau mani i kam long beng long kirapim bisnis bilong ol.

Long 1991 na 1992, gavman bilong Robert Lawrence i bin statim kain skim olsem tasol i nogat helpim i kam long beng olsem na dispela skim i no wok gut.

Tasol Mista Mali i tok em bai lukim olsem dispela kain hevi i noken kamap gen sapos Premia Vogae i tok orait long kamapim dispela skim gen.



Sekim gaden...Tripela sumatin bilong Simbu provins i sekim ol gaden kaikai bilong ol. Planti gutpela kumu i save kam long dispela hap. Foto: Michael Koma.

## Egrikalsa skim karim gut kaikai long Simbu

MICHAEL KOMA i raitim

WANPELA egrikalsa skim (AGS) em Simbu

provinsal gavman i bin kamapim sampela taim

i go pinis nau i wok long kamapim gutpela kaikai.

Simbu provinsal gavman i bin kirapim dispela skim long mekim

Agrikalsa beng i luksave long ol wok bilong ol viles fama na givim ol sampela kain helpim.

Kodineta bilong dis-

pela skim, Bal Numapo i tokim Wantok Niuspepa olsem taim gavman bilong Premia David Mai i kirapim dispela skim long 1991, ol i bin putim K400,000.

Em i tok planti fama husat i bin kisim dinau mani aninit long dispela skim nau i wok long lukim gutpela kaikai long ol gaden bilong ol.

AGS i save helpim ol fama long bekim ol dinau bilong ol sapos ol i no bekim dinau bilong ol long beng hariap.

Pastaim long ol fama i kisim tok orait long kisim dinau long statim ol projek bilong ol, ol egrikalsa opisa i save stadi long wanem samting ol i laik kamapim.



\* Foto ya i solim wanpela orens o mull projek long Karamul distrik we Agrikalsa benk i fandim.

## Narapela tok sori bilong Bogoyut



• John Kumono (sindaun long raithan tru) wantaim sampela memba bilong em. Ol i tok ripot i kamap long pepa i no tru.

LIDA bilong Bogoyut Grup, John Kumono i tok sori long ol toktok we em i sutim i go long memba bilong Kerowagi, John Kamb na i kamap long *Wantok Niuspepa* long Me 5, 1993.

Dispela ripot i bin pulim sampela kros i kam long ol yut husat i wokabout wantaim em i kam olsem long

Kokoda Treil.

Long wanpela bekim i kam gen long narapela lida bilong Bogoyut, John Kimagl long las wik, em i tok Kumono i no makim maus bilong olgeta yut husat i bin wokabout long dispela taim. Na i askim Mista Kumono long tok sori tu long Mista Kamb.

# Ol Sepik laik go pas nau long kirapim musik asosiesen

EDDIE SAUNDERS i raitim

OL musikman bilong tupela provins bilong Sepik i pasim tok pinis long kamapim wanpela asosiesen bilong ol.

Dispela tok save i kamap bihain long ol wan wan musikman na meri bilong Sepik husat i stap long Mosbi na ol sumatin bilong musik skul long yunivesiti i bung long Waigani long Sande, Jun 6.

Long bipo i kam inap nau, ol musik man insait long kantri i save toktok long kamapim wanpela musik asosiesen bilong sanap makim maus bilong ol tasol wanpela samting i no kamap.

Olsem na nau, ol musikman bilong tupela Sepik provins yet i laik go pas long dispela kain asosiesen.

Moa long tenpela manmeri i bin kamap long dispela kibung. Na ol i tok long pait strong long lukim olsem dispela asosiesen bai sanap long makim maus bilong ol.

Ol i tok long dispela taim tu olsem dispela asosiesen bai sanap olsem wanpela piksa bilong ol musikman bilong ol narapela provins long bihainim. Na bihain olgeta i ken bung wantaim long kamapim wanpela bikpela asosiesen bilong ol musikman insait long kantri.

Wanpela bikpela hevi ol i bin lukluk long en tu em long 'Kopi Rait Lo.'

Ol i tok ol i laik bai gavman i mas kamapim wanpela lo we ol narapela ben grup i no ken stilim singsing bilong narapela ben grup.

Long wankain taim tu, ol i laik bai gavman i mas stat luksave long ol musikman insait long kantri. Na helpim ol long soim kalsa bilong PNG long ovasis.

Dispela nupela asosiesen i tok ol i toktok strong long dispela samting long wanem, planti waitman i wok long stilim tumbuna samting bilong kantri.

Ol i tok i gat lo tasol gavman i no sanap strong long luksave olsem dispela lo i mas karim kaikai. Olsem na long dispela as, ol i laik bai gavman i luksave tu long kain asosiesen na givim ol na givim sampela wok long han bilong ol.

Wanpela bikpela samting dispela asosiesen i tok em long tok save long ol atis long no ken salim ol yet nating long ol studio.

Ol i tok planti ol studio i laik mekim mani na ol i no save kamapim gutpela musik tumas.

Ol i tok tu olsem gavman i kamapim nating skul bilong ol musikman long UPNG, tasol ol i no kamapim wanpela indastri we ol musik manmeri i ken pait strong long kamapim musik bilong ol yet long pulim mani.

## Nupela muvi bilong Bogenvil stap pinis long vidio

WANPELA muvi em i stori long ol hevi, pen na wari bilong Bogenvil ailan i redi pinis.

Na em i stap long vidio kaset em ol lain bilong Tukana Media Productions (TMP) i wokim. Het tok bilong dispela muvi em *Both Sides of Bougainville*. Long tanim dispela toktok i go long *Tok Pisin*, em i min olsem: Tupela Sait bilong ol hevi long Bogenvil.

I no longtaim, dispela muvi bai kamap long EM TV televisen stesin bilong PNG. Man husat i raitim na wokim dispela muvi em

bos bilong TMP yet, Albert Toro. Na em i bilong dispela ailan yet.

Mista Toro i bin wokim dispela muvi bilong helpim wok em nesenel Minista bilong Stet na Bogenvil Afeas, Michael Ogio wantaim ol lain bilong em i laik mekim long raun bilong ol i go long Yurop. Na dispela em long kliaim planti tingting na paul toktok nau i kamap long hevi bilong Bogenvil.

Mista Ogio wantaim ol lain bilong em bai kam bek long kantri tude.

Muvi bilong *Both Sides of Bougainville* i stori long Bogenvil ailan, Buka na ol arapela liklik ailan insait long Not Solomons provins long bipo yet i kam inap nau.

Wanpela man husat i toktok planti insait long dispela 30 minit muvi em namba wan praim minista bilong PNG, lapun Sir Michael Somare.

Ol narapela man husat i givim stori bilong ol tu em olpela primia bilong Not Solomons, Leo Han-

nett, Sean Dorney bilong ABC long Mosbi, Mista Ogio na bikman bilong CRA kampani, Mosley Moramora.

Muvi i stori tu long namba wan taim ol waitman i krungutim ailan, i go long taim gavman bilong Jemani i rausim Bogenvil long Samoa na givim i go long gavman bilong Australia long lukautim na planti kain senis olsem. Narapela hap tu i toktok long laik bilong ol pipel bilong ailan long bruk lusim PNG pastaim long indipendens

na wok bilong Bogenvil Kopa Limited (BCL) inap long taim ol hevi i kamap.

Dispela muvi i no bin traime long go bihainim na sapotim wanpela sait. Nogat. Em i soim stret kain hevi ol pipel i painim tasol no gat man i kamap na traime long helpim ol.

Planti hap bilong muvi em i bilong Mista Dorney bilong ABC. Em i bin katim ol dispela piksa long taim bilong hevi long ailan. Na ol narapela i bilong TMP yet.

## Marit long Japan

i kam long pes 10

bilong em na i go long Japan.

Aninit long mama lo bilong Japan, Prins Naruhito bai sanap olsem mak o piksa bilong Japan na ol pipel i gat pawa long wanem kain samting em i laik wokim.

Prins Naruhito bai kamap nambawan wokman bilong ol pipel bilong Japan.

Pastaim long Prins Naruhito i askim laik bilong Prins Masako, em i bin bihainim sampela kain rot long painim husat tru bai kamap meri bilong em.

Ol man i glasim gut helt bilong meri, pasin bilong em, save bilong em na planti narapela samting moa we i ken soim wanem meri tru em i gutpela long kamap Prinses o meri bilong Prins Naruhito.

Ol i bin kamap wantaim dispela nem Masako.

Orait, Prins Naruhito i prenim Masako i go inap long las wik taim tupela i marit.

Sampela saveman i tok dispela marit bilong tupela i gutpela tru. Long wanem tupela wantaim i gat bikpela na tu wankain save na marit bilong tupela tu bai stap inap long tupela i dai.

## Moa helpim long fiseris

i kam long pes 2

bilong Saut Pasifik.

Insait long dispela agrimen o tok orait, gavman bilong Amerika bai givim K18 milien i go long Fiseris Forum Ejensi (FFA). Na ol memba kantri bai tilim dispela mani.

Gavman bilong Amrika baim K14 milien bilong dispela K18 milien. Na narapela K14 milien bai kamap long ol praivet pis kampani husat bai painim pis long Saut Pasifik.

Dusava i tok gavman i wok long lukluk na plen tu long kamapim wanpela kain agrimen wantaim ol arapela kantri olsem Japan. Olsem na gavman bai salim wanpela grup i go long Japan long sampela taim long dispela yia. Astingting long toktok na kamapim wanpela agrimen wantaim Japan na ol Saut Pasifik kantri.

## Muvi bilong pasin tumbuna kamap pinis

SAPE METTA i raitim



• Produsa na dairekta bilong muvi, Bike Johnson i soim dispela 30 minit muvi em i wokim.

BIHAIN long samting olsem tenpela krismas, sampela saveman long Skul bilong Wokim Piksa long Goroka i kamapim pinis wanpela muvi long pasin tumbuna insait long kantri na Saut Pasifik rijon.

Dispela em i namba wan taim ol saveman bilong kantri yet i wokim kain piksa olsem. Tasol niusman bilong *Wantok Niuspepa* long Goroka i tok stail ol i bihainim i olsem ol i gat bikpela ekspirians long wokim kain kain muvi.

Dairekta na man husat i kamapim dispela muvi em Bike Johnson.

Ol i bin stat katim dispela piksa long namba 6 Saut Pasifik Festival ov Ats long Kuk Ailan long las yia mun Oktoba.

Tripela kalsa grup bilong PNG, Nesenel Tieta Kampani, Tubusera Yut Grup na Hus Islander bilong Manus i stap insait long dispela muvi tu.

Dispela muvi bai kisim 30 minit na i karamapim ol singsing grup bilong Saut Pasifik, ol kain kain stail bilong kukim kaikai, danis na wokim kaving.



• Bihain tasol long ol i tokaut long muvi, Primia bilong Isten Hailans, Robert Atiyafa i givim bikpela tok amamas long Mista Vol (namba tu long raithan). Orait ol lain husat i sanap lukluk long salt stat long lephan em dairekta bilong Skul bilong Wokim Piksa, Pengau Nengo, olpela dairekta Paul Frame, produsa na dairekta, Bike Johnson na kodineta bilong PNG Festival, Vagi Onnevagi. *Of foto: Sape Metta.*

## Bisnis no gutpela

i kam long pes 5

man bilong PNG i mas wokim na yusim mani long dispela samting tasol.

I gat 6-pela samting em helpim mani Australia bai givim bai lukluk long em. Dispela ol samting em lo na oda, edukesen na trening, helt, wokim rot bilong bringim developmen, lukluk long ol kain resoses olsem agrikalsa, laipstok, fores, fisheries, ol samting bilong solwara, enviromen na konsevesen na praivet sekta. Bikpela sapot bai go long helpim ol samting olsem skul, haus sik we bai helpim olgeta pipel.

Mista Bilney i bin toktok tu long hevi long Bougainville. Em i tok dispela em hevi PNG gavman i mas lukluk long em. Tasol em i tok Australia bai givim helpim sapos gavman bilong PNG i askim ol. Em i tok Australia i no inap lukluk tasol na larim PNG i stretim dispela hevi.

# Tewel bilong Woginara salim sup



BIPO bipo tru i gat wanpela tewel meri i stap long ples Woginara long Is Sepik provins.

Ol pipel bilong ples i save pret bikos tewel meri ya i save kilim ol pikinini bilong ol.

Wanpela nait, mun i bin lait gut tru na olgeta mangi bilong ples i go ausait na wok long pilai i stap. I no longtaim na dispela tewel meri i kam kisim wanpela i go kaikaim em. Tewel i kam bek na kisim narapela gen. Em i pilim swit na i kam bek na kisim narapela gen i go. Mekim olsem i go na long dispela nait, tewel i kilim planti mangi tru.

Long moning ol papamama i stat painim ol pikinini bilong ol raun long ples. Ol i go askim ol arapela pikinini na ol

i tok tewel i kaikaim ol.

Orait long wanpela taim, olgeta bikman bilong ples i bung na pasim tok long kilim tewel meri. Ol i tingting long digim hul na taim tewel i kam, em bai pundaun i go insait long dispela hul na bihain ol bai sutim em long spia.

Long narapela de, ol bikman i bungim olgeta bikpela pikinini boi na tokim ol long digim hul. Ol i digim hul pinis, orait, ol i putim sampela drai diwai antap long hul na putim ol drai lip antap gen.

Klostu ples i laik tudak na ol bikman i tokim ol meri long kukim ol ston long paia. Orait, ol i singautim ol mangi na tokim ol long pilai longwe long hul nogut ol i pundaun i go insait.

Ol lain long ples i stap na lukim mun i kam antap na i lait gut tru. Na ol liklik mangi i lusim haus bilong ol na go daun na pilai. Tewel meri i no save long wanem samting ol lain long ples i wokim.

Taim ol mangi i pilai i stap, ol man i kisim ol spia wantaim banara na was long sait i stap.



Ol i laik lukiuk nogat ai bilong ol i pas stret long dispela tewel meri. Tewel i lukim ol mangi i pilai i stap na laik go kisim wanpela mangi. Tasol abrus na em i go daun stret long

dispela hul. Kwiktaim ol man i kisim spia na sutim em. Ol meri i kisim ston i hat i stap na putim antap long em na kilim em.

Bihain long dispela, ol papamama bilong

ples Woginara i amamas tru. Bikos ol i no moa pret long tewel na ol pikinini bilong ol i stap amamas.

Philomina Rayson, KIMBE.



WANPELA taim Kanage raun wantaim ol Pils Mobail skwat na sampela PNGDF soldia long Arawa taun. Na taim em i save lukim ol meri Kawas, boi save kirapim das stret. Mekim i go na wanpela taim wanpela meri tudak i dal na daunim spet stret long Kanage. Het bilong em tu i raun olsem masin gan bilong ol BRA. Bikos em i lukim Kanage i karim narakain gan stret na em i ting em wanpela komanda bilong Mobail skwat. Samting tru em Kanage wanpela ainman bilong ol resisten grup paltman. Orait dispela meri Kawas i go long haus na raitim pas long Kanage. Pas bilong em i go olsem: "Dia Kanage. Aro na gutu nait rongo yu. My name is Anna Pirls (Anna Pills). Pestaim i see yu, i sem. Seken taim i see yu, i don sem. If yu ting i lie yu, i hones tu God. If yu kam tu Hongara, yu will spia mi strong. Signing off with lots of love and beautiful flowers." Em nau dispela meri kirap drolm ol plawa na penim ol long kain kain kala olsem ret, yelo, grin na blu. Tasol ol narapela hap em i penim long biak. Long wanem, Anna Pills i bilong ples tudak ya.

Comms Members, Buka allan, N.S.P.

## Hapman bilong bia tasol poket gat hul



Dia LAIPLAIN,

Mi yet i luksave olsem em i taim nau mi lusim pasin bilong dring bia tumas.

Long olgeta potnait, mi save go long ol hotel long dring na mi no save tingting bek long famili bilong mi. Taim mi pinisim olgeta mani long bia na kam bek long haus, mi save painim olsem mi no gat moa mani bilong lukau tim meri na pikinini bilong mi.

Mi laik painim sampela rot bilong helpim mi long lusim dispela pasin. Long wanem meri bilong mi save wari na sori long pasin mi mekim.

IRRESPONSIBLE

Dia PREN,

Mipela i amamas olsem yu yet i luksave long hevi bilong yu na yu laik painim helpim long lusim dispela pasin.

Mipela i bilip olsem wanpela man husat i ken helpim yu long painim dispela nupela gutpela sindaun em meri bilong yu. Long wanem em yet i soim olsem maski yu man bilong dring, em bai stap pas wantaim yu yet.

Tu, meri bilong yu i wanpela tasol husat i stap klostu na yutupela i wanpela bodi.

Mipela i ken tokim yu stret olsem em bai givim yu moa sapot na helpim yu gut tru sapos yu tokim em olsem yu laik lusim pasin bilong dring.

Taim yu save raun dring long ol hotel, yu save ting olsem dring em i wanpela rot bilong stretim ol wari o hevi bilong yu. Na taim ol poro bilong yu i skrapim bel bilong yu long dring, yu save baim planti na dring planti bia. Long wanem yu laik bai ol poro i tok yu bikman na yu man tru bilong dring bia.

Tasol taim yu kam kamap long haus bilong yu, yu stat pilim olsem pasin yu mekim long taim yu dring i nogut. Bel bilong yu i pen, long wanem yu no moa man tru olsem ol poro bilong yu i tok long taim bilong dring.

Famili bilong yu tu i no givim yu rispek o tok amamas, long wanem ol i pilim olsem yu no inap sapotim ol moa.

Tasol nau yu laik senis, mipela i pilim olsem meri bilong yu i ken givim yu nambawan helpim stret. Yutupela i ken toktok wantaim long dispela nupela laip yu laik bihainim bilong painim trupela amamas, pasin bilong laikim yutupela yet na bai famili bilong yu i ken luksave olsem yu strong bilong ol.

Na sapos pasin bilong yu i senis, sindaun bilong yu long bihain bai gutpela tu.

I gat tupela rot bilong yu long bihainim sapos yu laikim dispela nupela sindaun.

Wanpela em yu mas gat taim bilong sindaun wantaim famili bilong yu, na tu ol pren bilong yu. Mipela i askim yu long sindaun wantaim ol poro bilong yu husat i lain bilong dring bipo tasol nau ol tu i senisim pasin na i laik bihainim nupela rot.


Yu mas traim long kamapim wanpela liklik baset long potnait bilong yu, na traim long no ken go bek long olupela pasin bilong dring bia tumas. Long wanem, yu yet i luksave long ol kain hevi em dispela pasin i save bringim long laip bilong man.

God i wokim yu olsem piksa bilong em yet. Olsem na mipela i pre bai yu wok hat long bihainim dispela nupela rot yu laikim long en. Na i no long go bek long pasin bilong dring.

Mipela i bilip tu olsem taim yu wok long go bek long stretpela pasin, prea, bung wantaim ol narapela Kristen na givim biknem long God husat i as bilong olgeta samting, bai strongim yu long bihainim nupela pasin.

MI LAIPLAIN.

Salim ol hevi na wari bilong yu i kam long LAIPLAIN, P.O.Box 6047, Boroko. Yu ken ringim mipela tu long telipon namba 260011. Mipela i no inap autim trupela nem bilong long hia



Papa bilong PNG wel...Minista bilong Maining na Petroleum, Masket langallo i sainim nau buk bilong Frank Rickwood. Dispela buk i toktok long wok bilong painim wel long Kutubu. Het tok bilong dispela buk em: The Kutubu Discovery. Sampela man i save kolim Rickwood tu olsem hapman stret bilong painim wel long PNG. Foto: Dominic Kakas.


# WIN UP TO K25,000

## with your FREE Instant Lottery Ticket!

Because when you buy K10 worth of fuel or oil at any participating Mobil Service Station you'll get a FREE Pacific Instant Lottery ticket that could win you a K25,000 prize!

Hundreds of prizes of K500, K250, K25 and below also to be won!

Prizes of less than K25 can be claimed at your Mobil Station. All major prizes to be claimed direct from Pacific Instant Lottery.



**WHILE STOCK LASTS AT THESE  
MOBIL SERVICE STATIONS NATIONWIDE!**

Ela Beach, Badili, Lahara, Islander, Gerehu, Erima, Markham Rd., Omili, Coronation Drive, Madang, Rabaul, Kundiawa, Kagamuga, Mt. Hagen, Goroka, Kainantu, Alotau, Ramu.

# Mobil

The No.1 Team

Pacific   
Instant  
Lottery



# PABLIK NOTIS

Sapos yu laik advertais, telepon 25 2500 na askim long

PH: Miri Aiori - Ext. 203  
John Iagata - Ext. 215  
Kosinto Fosagu - Ext. 216  
Ext. 202

## - LUKIM TOKSAVE -

Isi pe long ples bilong slip  
Ol spot Klap  
Gavman Dipatmen


Yupela i kam raun long Mosbi?

Kam stap long  
Kundu Haus  
Wonga Hostel  
Five Mile

Pe i karamapim dina, bet na brekfes  
Single - K40 wan de  
Twins - K65 wan de

Resevesen telipon: 23 1164

## THE TIMES &



Call today on  
25 2500 or  
fax 25 2579.



## FRI BAIBEL KOS YU KEN KISIM SKUL LONG SALIM PAS

Salim num na edres long:  
WORLD BIBLE SCHOOL, Dept. PNG4  
P.O. Box 9346, Austin, TX 78766 USA



INTENEL REVENU KOMISEN  
BUK-MEKING EKT 1974



Mipela i wet nau long kisim aplikesen bilong ol lain husat i laik kisim laisens bilong wokim bisnis bilong hosres (Bookmakers Licence) long dispela tupela senta:

TABUBIL, Westen Provins  
na  
GOROKA, Isten Hallans Provins.

Husat i laik kisim moa tok save o ol aplikesen fom, salim pas i kam long:

Commissioner General of Internal Revenue,

P.O. Box 502,  
PORT MORESBY,  
National Capital District.

Sapos nogat, yu ken toktok wantaim em long telipon namba 22 6718.  
Las de bilong kisim ol aplikesen em long Jun 30, 1993.

MI NAGORA BOGAN, MBE.  
Komisina Jenerel bilong Intenel Revenu.



## DEPARTMENT OF MINING & PETROLEUM

GEOLOGISTS (GSM 20)  
CLASS 1 (SOI)



### DUTIES:

Undertake field and laboratory work associated with geological mapping, mineral exploration and mineral resource assessment.

### QUALIFICATIONS:

Possession of BSC degree majoring in geology. Personal physical robustness is a necessity.

### CONDITIONS OF EMPLOYMENT:

This position is open to PNG citizens only. A salary range of K7,500 - K8,830 per annum plus DMA and rental allowances. Standard conditions of employment by DPM apply.

Note: No housing is provided.

TECHNICAL OFFICER  
CLASS 2 (GSM 13)

### DUTIES:

As a geological assistant, and undertake office and field associated tasks associated with: constructing and managing field camps, preparation of rock specimens of laboratory analysis in PNG and abroad, operating computer, mineral exploration and geological mapping.

### QUALIFICATIONS:

Possession of grade 10 certificate or above. Possession of an approved technical certificate, or possession of extensive work experience in a laboratory or in field camp construction and management, and familiar with computer and data acquisition for geological databases.

### CONDITIONS OF EMPLOYMENT:

This position is open to PNG citizens only. A salary range of K7,560 - K7,910 per annum plus DMA and rental allowances. Standard conditions of employment by DPM apply.

Note: No housing is provided.

TECHNICAL OFFICER  
CLASS 2 (GSG 9)

### DUTIES:

Assist with the provision of engineering geological and hydrogeological services relating to Departmental mapping projects and research, mining schemes and request from other government departments. Duties will include field work, supervision of drilling and pump testing, assisting in the laboratory testing of soils and rocks, data acquisition for geological databases and assisting in the preparing of reports and maps.

### QUALIFICATIONS:

An approved certificate from a recognised college and where a component of the training has included geological studies.

### CONDITIONS OF EMPLOYMENT

This position is open to PNG citizens only. A salary range of K7,560 - K7,910 pa plus DMA and rental allowances

Note: No housing is provided -Closing date July 02, 1993.  
For application forms and further information, contact:

DIRECTOR  
Geological Survey of PNG P. O. Box 778, PORT MORESBY  
Tel: 22 4230, 22 4226, 21 2422 Fax: 211360



*Raithan kona:* Kain stail bilong ol meri long Mosbi soka resis tu i stap yet. Hia em susa bilong PTC long raithan i sutim bal long nus bilong su na birua bilong em i siksti i kam bilong rausim bal. *Long antap:* Netbal resis tu i wok long kukim ples olsem susa ya long antap i soim kain liklik stail bilong em long salim bal.



*PTC lusim waia...* I luk olsem birua pilala (givim baksait) i no inap tru long stapim pawa bilong ol boi PTC. Olsem na bal i lusim pinis lek bilong man na abrusim olgeta mak long kona.



*Fultaim wok...* Em ol hapman na man bilong wok stret. Oltaim ol i save taitim bun long kisim mani long dua bilong Bisi-ni soka graun taim ol man, meri na pikini-ni i go lukim pilal. Mani ol i kisim i save helpim PMSA long stretim pilala graun na ol arapela samting. *Poto: David Rom.*



# Winfield Kumuls

**SATURDAY 19TH JUNE**  
**LLOYD ROBSON OVAL - PORT MORESBY**  
**FIJI vs KUMULS**

PORT MORESBY SOCCER ASSOCIATION WEEKENDS DRAWS WEEK NO. SIX

Saturday June 19, 1993.

Table with columns: Time, Division, Ground, Team, Vs, Team. Lists soccer matches for Saturday June 19, 1993.

Sunday June 20, 1993.

Table with columns: Time, Division, Ground, Team, Vs, Team. Lists soccer matches for Sunday June 20, 1993.

NCD VOLLEYBALL ASSOCIATION

Week: Twelve (Round 3) Date: 10 June 1993 Venue: Sir John Guise Indoor Complex

Court 1 table with columns: Time, Match Nos., Division, Grades, Teams, Officials. Lists volleyball matches for Court 1.

Court 2 table with columns: Time, Match Nos., Division, Grades, Teams, Officials. Lists volleyball matches for Court 2.

Court 3 table with columns: Time, Match Nos., Division, Grades, Teams, Officials. Lists volleyball matches for Court 3.

MATCH COMMITTEE

NCD VOLLEYBALL ASSOCIATION POINTS LADDER AS AT 05/06/93

Table with columns: MENS A GRADE, MENS A RESERVE, WOMENS A GRADE, WOMENS A RESERVE. Lists volleyball team performance statistics.

MADANG NETBALL ASSOCIATION DRAW ROUND TWO GAME ONE

Saturday June 19, 1993.

Table with columns: TIME, FIXTURES, DIV, CTS. Lists netball fixtures for Saturday June 19, 1993.

PORT MORESBY SEVENS POINTS LADDER

Table with columns: Team, Points. Lists the points ladder for Port Moresby Sevens.

HOODS SPORT ASSOCIATION DRAW JUNE 21 - 23

Soccer/Netball Draws

Detailed schedule for Hoods Sport Association draws from June 21 to 23, including soccer and netball matches.

BOMANA SOFTBALL ASSOCIATION DRAW

Diamond One Sunday June 20, 1993.

Table with columns: Time, Grade, Fixture, Vs, Fixture. Lists softball fixtures for Diamond One.

Diamond Two

Table with columns: Time, Grade, Fixture, Vs, Fixture. Lists softball fixtures for Diamond Two.

NCDC BASKETBALL LEAGUE DRAW REVISED DRAW FOR ROUND ONE

Table with columns: 21/6/93 Monday, 23/6/93 Wednesday, G3 WK3, G3 WK3. Lists basketball fixtures.

CENTRAL DISTRICT FOOTBALL LEAGUE 1993 DRAW

Round 4 - Under 13

Saturday 19/06/93

Table with columns: Time, Teams, Ground, Umpires. Lists football fixtures for Round 4.

Sunday 20/06/93

Under 13

Table with columns: Time, Teams, Ground, Umpires. Lists football fixtures for Sunday 20/06/93.

RESULTS FOR ROUND 3 05/06/93 - Under 13

Table with columns: Team, P, W, L, D, F, A, %, Pen Pts. Lists results for Round 3.

LADDER for Under 13 Grade to Round 3

Table with columns: Teams, P, W, L, D, F, A, %, Pen Pts. Lists the ladder for Under 13 Grade.

PORT MORESBY SCHOOLS SOCCER ASSOCIATION 1993 LEAGUE FINALS

Sat. 19th June

Table with columns: Under, Team, Team, Time. Lists school soccer fixtures for Saturday 19th June.

Sunday 20th June

Table with columns: Time, Team, Team, Time. Lists school soccer fixtures for Sunday 20th June.





• Dispela meri wantaim bal i traime long rausim bal i go long wan-pilaia bilong em. Dispela em netbal stail bilong ol meri Mosbi.

# Neks Momase tonamen bai karamapim nau olgeta divisen

BEN TAUMAI i raitim

OL eksekutiv bilong Momase rijonal soka tonamen i tingting long holim tonamen bilong olgeta divisen long sampela yia bihain. Long neks yia ol bai larim ol meri i kik long namba wan taim.

Momase soka rijonal dairekta, John Peka i bin tokaut long dispela samting taim em i givim aut prais i go long ol tim na pilai.

Peka i tok, eksekutiv bilong em i givim tok orait pinis long ol meri, anda 19, anda 17 bihain ol i laikim anda 10 tu long kik. Em i tok dispela i wanpela rot bilong bungim ol pipel wantaim long kamapim gutpela prensip insait long Momase rijon. Wan kain tu long kirapim wok bilong soka long rijon.

Ol bai larim pastaim ol meri long kik long neks yia na sapos ol i lukim olgeta samting i wok long kamap gut ol bai askim ol arapea divisen tu long kik. Dispela samting bai no inap kamap nau tasol em bai kisim ol samting olsem tripela yia long larim olgeta divisen long kik.

Tasol bikpela samting Peka i laikim olgeta senta long painim mani bilong ol yet long kamapim kik bilong wan wan divisen. Bihain ol i ken lukluk long kamapim kik bilong ol long rijonal tonamen.

Wewak bai lukautim resis bilong neks yia na sapos Wewak i gat hevi ol lain bilong Morobe Kantri bai lukautim.

Interim Seketeri bilong Wewak Soka Asosiesen Andrew Kai i givim bikpela tok amamas i go long ol eksekutiv bilong Momase rijonal tonamen long makim Wewak olsem ples bilong holim kik long neks yia.

"Mi yet mi amamas tru olsem na mi yet bai go pas long redim olgeta samting," Kai i tok.

"Mi ting olsem kain senta olsem Vanimo na Vanimo Kantri bai amamas nau long kam kik long wanem ol bai painim isi long kam."

Namba tu seketeri bilong Sospel Sevises, Ivan Mulul husat i bin makim maus bilong edministrata Wep Kanawi i bin askim ol pilai husat i no stap long skwat long treing na pilai strong long neks yia. Dispela tasol i ken givim sans long stap insait long skwat sapos ol i no stap long skwat bilong dispela yia.

## Win bilong GFC na Rapatona stap long Maxwell na Moses Kepu

WINIS MAP i raitim

BIKPELA kik bilong A gret long Mosbi soka long dispela wiken bai stap namel long GFC na Rapatona.

Dispela tupela tim i gat wankain stong na

ol i save wokim ol arapea tim i het pen taim ol i pilai wantaim ol. Tasol long dispela wiken bai yumi lukim husat long tupela i strong moa long narapea.

Pilala bilong GFC husat i save go pas long brukim umben bilong ol birua tim em Kelvin Maxwell. Long dispela wiken Maxwell bai traime boim umben bilong Rapatona long lukim sapos em i nap sutim gol.

Sapos Maxwell i pilai

kaskas long man bilong lukautim umben bilong Rapatona, Moses Kepu bai no inap marimari long em. Long paulim ai bilong Kepu, Maxwell mas oltaim kikim bal long 18 yads.

Rapatona i gat ol gutpela midfil pilala long resis bilong Mosbi soka. Man husat i save holim stia bilong Rapatona long midfil em Geoff Emang. Long dispela wiken Emang bai kisim helpim i kam long Enoch Pokorap,

Panin Karrol na Chikur Chalan.

Tasol GFC bai traime katim rot bilong ol dispela lain bipo long ol i go insait long eria bilong GFC. Lesley Bagaga yet bai go pas long midfil bilong GFC na stapim ol boi Rapatona. Luie Lui tu bai givim sampela sapot long abrusim Emang wantaim ol lain soldia bilong em long traime setim Maxwell long skoa.

1 go moa long pes 26

## Boksen asosiesen stat long Wes Nu Briten

STEVEN KADIKO i raitim

OLPELA sempion boksa bilong Papua Niugini, Alphonse Wakore i statim pinis wanpela boksing asosiesen long Wes Nu Briten provins.

Wakore yet i presiden bilong dispela nupela asosiesen na em yet bai kamap namba wan trena na kosa.

Ol i bin statim Wes Nu Briten Boksing Asosiesen (WNBBA) long Me 25, 1993. Na i gat 7-pela komiti memba, ol dispela komiti memba em presiden, namba tu presiden, seketeri na narapea 4-pela komiti memba.

Wakore i tok, astingting bilong WNBBA em long kamapim boksing insait long provins. Na ol pipel i ken luksave long boksing olsem ol arapea pilai

em ol i save pilai long provins.

Nau yet i gat 4-pela klap ol i kamapim pinis. Ol dispela klap em Kimbe Y.C Klap, Royals Boksing Klap, Malangan Klap na Kimbe Bokseing Klap.

Boksing i wok long pulim planti yangpela manki long joinim ol dispela klap. Na i luk olsem boksing bai kamap wanpela bikpela pilai na bai kamap strong tru insait long provins.

"Mipela i plen long salim ol boksa bilong mipela i go long Nesenel Boksing Sempionsip em bai kamap long Mosbi long Septemba 16, 1993," Wakore i tok.

Tasol Wakore i tok bipo long ol i salim wanpela tim i go long Mosbi, WNBBA bai holim wanpela tonamen bilong ol long Ogas. Dispela em wanpela mun pastaim long nesenel boksing seponsip i kamap. Long dispela provinsal tonamen ol bai makim wanpela tim long go long Mosbi.



• Dispela pilala bilong Togelu long namel i salim bal i go long poro bilong em. Taim tupela Muurat pilala husat i sanap longwe i no inap stapim em. Dispela em kik bilong 7-asait em i bin kamap long Mosbi long las wiken.

# PTC redi tasol long rausim waia bilong Sobou

**MICHAEL SOGOROMO i raitim**

WANPELA gutpela kik long Lae long dispela wiken bai stap namel long Titan Sobou na 1992 sempion, Isifon PTC. Dispela pilai em i las pilai bilong raun wan.

Dispela tupela tim i save pulim planti ol sapota long go lukim pilai. Bikos pilai tupela i save kamapim em i gutpela na ol man i laik lukim pilai.

Long las yia tupela tim wantaim i bin kik long gren fairal na ol waia boi bilong PTC i lusim olgeta waia bilong Sobou na winim pilai. PTC i bin winim Sobou na kisim maina primia. Tupela tim i bung ken long gren fainal na PTC i nekim ol long wanela gol na autim sil bilong Lae soka resis.

Olsem na Sobou i gat bikpela laik tru long bekim dinau bilong las yia. Sobou i laik soim PTC olsem ol i no tim nating na ol bai banisim umben na stapim PTC long brukim kiau. Pilai na kosa

bilong Sobou, Kekeng Naku i tok ol bai traime long banisim PTC na stapim ol long skoa.

Naku yet bai lukautim midfil na em bai kisim helpim long ol yangpela pilai olsem Harrison Kamake, Richard Daniel na John Laskam.

Boi nogut bilong Vanutu Leo Paul bai pilai straika wantaim Albert Malagian. Tupela bai pilai strong na sutim gol long bekim dinau bilong las yia. Banis bilong Sobou bai stap long lukaut bilong Zacchius Kawambara, Godfred Kame, Scotty Kababa na Kepas Basawe. Goli, Runa Geyasa i mas was gut long ol strongpela kik bilong ol birua tim.

Ol boi PTC i gat namba tu long pilai, olsem na ol i no inap larim Sobou i winim pilai isi tru. Ol i gat gutpela pilai olsem tupela brata Raymond na Giddie Nasa. Dispela tupela man i bin makim Papua Niugini pinis na ol i gat ekspirians long pilai. Tupela straika, Nickolas Pui na Chris Yanga bai go pas long PTC na brukim umben bilong Sobou.

Tupela tim i gat wankain strong tasol sapos wanela tim i pilai gut em bai winim pilai.

## Win bilong Niuspepa kampani helpim ol GFC na... meri Buka wantaim yunifom

i kam long pes 25

Wanpela man husat i no inap amamas long tupela straika bilong Rapatona, Lesley Waiwai na Paul Moang em Abel Iaitia. Iaitia husat i save sanapim strongpela banis long maus bilong umben bai no inap amamas long lukim bal i go pas long umben.

Em bai tokim ol fulbek long sanapim banis long ples we em i lukim ol birua pilai inap brukim na sutim gol. Olsem na Molen, Mali na Michael Wawi i mas harim tok bilong em.

**KRIS HAKENA i raitim**

WANPELA tim bilong ol meri husat i save kik long Buka Soka Asosiesen (BSA) bai no inap wari long painim yunifom bilong pilai.

Lapun ANS soka klap i bin kisim wanpela set yunifom long Word Publishing Kampani. Maketing menesa bilong kampani, William Kotson i bin givim dispela ol yunifom i go long presiden

bilong klap, Luke Tama na kepten Diana Tsirikou.


Tsirikou na Tama i bin amams tru taim Kotson i givim dispela ol yunifom. Tupela i givim bikpela tok amamas i go long Word Publishing Kampani long givim kain helpim olsem.

Word Publishing Kampani i save wokim *Times, Wantok, PNG Business na Weekend Sport* niuspepa. Ol i

save salim sampela niuspepa i go long Buka, long helpim ol pipel long luksave long ol samting i wok long kamap ausait long ples bilong ol.

Kampani i no laik salim tasol pepa tasol em i laik helpim tu ol pipel. Olsem na kampani i givim dispela ol yunifom bilong pilai i go long Lapun ANS soka tim.

Wantaim dispela nupela yunifom, Lapun i kamapim pinis sampela gutpela kik long Buka.



• Dispela tupela pilai i resis tru long kisim bal. Olsem na tupela i wok hat tru long rausim bal long birua pilai. Dispela em stail bilong Kimbe soka.



Stail bilong Goroka.... Dispela tupela pilai i resis long kisim bal. Dispela tupela tim i bin kik long Goroka long las wiken.

# Wewak salim bikpela tok lukaut . . .

RODNEY KAMUS i raitim

. . . na winim pinis 6-pela ples insait long Momase soka skwat

PLANTI manmeri i bin kamap long lukim Momase Rijinol soka tonamen long Madang. Na ol i tok tupela nem soka senta Lae na Madang i mas lukaut long Wewak soka tim long ol yia i kam bihain.

Ol manmeri i mekim dispela toktok bihain long ol i lukim pilai bilong ol yangpela boi Sepik husat i kam kik long dispela tonamen.

No gat wanpela bikpela man i bin stap namel long ol yangpela pilaia bilong tim bilong Wewak. Ol yangpela tasol i stap long tim. Na krismas bilong ol i aninit long 19 yia.

Ol yangpela bilong Wewak i bin putim kamap wanpela stail na gutpela kik tru. Na i winim tru tupela biknem soka senta em Lae na Madang. Ol i

soim strong bilong ol long ron i go i kam. Na tu gutpela na smatpela wok bilong ol long lukautim bal na salim i go i kam namel long ol yet. Ol i mekim olsem na ol selekta i opim ai bilong ol na mangalim tru pilai bilong ol.

Sapos yu skelim ol pilai bilong tim bilong Wewak wantaim ol arapela tim, bai yu lukim olsem ol arapela tim i

gat ol bikman. Na yu ken tok stret olsem dispela ol bikman i save pilai long primia divisen. Tasol ol yangpela bilong Wewak, bai yu tok olsem ol i save pilai long anda 19 divisen.

Ol yangpela pilaia bilong Wewak husat i bin putim kamap gutpela na strongpela pilai em Gordon Kumang, Harry Numbuk, James

Kiapi, Peter Yapi na Bryan Siria.

Wanpela pilaia bilong Wewak i tok olsem Wewak i no bin statim soka sisen bilong dispela yia hariap. Olsem na ol i no kamap wantaim wanpela gutpela na strongpela tim. Na planti yangpela pilaia bilong ol i no gat gutpela ekspiriens. Tasol ol i kisim nau ekspiriens long kik

resis insait long dispela kain ol bikpela tonamen.

Kain strongpela na gutpela pilai bilong ol yangpela bilong Wewak i winim tingting bilong ol oganaisa bilong tonamen. Na ol i

givim ol wanpela tropi long kamap olsem "nambawan" tim insait long dispela tonamen.

Tim bilong Wewak amamas tasol na i go bek bikos 6-pela pilaia bilong ol i stap long Momase skwat.

## Ol prais bilong PMSA 7-asait redi long Julai

MOSBI Soka Asosiesen (PMSA) bai givim prais bilong ol tim husat i winim kik bilong 7-asait resis long taim bilong Kwins Betde Wiken long mun Julai.


Ol tim husat i kamap namba wan na namba tu bai kisim prais bilong ol sampela taim long neks mun. PMSA bai givim ol dispela prais taim ol holim wanpela pati pastaim long ol salim taim bilong ol meri i go long Wabeg.

Olgeta tim long wan wan divisen husat i win bai kisim tropi. Bihain long resis bilong 7-asait i pinis long Mande. PMSA i save nau long wanem ol tetu stap namba wan na tu. Dispela i bihainim tasol poin bilong ol long taim bilong resis.

Ol dispela tim i win long primia divisen em namba wan Kurti Andra na namba tu em Rapa tona. Divisen 1: Tarangau na Hoods. Divisen 2: Kinhill Kramer na Tubi. Wimens 1: Waliya na Wanzesi na Wimen 2: em Blu Kumang na Morebi United.

Dispela ol tim i mas kisim pas bilong ol i stap wantaim seketeri bilong PMSA. Dispela pas em bilong tok save long wanem taim bai yupela i kisim ol prais bilong yupela.

Long dispela wiken, PMSA bai iarim ol tim long pilaim ol gem em ol i bin lusim long las wiken. Kik bilong raun tu bai stat long narapela wik na olgeta tim i mas redi long statim gen raun tu.



Stail bilong ol Apo...Dispela pilaia bilong PTC i wok long painim nau sapot pilaia bilong em. Bikos long sait em birua bilong em bilong Apo-Sparks i paia olgeta na spit i kam long kisim bal. Dispela samting i bin kamap taim tupela tim ya i bung long Goroka soka resis. Na long dispela pilai long NSI pilai graun, tupela i dro, 2-2. Foto: Sape Metta.

## Lae na Madang gat wankain stail .....Tupela senta i dro long gem bilong ol

JAMES KILA i raitim

KWINS Betde wiken long Madang i bin gutpela tru taim planti manmeri i bung long lukim bikpela soka resis bilong Momase rijonal soka tonamen.

Long dispela bikpela resis Lae wantaim Madang i bin kamap top long ol gems bilong ol. Lae i bin kamap namba wan na Madang i bin kamap namba tu.

Lae i bin kamap namba wan bikos i gat planti pions o gol averes insait long dispela tonamen bikos lo bilong ol gem i bin bihainim raun-robin sistem.

Ripot Wantok Niuspepa i kisim long Madang i tok tupela tim ya Lae na Madang i bin pilai wanpela gutpela na strongpela gem tru insait long tonamen na bin dro. 0-0.

Kain stail bilong ol long pilai na ol we bilong kontrolim bal i mekim ol planti manmeri amamas na singaut taim ol i pilai.

Bihain long dispela dro, ol opisal i skelim ol poin na i makim Lae olsem wina bikos ol i winim olgeta gem na i dro wanpela tasol.

Madang tu i bin winim olgeta gem bilong ol. Tasol ol i pilai kaskas wantaim liklik senta Ramu na ol dro, 3-3. Dispela i mekim tupela dro.

Long stat bilong tonamen long Fraide, Madang i bin winim Wewak 4-0, Morobe Kantri 6-0 na bihain em i dro wantaim Ramu, 3-3.

Lae i bin winim Morobe Kantri 7-0, Wewak, 7-0 na Ramu 4-1, na bihain em i dro wantaim Madang 0-0.

Bihain long dispela resis ol i makim pinis 30 pilaia bilong makim Momase rijon long bikpela PNGFA rijinol sempionsip long mun Julai.

## Lae winim 10-pela pilaia long Momase skwat

OL selekta i makim pinis wanpela skwat bilong Momase long stap insait long rijonal soka sempionsip em bai kamap long dispela yia.

Ol i bin makim ol dispela pilaia long taim bilong Momase soka tonamen long Madang las wiken.

Lae husat i bin winim dispela kik i gat 10-pela pilaia i stap long skwat. Ol opisal bilong Momase rijonal tonamen i makim Wewak olsem ples bilong holim 1994 Momase soka tonamen.

Ol lain i stap long Momase rijonal skwat em:  
**MADANG**  
Victor Carson, Amos Romo, Michael Steven, Chris Kuli, Kublan Siming, Trimo Topio, John Panu na

Sammy Awele.

**LAE**

Akanda Gidigia, Robin Jojo, Peter Paliwa, Raymond Nasa, Jack Johnathan, Tony Miratobi, Massi Ngaiya, Kelly Jim, Dickson Laviong na Gidi Nasa.

**RAMU**


Francis Kusunan, Guest Samu na Gesa Gebob.

**WEWAK**

Adam Norm, Gordon Batek, Jerry Sirori, Nangs Munjin, Ben Boru na John Aaro.

**MOROBÉ KANTRI**

Nathan Awap, Jerry Song, Simon Gidisa na Gidi Tom.



# BENSON & HEDGES SOKA

## Wantok

### NESENEL KOSA BODI LAIKIM MEMBA

#### MT. HAGEN SOCCER ASSOCIATION WEEKEND DRAW WEEK No: 09

##### Ground 1 Only Saturday 19/06/93

Time	Grade	Hagen United	vs	Wantoks
12.00	LR	Hagen United	vs	Wantoks
1.15	LR	BFC	vs	Tarangau
2.30	LR	Sunam	vs	Kalibobo
3.40	L	BFC	vs	Tarangau
4.30	L	Elcom	vs	Kumul Air

##### Sunday 20/06/93

11.00	LR	Elcom	vs	Kumul Air
12.15	LR	Chesols	vs	Pascols
1.30	L	Chesols	vs	Pascols
2.40	L	Hagen United	vs	Wantoks
3.55	L	Sunam	vs	Kalibobo

#### PORT MORESBY SEVENS POINTS LADDER

Premiers	
1. K-Andra	22
2. Koupa	16
3. Westpac	18
4. Rapatona	19
5. Golo	15
6. B.K	17
7. Uni	18
8. Morobe	12
9. PTC	11
10. Sobou	11
11. Moukasi	6

Division 1	
1. Tarangau	20
2. Amazon Bay	16
3. PS Roots	16
4. STC	15
5. Hoods	18
6. Defence	15
7. Batisalem	13
8. Zeigoc	13
9. Sunam	15
10. Maset	7
11. Wanzesi	11

Division 2	
1. Kinhill Kramer	18
2. Tubi	17
3. Batu	17
4. Katuman	15
5. Waliya	14
6. Cycone	13
7. Gala	13
8. B-Koupa	13
9. Keweh	9
10. Togelu	10
11. Cloudy Bay	5
12. Murat	8

Womens 1	
1. Waliya	13
2. Wanzesi	13
3. Uni	12
4. Sobou	10
5. Sunam	9
6. PTC	8
7. LSC	7

Womens 2	
1. B-Kumuls	16
2. Morobe	15
3. Tarangau	14
4. Keezhang	11
5. Defence	8
6. Murat	7

#### WINIS MAP I raitim

PAPUA Niugini Nesenel Soka Kosa Asosiesen (PNGNSCA) i askim nau olgeta soka kosa long kantri long kamap memba. PNGNSCA em i wanpela nupela bodi em i bin stat long dispela yia. Olsem na ol i askim olgeta soka kosa husat i gat besik setifiket long wok kosa na ol arapela sinia kosa insait long kantri long kamap memba wantaim ol. Seketeri na tresera bilong PNGNSCA, Geoffrey Gidon i salim pinis pas i go long olgeta soka asosiesen husat i afiliet wantaim Papua Niugini Futbol Asosiesen (PNGFA) long givim nem bilong olgeta kosa.

Taim seketeri i kisim ol nem bilong kosa, em bai salim pas i go stret long ol na askim ol long kamap memba. Membasip fi em K25 long wan wan man. Na ol kosa i mas baim long olgeta yia.

PNGNSCA i askim olgeta soka asosiesen husat i afiliet pinis wantaim PNGFA long helpim ol na salim nem bilong ol kosa hariap. Ol kosa husat i save lukautim ol tim i mas baim K25 fi na kamap memba.

Astingting bilong fomim PNGNSCA em long traime kamapim wok bilong ol soka kosa insait long kantri. Dispela bai helpim tu long kamapim wok bilong ol. Sapos ol kosa i givim gut skul long ol pilaia, ol bai pilai gut na kamapim gutpela kik em ol pipel bai laik long lukim.

PNGNSCA i laikim olgeta kosa i kamap memba bikos ol i laik bungim ol wantaim long traime kisim luksave long wok bilong ol. Na kamapim stail na pasin bilong ol long lukautim ol pilaia.

PNGFA i bin givim tok orait long PNGNSCA long kamap olsem wanpela bodi na em i luksave long wok bilong PNGNSCA. PNGFA bai luksave tasol long ol kosa husat i memba wantaim PNGNSCA. Na ol bai givim tok orait long ol dispela kosa tasol long lukautim ol tim.

Olsem na ol i laikim olgeta soka asosiesen long salim nem bilong ol kosa hariap.



Pait long kisim bal...Pilala bilong Murat long Iephan na Togelu i resis long kisim bal. Dispela em kik bilong Mosbi 7-asait em i bin kamap long las wiken.

### INSAIT

• MOMASE tonamen ripot...p25

• Moa LAE RIPOT: PTC redi long Sobou...p26

• Wewak salim tok lukaut...p27

• Moa spot poto...p23

## Lae em tu taim sempion bilong soka nau long Momase

#### BEN TAUMAI I raitim

LAE i winim bek taitel bilong Momase rijonal soka tonamen long namba tu taim. Dispela pilai i bin kamap long Madang long las wiken em ol senta long Momase rijon i bin kamap na pilai.

Ol boi long Wopa kantri i bin winim planti gem bilong ol na dispela i bin givim ol olgeta rait long kisim bek sil.

Lae i bin pilaim 5-pela gem na winim 4-pela na dro long wanpela. Lae i bin dro wantaim Wewak na go pas long 9 poin. Namba tu tim bilong Madang i bin kamapim gutpela pilai na kamap namba tu long resis wantaim 7 poin.

I no bin gat fainal

bikos ol i bin pilaim raun robin na tim husat i gat moa poin i kamap wina. Olsem na Lae i bin win bikos ol i bin go pas long resis wantaim 9 poin.

Lae wantaim helpim bilong ol intenesenel pilai olsem Dickson Laviong, Raymond Nasa, Peter Paliwa na Peter Akanda i bin stapim ol arapela tim long win. Ol dispela nem pilaia i bin kisim gutpela sapot pilaia i kam long ol kain pilaia olsem Robin Jojo, Jack Jonathan, Tony Miratebi, Massi Ngaiyana na Kelly Jim. Dispela ol pilai i bin harim tok bilong kosa, Ludwig Peka na winim pilai.

Wanpela gutpela pilai Lae i kamapim em

taim ol i pilaim las gem bilong ol wantaim Ramu. Man, long dispela pilai ol i wokim wan tas tasol na larim bal i ron tasol long graun.

Tasol Ramu tu i bin strong na holim lek bilong Lae. Long dispela pilai Lae i sutim tasol wanpela gol. Sponsa bilong Momase soka tonamen, B.S Holdings bilong Lae i bin givim aut ol prais i go long ol tim husat i win.

Ol pilai husat i kisim sampela prais em Victor Carson olsem tok goli, Trimo Topio prais bilong pilaia i sutim planti gol long taim bilong resis. Na Gusak Samu i kisim prais bilong nambwan pilaia. Carson na Topio i bilong Madang taim Samu i bilong Ramu.

Ol i makim pinis Momase skwat husat bai kik long rijonal tonamen. Ol dispela pilai em Raymond Nasa (Lae), Peter Paliwa (Lae), Jack Jonathan (Lae), Tony Mirattob (Lae), Massi Ngaiya (Lae), Kelly Jim (Lae), Dickson Laviong (Lae), Adam Norm (Wewak), Gordon Bater (Wewak), Jerry Sipori (Wewak), Victor Carson (Madang), Amos Ramo (Madang), Michael Steven (Madang), Chris Kuli (Madang), Kublan Siming (Madang), Trimo Topio (Madang), John Panu (Madang), Sammy Awele (Madang), Francis Kusunana (Ramu), Gusey Samu (Ramu) na Gesa Gebob (Ramu). Kosa bilong tim em Ludwig Peka.

Wiken "Horse Racing" - painim Weekend Sports



# RUGBY

Fonde, Jun 17, 1993

LIG NIUS

## OL FIJI KAM PINIS...



*Ol pukpuk yet...* Wanpela bikpela fowat pilaia bilong Wests i ron wantaim bal i kam antap na redi tasol long salim bal i go long ol poro bilong em. Bikos i luk olsem ol birua bilong DCA tu i kamap klostu pinis na nogut em i go kaikai graun. Tasol abrus na DCA kisim solap long Mosbi las wiken, 52-24. *Poto: Ivan Bayagau.*

## ...Mosbi ragbi lig graun bai paia stret long Sarere

### WINIS MAP i raitim

Lloyd Robson Oval bai paia liklik taim ol pilaia bilong Fiji Bati i krungutim fil long Sarere.

Dispela bai namba wan taim Papua Niugini i pilai wantaim Fiji Bati. Planti i save long Fiji olsem wanpela Ragbi yunien kantri. Tasol nau ol i laik kam insait long resis bilong ragbi lig.

Na long stapim Fiji long win, Papua Niugini i makim pinis wanpela strongpela tim bilong Presiden X111.

Dispela tim bilong Presiden X111 ol i makim em i gutpela tru. Presiden X111 tim bilong nau i gat sampela ekspirens Kumul pilaia na sampela nupela yangpela pilaia husat i bin kamapim ol gutpela pilai long taim bilong SP inta siti resis long dispela yia.

Kosa bilong Presiden X111 tim, Joe Tokam i gat bikpela bilip olsem ol pilaia bilong em bai kamapim gutpela pilai na winim gem. Dispela long wanem tim bilong em i gat ol nupela yangpela pilaia na ol pilaia husat i pilai pinis long Kumul.

Tokam i makim pinis namba wan 13 pilaia husat bai pilaia long Sarere. Ol dispela pilaia em David Buko (fulbek), Oscar Zugu (lep winga), August Joseph (namba tu kepten-ausait senta), David Gomia (insait senta), Joshua Kouoru (rait winga), Tuksy Karu (faiv-et), Aquila Emil (hap bek), Kera Ngaffin (kepten-prop), Johnny Barbs (huka), Nande Yer (prop), Max Tiri (seken row), John Piel (seken row) na Petrus Bangkoma (lok). Ol risev em Luke Waldiat, Ben Bire, Arnold Krewanty

na Mathew Midi.

Fiji i gat ol bikpela pilaia na ol i save ron spit. Tasol Tokam i gat stail bilong em yet long stapim dispela spit bilong ol pilai bilong Bati. Em i laikim Tuksy Karu na Aquila Emil long wokim ol sip o graba kik. Dispela bai helpim ol long pusim ol pilaia bilong Bati i go bek long eria bilong ol.

Narapela samting em Bati tim i gat 5-pela pilaia husat i save pilai long Australia. Tupela i save pilai long Sidni Lig wanpela bilong ol em Noa Nadruku.

Nadruku i save pilai wantaim Canberra Raiders na em i gat nem nau long Australia. Ol lain Papua Niugini husat i save lukim televisen i save long pilai bilong em tu.

Tasol Tokam i no wari long dispela ol pilaia bikos em i gat bilip long ol boi bilong em. Long fowat em i bilip Kera Ngaffin na Nande Yer bai wokim ol strongpela ron na brukim difens bilong Bati. Max Tiri husat i no bin stap long Kumul skwat las yia i kamapim pinis strongpela pilai long taim

bilong inta siti resis long dispela yia. Kain pilai bilong em bai helpim tim bilong em long win. Petrus Bangkoma tu em i wanpela strongpela man na em inap boim ol difens bilong Bati.

Tokam i bilip beklain bilong Presiden X111 i fast na ol i save ron spit. Karu na Emil bai go pas long tilim ol bal. Emil bai wokim ol kik taim Karu bai kisim ol penalti kik bikos kik bilong em i save go insait stret long namel bilong pos.

Fulbek David Buko em i wanpela yangpela pilaia tasol long taim

bilong inta siti resis, pilai bilong em i bin gutpela tru. August Joseph bai putim was long senta posisen. Em bai was long katim ol birua pilaia long skoa. Joseph i wanpela strongpela pilaia tu long ronim bal i go long eria bilong ol birua.

Tupela winga Osca Zugu na Joshua Kouoru i save wok hat na tupela inap stapim ol birua pilaia.

Man husat bai makim nem pilaia bilong Canberra Raiders, Noa Nadruku em Joshua i go moa long pes 3

# EKS KUMUL HELPIM KIMBE

## ... tasol wok bilong kirapim gen ol pilai na pulim sapot i no inap isi

### WINIS MAP i raitim

OLPELA Kumul pilai, Willie Valuka i lukautim nau wok seketeri bilong Kimbe Ragbi Lig (KRL).

Valuka i wanpela nem pilaia bilong Madang bipo. Na em i gat nem long makim Madang. Em i save makim Noten son long planti son trails taim em i stap wok long Madang. Valuka i bin stap long Kumul tim na ol i go pilai long Nu Silan long 1983.

Em i bin pilai tu wantaim Noten son tim. Tasol em i bin lusim pilai taim em i brukim han bilong em long 1985.

"Maski mi lusim pilai, mi save bihainim yet ragbi lig long Papua Niugini na Aus-

tralia," Valuka i tok.

Kain strongpela tingting bilong em long ragbi lig i bin wokim na em i askim ol klap na opisal long Kimbe lig long makim em olsem seketeri.

Valuka i bin wokim dispela samting long las yia taim em i lukim ragbi lig long Kimbe i wok long dai. Olsem wanpela pilaia na sapota, em i no laikim Kimbe i stop long pilai ragbi lig.

Valuka i bin askim ol man long larim em i kamap seketeri taim em i lukim wok bilong lig long Kimbe i bagarap. Em i kisim ples bilong olpela seketeri, Alois Vava.

Long las yia klostu sisen bilong lig i laik pinis planti ol sapota na klap i bin les long lukim pilai. Bikos ol i

lukim olsem ol opisal i no mekim gut wok bilong ol. Planti i bin les na sampela i ting ol i no inap long pilaim ol fainal.

Tasol Valuka i helpim ol klap na givim wanem kain save em i gat na larim ol i pinisim sisen gut wantaim ol fainal. Long dispela taim, sampela lain i bin luk-save long wok bilong em.

Na taim em i askim ol long makim em olsem seketeri, planti i bin amamas bikos ol i gat bilip long wok bilong em na larim em i kamap seketeri.

Stat long taim Valuka i kisim wok olsem seketeri, wok bilong lig long Kimbe i ron gut nau. Long las yia i gat 8-pela klap i bin resis tasol nau 4-pela

tasol i pilai.

Namba bilong ol tim i kam daun bikos planti i bin les long pilai taim ol i lukim pilai i no ron gut long las yia. Na nau ol i gat 4-pela klap tasol. Olgeta klap i gat primia, risev, anda 19 na anda 17 tim.

Valuka i tok dispela 4-pela klap i save kamapim gutpela pilai tru. Em i tok nau pasin bilong pilai i winim tru bilong las yia. Bikos i gat planti gutpela pilaia tasol i wok long pilai.

Tasol wanpela samting i wokim Valuka i kros em sponsasip. Em i tok long planti yia i go pinis, Kimbe Lig i no save kisim wanpela sponsa i kam long ol kampani husat i stap long provins.

## Das kirap yet long Vanimo tas

RESIS bilong Vanimo ragbi tas long dispela yia bai winim tru bilong las yia.

Presiden Ken Martin i tok long dispela yia, planti pipel i gat strongpela laik long pilai. Dispela i winim tru pilai bilong las yia. Long las pilai i bin pinis long namel tasol. Bikos ol pilaia i no bin amamas tumas.

Las yia i bin namba wan taim Vanimo i statim wanpela ragbi tas resis. I gat planti tim i bin givim nem tasol pilai i bagarap long namel. Man husat i bin tingting long sponsaim resis long las yia em wanpela bisnisman bilong Vanimo, Joe Nali. Tasol resis i no kamap gut na em i no sponsaim pilai.

Pilai i no bin pinis gut bikos planti klap i bin les nating. Ol klap i no bin givim inap taim long traim kisim ol pilaia bilong ol i go long ples bilong pilai na bungim ol wantaim olsem wanpela tim. Ol opisal tu i no bin kisim gutpela wokbung i kam long ol klap na pilaia. Olsem na olgeta samting i bagarap.

Tasol long dispela yia, Garamut Entaprais bai sponsaim pilai. Kampani i givim pinis K1,000 long ol opisal.

Martin i tok ol bai brukim K1,000 olsem prais mani long ol tim. Na ol i wetim mencsa long givim ol nara-

pela mani bilong baim ol tropi.

Long dispela K1,000 ol bai givim K400 i go long tim i kamap namba wan, K200 long namba tu na K100 long tim i kamap namba tri. Dispela em long tim bilong ol man tasol. Tim bilong ol meri bai i gat prais bilong namba wan na tu tasol. Tim bilong ol meri kamap namba wan bai kisim K200 na namba tu bai kisim K100.

Martin i gat bikpela bilip olsem pilai bilong dispela yia bai pinis gut na ol bai pilaim gren fainal.

Dispela wik em i namba tu wik bilong sisen tru bilong raun wan. Vanimo Ragbi Tas Asosiesen (VRTA) bai holim tupela raun tasol.

I bin gat planti tim i resis long pri sisen tasol ol i bin stapim sampela long pilai bikos ol i no baim klap afiliesen na ol pilaia registresen fi. Klap afiliesen em K20 na pilaia registresen em K2.

VRTA i gat samting olsem 12-pela tim bilong man na 4-pela bilong ol meri. Ol tim bilong ol meri husat i pilai em Narmio Panthers, Works, Kanaks na Garamut.

Ol opisal husat i lukautim pilai bilong dispela yia em Ken Martin (presiden), Peter Wau (namba tu presiden), Andrew Kwalam (seketeri) na John Berry (tresera).

## Madang redim tas skwat

### BEN TAUMAI i raitim

MADANG Ragbi Tas Asosiesen (MRTA) i makim pinis fainal skwat bilong em long go pilai long nesnel sempionsip em bai kamap long Rabaul long mun Septemba.

MRTA bai salim 4-pela divisen bilong em long dispela resis. Ol dispela divisen em sinia men, open men, sinia wimen na open wimen.

Presiden bilong MRTA, Fabian Kaore i tok bihain ol bai makim ol pilaia long pilai bilong miks divisen.

Ol fainal skwat bilong sinia men em Boston Jack, Tonny Seeto, Peter Keros, Greg Babia, Alu T, Dela Mapo, Saun Dambui, Paul Kipma,

Joe Dambui, Peter Biaso, Joe Kangi, John Duma, Paul Wabu, Peter Barns, Martin Jubun na Tami Danle.

Ol pilaia bilong open men skwat em Ben Parando, Soni Pokoran, Joe Dambui, Raian Robert, Nason Anis, Samuel Anis, Lawrence Spicu, Tom Dangi, Robert Seri, Ade Waiman, Lee Lagani, Erick, Simon Jack, Daniel Yori, Maron Lucas, Otsi Bau, Raman Peni, Kundi Dambui na William Laki.

Tim bilong sinia wimens em Karen Mondo, Evelyn Ora, Betty Bugga, Jenny George, Daisy Siban, Rosemary Kapur, Jubilee Sakuri, Rhonda Bau, Rona Seri, Theresia Mol, Emma Elias, Miriam Benjamin, Helen Wabu, Pauline Kimpa, Regina Wani,

Tina Gimai, Jenny Luke na Rachel Jiki.

Open wimen em Rosan Dakun, Barbara Raymond, Mary Maron, Janneth James, Theresia Benjamin, Laura Makis, Gewa Siemu, Sila Aku, Shella Yabbena, Brenda Koi, Jackie Tito, Priscilla Sepulung, Judith Mondo, Helen Moses, Martha Miran, Martha Bandao na Taka Simeon.

Ol kosa bilong wan wan divisen em Boston Jack (open men), Walter Mombi (sinia wimen), Fabian Kaore (open wimen) na Saun Dambui (sinia men).

Nau yet presiden Kaore i tok olgeta pilaia i mas baim K140 olsem levi fi. Na i no K70 olsem ol i bin makim pastaim. Dispela K140 i mas go long ol opisal pastaim long mun Julai.



• Nupela seketeri bilong Kimbe lig, Willie Valuka is sanap fran long wanpela ka bilong gavman long Wes Nu Briten. Em i laikim ol pilai i mas kamap gut gen.

## SECTION 14: OFFSIDE

**When offside 1.** A player is offside except when he is in his own in-goal if the ball touches, is touched, held or kicked, by one of his own team behind him.

**Out of Play 2.** An offside player shall not take any part in the game or attempt in any way to influence the course of the game. He shall not encroach within ten metres of an opponent who is **Retire ten metres** waiting for the ball and shall immediately retire ten metres from an opponent who first secures possession of the ball.

**Placed onside 3.** An offside player, is placed onside if:

(a) an opponent moves ten

metres or more with the ball.

(b) an opponent touches the ball without retaining it.

(c) one of team in possession of the ball runs in front of him.

(d) one of his own team kicks or knocks the ball forward and takes up a position in front of him in the field-of-play.

(e) if he retires behind the point where the ball was last touched by one of his own team.

### NOTES

**Catcher claiming 1.** A player who catches the ball near an offside player must not go out of his way to make interference

in play by the offside player unavoidable. He should proceed with normal play and rely on the referee to penalise the offside player if the latter interferes with play. If the catcher deliberately and unnecessarily runs into the offside player then play should proceed.

**Accidental offside** Where the referee is satisfied that interference with play by an offside player is accidental he should order a scrum.

**Interfering with catcher 2.** Any offside player who remains within five metres of an opponent who is set to catch a kick

up field by an opposing player shall be deemed to be interfering with or attempting to interfere with the catcher and shall be penalised.

**"out of play" as 3.** Players who are out of play at a play-the-ball (Section 11), opposed to "offside" a scrum (Section 12), a kick-off or drop-out (Section 8) a penalty kick (Section 13) are not put "onside" in the manner described in para 3 above. (See appropriate sections).

**Examples of offside player retrieving ball 3.** (e) Player A kicks the ball and opponent B

attempts to catch it. He drops the ball which rolls behind him. His colleague C who was originally in front of him drops back to retrieve the ball. When he gets to it he is behind the point at which it was played by B.

Indicated by the line XY, and is not offside.

Player A kicks the ball and opponent B fails to catch it, the ball bouncing forward off his hands. Player C is offside if he plays the ball unless B advances in front of the ball before C reaches it, in which case a scrum would be ordered for a knock-on.

# Fainal tim bilong Mosbi anda 19 bai kamap long Mande

MOSBI bai makim fainal skwat bilong anda 19 bihain long dispela wiken. Dispela em bihain long pilai namel long Pom Possibles na Pom Probables long dispela wiken.

Ol makim i bin makim dispela tupela tim na wan wan tim i gat 20 pilaia. Ol i bin selektim tasol 40 pilaia bihain long Mosbi anda 19 trails long las wiken.

Long dispela trails i bin gat planti pilaia i pilai long 5-pela tim. Ol dispela tim i kam long wan wan klap long Mosbi, tasol ol i bin trening long stap insait long dispela 5-pela trening skwat.

Bihain long resis bilong ol i pinis long dispela wik Mande, ol selekta i bin makim tupela tim.

Ol pilaia husat i stap long tim bilong Possibles em Jacob

Kenosi, Wesley Laveliu, Julius Krewanty, Jackery Gibsy, Gagaba Kacta, Agi Davai, Vicky Moses, Phil Sawa, John Fabila, Tati Hore, Gabriel Kelua, Iamo Tau, Michael Marum, Philip Kuria, Ninkama Bomai, Anthony Bruce, Pital Bugalia, John Kawage na Kevin Pou.

Tupela tim opisal em Alois Suang (kosa) na Sawi Kaeta

(trena).

Tim bilong Pom Probables em Moses Matuka, Peter Kuri, Norman Saup, Tara Morea, Selau Heluka, Ula Tau, Danny Lahari, Kelly Kelewa, Ben Mesa, Wilson Thomson, Aila Koivi, Wemin Michael, Wenolu Kopere, Sabake Kabai, Dickson Kevau, Leondard Isla, Sumai Dama, William Gudiri, Misina Dai Rarua na Dickson Marabe.

Ol opisal em Lionel Yogomin (kosa) na Peni Hoffman (Trena).

Dispela tupela tim bai pilai egensim tupela yet na ol selekta bai makim fainal trening skwat bilong go pilai long Kiunga long anda 19 sempionsip bilong Sauten son.

Ol bai tokaut long nem bilong fainal trening skwat bilong anda 19 sampela taim long neks wik.



*Pen bilong pukpuk...* Wanpela fowat pilala bilong Wests long Mosbi i laik go brukim difens bilong ol boi DCA. Kain pawa bilong ol tasol i wokim na ol i bagarapim stret sindaun bilong DCA long las wiken, 62-24.



*Redi long Fiji...* Tupela pilala bilong Presiden X111 tim bilong PNG, Tuksy Karu (Iephan) na Kera Ngaffin i malolo long trening long dispela wik na kolim nek liklik.

## MOSBI REDIM NAU ANDA 17 SKWAT

### WINIS MAP I raitim

MOSBI bai makim anda 17 skwat bilong em long dispela wiken taim tupela skwat bilong Pom Possibles na Pom Probables i pilai.

Dispela anda 17 skwat ol i makim bai go pilai long anda 17 sempionsip. Dispela resis bai kamap long Goroka long Julai 10.

I gat 20 pilaia long wanpela tim. Ol selekta i bin makim ol dispela pilaia bihain long wanpela anda 17 trails bilong ol long longpela wiken long las wiken. Ol opisal i bin tokaut long dispela tim long Mande apinun bihain tasol long resis bilong ol trails i pinis.

I bin gat 5-pela anda 17 tim i pilai. Ol dispela pilaia i kam long wan wan klap husat i save pilai long Mosbi. Tasol ol makim tasol ol top pilala bilong wan wan klap na putim ol long 5-pela tim. Ol dispela tim em Pom

Norths-Red, Pom Souths-Gold, Pom Easts-Green, Pom Wests-Blue na Pom Norths-Red.

Na long Mande apinun, ol i bin makim tupela tim gen wantaim 20 pilaia long wanpela tim.

Ol pilaia husat i stap long Pom Possibles em Masui Hans, Kana Yatefa, James Jimmy, Michael John, Mathew Kopere, Thomas Elomi, Koren Peter, Jeffrey Togola, Golabe Bob, Tony Simon, Kennedy Mek, Benson Kisong, Joe Kuri, Jeffrey Torovi, Kila Geita, Gona Kelly, Garau Pipi, Jack Obaha, Kapukai John na Moha Kake.

Kosa bilong ol em

Heni Garu na trena em Sevese Maifuri.

Tim bilong Pom Probables em Mesulam Pindiat, Obed Reuben, Kukuru Gau, Wakai Venua, Tiopie Lenodard, Vaburi Arva, Uda Igua, Ronald Dickson, Billy Meka, Philip Andara, Ninkama Baku, Kila Vuina, Henry Vai, Seri Kamea, Aita Peto, Naime Gaudi, Jero Peter, Barford Karai na Jacob Oeka. Kosa bilong tim em Haoda Kouoru.

Dispela tupela tim bai pilai long dispela wiken na ol selekta bai makim fainal anda 17 skwat bilong go pilai long Goroka long mun Julai. Ol bai makim dispela skwat long dispela wiken yet.

### Ragbi Lig graun bai paia

i kam long pes 1 Kouoru. Dispela boi Kerema i bin wokim planti ol sapota i amamas taim em i stapim Martin Offiah long las yia taim

British Lions i pilai wantaim PNG Kumul. Kouoru i bin stapim Offiah gut tru tasol Offiah i skoa taim Kouoru i kisim bagarap.



*Karu go pas...* Tuksy Karu bilong Wests i givim stret na laik sakim han bilong dispela blrua pilala bilong DCA. Dispela tupela tim i bin bung long bikpela A gret gem bilong Mosbi ragbi lig long las wiken. Na Wests i winim pilal, 62-24. Foto: Ivan Bayagau.

# STRONGPELA SALENS KAMAP . . .

## . . . bung bilong Panthers na Hawks long Madang

### BEN TAUMAI i raitim

PANTHERS bai nekim Hawks sapos em i yusim gut ol beklain pilaia bilong en long bikipela pilai bilong ol A gret bilong Madang Winfield Lig resis long Sarere.

Ol beklain pilaia bilong Panthers bai go pas long daunim Hawks bikos ol i gat spit. Na sapos ol beklain pilaia i kisim

planti bal, ating Hawks bai paia stret.

Man husat bai lukautim na stiaim win bilong ol wailpusi bilong Newtown em Ben Barando. Em bai pilai long hapbek posisen. Em bai kisim helpim i kam long faivet Simon Jack, Lance Tirava, Peter Keros, Lapa Laeman, Raman Penny na Willie Bagore.

Ol dispela pilaia bai traime spit bilong ol wantaim Clement

Kulan, David Truk, Zaumai Sareu, Boston Jack, Apo Kalup, Timmy Michael na David Niggins bilong Hawks.

Bikipela pait tru bai stap namel long tupela hapbek, Ben Parando bilong Panthers na Timmy Michael bilong Hawks. Dispela tupela man bai traime long daunim strong bilong narapela na lukim husat inap setim ol beklain na fowat gut.

Panthers i gat planti

strongpela man husat i save pilai long fowat. Na ol dispela fowat bai traime long daunim

salens arapela birua tim i kamapim. Ol strongpela man bilong Panthers husat bai

strongim banis long fowat em Jeffrey Bossi, Eddie Bailey, John Manalau, Reuben

mas was gut, nogut ol i givim sampela kain marasin nogut na kilim ol wailpusi hariap tru



• Wanpela pilal long Madang namel long ol lain bilong Hawks (sanap lain long lephan) na Tigers. Na long dispela wiken, Hawks i gat narapela wok gen egensim ol Panthers.

Tropuna na Willie Kove. Ol dispela lain bai traime long daunim Philip Festuman, Graham Petrus, Mathew Kapal, Timothy Kerua, Angelus Lalu na Martin Tongan bilong Hawks.

Panthers i mas was gut long ol fowat bilong Hawks bikos ol kas ya i save ron olsem bikipela tarangau pisin na save rausim bal taim ol birua i laik takelim ol. Sapos ol i no holim pasim han bilong ol, sori bai hat long stapim bikos ol i save pilai gut na bai skoa klostu klostu.

Long las wik, Hawks i bin lus long wan poin tasol taim ol i pilai wantaim Brothers. Olsem na Panthers i

long namba wan hap bilong pilai yet.

Hawks bai yusim wankain pilai long traime kamapim gen nem bilong ol long Madang ragbi lig resis. Na putim ai bilong ol long stap insait long gren fainal bilong dispela yia.

Long kirapim tingting bilong ol pilaia kosa, Michael Leahy i putim K30 bilong olgeta divisen. Sapos olgeta divisen bilong ol i win, ol bai putim olgeta mani wantaim na bihain wokim wanpela pati.

Long narapela pilai long Sande, Diwai bai traime bun bilong Brothers.

## Singaut bilong mekim save nau long Brothers klap

WANPELA sinia pilaia bilong Hawks klap long Madang i askim ol eksekutiv bilong Madang Winfield Lig long givim bikipela mekim save long Brothers ragbi lig klap long trabel ol i bin kamapim long las wik Sande.

Pilaia i no laikim nem bilong em i kamap long niuspepa i tok, Brothers i mas kisim bikipela mekim save bikos ol i bin statim trabel na bihain ol sapota bilong ol i ron i go insait long fil na paitim ol pilaia bilong Hawks.

"Dispela trabel i mekim na 6-pela pilaia bilong mipela i kisim bikipela bagarap na wanpela i brukim lek bilong em," pilaia ya i tok.

"Mipela Hawks, Diwai na Panthers i no save statim o kamapim trabel. Tasol sampela klap i save wokim na Madang lig i no save givim bikipela mekim save long ol dispela klap."

Ragbi Lig Nius i save olsem Hawks bai salim wanpela pas i go long Noten Son Judeseri Siaman, John Numapo na Papua Niugini Ragbi Futbal Lig (PNGRFL) long protes long dispela pilai. Ol bai tokaut long as trabel i kamap na husat tru i statim dispela trabel.

Brothers i bin winim dispela pilai wantaim 5-14 skoa. Tasol Hawks i laikim Madang lig i givim ol 2 poin. Bikos ol i bilip lsem Brothers i no bin kamapim gupela pilai na ol i bin paitim nating ol pilaia bilong ol.

Nau yet planti ol sapota i laikim ol eksekutiv i stretim ples bilong pilai. Ol i tok, fil i no gat gupela banis olsem na ol sapota i save go insait na sindaun arere long fil. Na taim wanpela liklik trabel i kamap namel long ol pilaia, ol sapota i save ron i go insait na pait wantaim ol pilaia.



# Winfield League



# RIDER!

## Rank doesn't sit easy with Brad...



BRAD FITTLER rates marking Mal Meninga in State of Origin an easy task compared to his latest challenge at Penrith.

Taking on a new image is proving a tough test for the usually unflappable "Freddie".

Coach and mentor Phil Gould wants him to stop being Brad Fittler the champion bloke, and start being Brad Fittler the elite champion.

The Panthers are at the bottom of the competition ladder and Gould is looking to Fittler to help the club through their rebuilding phase by setting the standard.

"A lot of blokes came to Penrith to play with Brandy (Greg Alexander) and me and we haven't been playing the role we should have been," explained Fittler.

"Gus' wants me to detach myself more." It was the way things were at Penrith when Fittler first burst onto the scene as a precociously talented school-boy back in 1989, and one of the reasons the club developed into the force which contested back-to-back grand finals at the beginning of this decade.

"Penrith is missing players like Royce Simmons, Chris Mortimer and Peter Kelly," says Fittler.

"I used to turn up to training and only talk to a few blokes who I knew. I wouldn't have a beer or a joke with blokes like 'Simmo' and that - they wouldn't give you the time of day.

"It seemed real arrogant, but I realise now it was a good thing.

"You'd strive high to get into their class and they only let you in when they were sure you were good enough."

It's a very different set-up at the club now. A massive clean-out at the

end of a drama-filled 1992 and an alarmingly-high injury toll has resulted in an overwhelming turnover of players in the first grade side.

And Fittler, by his own admission, was uncertain what role he should play. Adding to his confusion was the fact that, with so many new faces around, the

place didn't feel much like home.

"It was like being at a new club," he said. "All the blokes who came from Paramatta were more comfortable than us.

"You saw blokes, like Col Van der Voort, who have been at the club for years walking around the place looking lost because they didn't know anyone. It was strange - we felt more out of it than the new fellows."

As is normally the case with Fittler, it didn't take long for him to get on with his new chums. But in hindsight he reckons doing what comes naturally for him wasn't in the best interest of the club.

"It's never been happier at Penrith but it's one of the reasons we're losing," he said. "Blokes in the under-21s feel as much like first graders as we do and that's wrong. Everyone seems to be worried about being mates - footy seems to be the last thing on people's minds."

Showing his teeth and snarling, though, is a new trick this "old" bluey is having trouble learning, despite the fact he knows Penrith would be better off if he did.

"I'm too busy being everyone's mate to even think about being a role model.

"I don't know if they expect me to walk around the place giving people advice or what Gus told me to be arrogant. I'd like to - I tried to - but it only lasted for a training session. It's too hard ... it's just not me.

"There are too many good bloke ad we need a cranky head. I like the other atmosphere - getting everyone together for a beer ... I'm good at that."

If not being able to play the "bastard" is Freddie's only real inadequacy as a footballer, then it's not surprising he currently has the world at his feet.

While everything has seemingly fallen into place for Fittler, his has been by no means a charmed run.

His enormous character shone through following the death of his close mate Ben Alexander nearly a year ago.

While time stood still for many of the Panthers, Fittler pushed on.

Typically, he played down the way he handled the situation and typically he defended those players who reacted differently to him.

"Blokes took it different ways. They didn't handle it worse

than me ... just differently. From the public's point of view it seemed as though I did the right thing.

"No way was better. The only way to get on with life I thought was to play footy."

Fittler's iron-clad defence throughout the State of Origin series was fuelled by the same simple, yet so effective, philosophy. "They kept running at me ... you've gotta tackle 'em I suppose."

Big Jack Gibson, the coach who blooded Fittler in State of Origin and dubbed him "Freddie", would have proudly claimed that response as one of his own.

It was the improvement in Fittler's defence this year which prompted Peter Sterling to declare he had joined the game's most elite players.

Freddie is conscious of the fact he is reaching his prime. With Meninga starting to wind down Fittler knows he can set up a long and fruitful stay at the top.

The Test series against New Zealand looms as a tremendous chance for Fittler to cement his place in the Australian side, well in advance of some of his challengers.

And, later in the year, he has the opportunity to set himself up at Penrith as well.

"I want to help Penrith out," said Fittler, referring to imminent contract talks.

"I can't see the point of changing clubs. I haven't seen many NSW or Australian players witch clubs successfully."


*Rugby League Week*





# WIDER!

## Rank doesn't sit easy with Brad...



BRAD FITTLER rates marking Mal Meninga in State of Origin an easy task compared to his latest challenge at Penrith.

Taking on a new image is proving a tough test for the usually unflappable "Freddie".

Coach and mentor Phil Gould wants him to stop being Brad Fittler the champion bloke, and start being Brad Fittler the elite champion.

The Panthers are at the bottom of the competition ladder and Gould is looking to Fittler to help the club through their rebuilding phase by setting the standard.

"A lot of blokes came to Penrith to play with Brandy (Greg Alexander) and me and we haven't been playing the role we should have been," explained Fittler.

"Gus' wants me to detach myself more." It was the way things were at Penrith when Fittler first burst onto the scene as a precociously talented school-boy back in 1989, and one of the reasons the club developed into the force which contested back-to-back grand finals at the beginning of this decade.

"Penrith is missing players like Royce Simmons, Chris Mortimer and Peter Kelly," says Fittler.

"I used to turn up to training and only talk to a few blokes who I knew. I wouldn't have a beer or a joke with blokes like 'Simmo' and that - they wouldn't give you the time of day.

"It seemed real arrogant, but I realise now it was a good thing.

"You'd strive high to get into their class and they only let you in when they were sure you were good enough."

It's a very different set-up at the club now. A massive clean-out at the end of a drama-filled 1992 and an alarmingly-high injury toll has resulted in an overwhelming turnover of players in the first grade side.

And Fittler, by his own admission, was uncertain what role he should play. Adding to his confusion was the fact that, with so many new faces around, the

place didn't feel much like home.

"It was like being at a new club," he said. "All the blokes who came from Parramatta were more comfortable than us.

"You saw blokes, like Col Van der Voort, who have been at the club for years walking around the place looking lost because they didn't know anyone. It was strange - we felt more out of it than the new fellows."

As is normally the case with Fittler, it didn't take long for him to get on with his new chums. But in hindsight he reckons doing what comes naturally for him wasn't in the best interest of the club.

"It's never been happier at Penrith but it's one of the reasons we're losing," he said. "Blokes in the under-21s feel as much like first graders as we do and that's wrong. Everyone seems to be worried about being mates - footy seems to be the last thing on people's minds."

Showing his teeth and snarling, though, is a new trick this "old" bluey is having trouble learning, despite the fact he knows Penrith would be better off if he did.

"I'm too busy being everyone's mate to even think about being a role model.

"I don't know if they expect me to walk around the place giving people advice or what Gus told me to be arrogant. I'd like to - I tried to - but it only lasted for a training session. It's too hard ... it's just not me.

"There are too many good bloke ad we need a cranky head. I like the other atmosphere - getting everyone together for a beer ... I'm good at that."

If not being able to play the "bastard" is Freddie's only real inadequacy as a footballer, then it's not surprising he currently has the world at his feet.

While everything has seemingly fallen into place for Fittler, his has been by no means a charmed run.

His enormous character shone through following the death of his close mate Ben Alexander nearly a year ago.

While time stood still for many of the Panthers, Fittler pushed on.

Typically, he played down the way he handled the situation and typically he defended those players who reacted differently to him.

"Blokes took it different ways. They didn't handle it worse

than me ... just differently. From the public's point of view it seemed as though I did the right thing.

"No way was better. The only way to get on with life I thought was to play footy."

Fittler's iron-clad defence throughout the State of Origin series was fuelled by the same simple, yet so effective, philosophy. "They kept running at me ... you've gotta tackle 'em I suppose."

Big Jack Gibson, the coach who blooded Fittler in State of Origin and dubbed him "Freddie", would have proudly claimed that response as one of his own.

It was the improvement in Fittler's defence this year which prompted Peter Sterling to declare he had joined the game's most elite players.

Freddie is conscious of the fact he is reaching his prime. With Meninga starting to wind down Fittler knows he can set up a long and fruitful stay at the top.

The Test series against New Zealand looms as a tremendous chance for Fittler to cement his place in the Australian side, well in advance of some of his challengers.

And, later in the year, he has the opportunity to set himself up at Penrith as well.

"I want to help Penrith out," said Fittler, referring to imminent contract talks.

"I can't see the point of changing clubs. I haven't seen many NSW or Australian players witch clubs successfully."

Rugby League Week



# Ailan son autim nem bilong anda 17 tim

## WINIS MAP I raitim

AILAN Son i makim pinis anda 17 ragbi lig skwat bilong em long go pilai long Goroka.

Ol i bin makim 20 pilaia long stap insait long trening skwat bihain long ol i holim wanpela anda 17 sempionsip long las wiken.

Dispela sempionsip i bin stat long Jun 12 na pinis long Jun 14. Tripela senta tasol i bin stap insait long Ailan son sempionsip. Ol dispela senta em Kavieng, Buka na Rabaul. Buka na Kavieng i bin salim wanpela tim taim Rabaul yet i bin putim tupela tim.

Ol anda 17 pilaia bilong Ailan Son em ol i makim em Kelly Walevo (Rabaul), Benjamin Golu (Buka), John David (Rabaul), Vincent Sianai (Rabaul), Abel Malias (Kavieng), William Hanson (Rabaul), Jef-

fery Demi, (Buka), Allan Lakur (Kavieng), David Saramas (Rabaul), Jerome Sahin (Buka), John Wimp (Rabaul), Mesulam Tomalon (Kavieng), Alphonse Teman (Buka), William Igoa (Buka), Peter Tukar (Rabaul), Philip Knox (Kavieng), Mike Paka (Rabaul), Graham Billy, (Buka), Moap Martin (Kavieng) na Ian Sami (Kavieng).

Namba wan 13 pilaia ol i makim long pilai long namba wan gem taim anda 17 sempionsip resis i stat em Kelly Walevo (fulbek), Benjamin Golu (raitwinga), John David (ausait senta), Abel Malias (lepwinga), William Hanson (namba tu kepten, faiv et), Jeffery Demi (hapbek), Alan Lakur (prop), David Saramas (huka), Jerome Sahin (kepten, prop), John Wimp (seken rowa), Mesulam

Tomalon (seken rowa) na Alphonse Teman (Lok). Ol 4-pela risev em William Igoa, Peter Tukar, Philip Knox na Mike Paka.

Tim opisal husat bai bihainim anda 17 skwat bilong Ailain son em Rodney Griffith (kosa), Nelson Tandeke (trena) na Bill Vevo (tim menesa).

Rabaul i gat 8-pela pilaia i stap insait long skwat na Kavieng i gat

6-pela na Buka i gat 6-pela. Tim menesa bilong anda 17 skwat, Bill Vevo i givim bikpela tok amamas bilong em i go long ol selekta. Em i tok ol selekta i no bin wansait na makim skwat. Dispela skwat i gat wankain namba bilong ol pilaia.

Vevo i givim tok amamas bilong em tu i go long ol opisal bilong Kavieng long

salim tim i go long Rabaul. Resis bilong ol junia long Kavieng i bin stat samting olsem wanpela mun pastaim long dispela sempionsip long Rabaul. Tasol ol boi Kavieng i bin kamapim strongpela pilai tru.

Buka i bin kamapim strongpela pilai tu taim ol i go pilai long Rabaul.

Pilai bilong ol boi

Buka i bin kamap tru olsem na ol i makim Jerome Sahin bilong Buka olsem kepten bilong Ailan son.

Ol pilaia bilong Buka na Kavieng husat i stap long skwat i no inap go bek long ples. Ol bai stap yet long Rabaul na trening wantaim ol arapela pilaia bilong Rabaul.

Dispela skwat i gat tripela ol skul mangi, tupela i bilong Buka na

wanpela i bilong Kavieng. Tasol Vevo i tok ol bai larim ol dispela tripela skul mangi i go bek long skul. Tasol ol bai kamap long Rabaul wanpela wik pastaim long tim i lusim Rabaul na go long Goroka long Julai 9. Ailan son yet bai wokim rot bilong ol dispela mangi long go long Rabaul pastaim long tim i lusim Rabaul.



• Vevo...tim menesa na i salim tok amamas long ol selekta long makim gutpela tim.

# WINIM MONI NAU

Sans bilong yu long winim moni nau. Dringim tasol Pepsi na lukluk aninit long ai bilong botol Pepsi long sekim wanem samting yu winim.

**PRAIS:**

5 TOEA	10 TOEA	1 KINA
5 TOEA	10 TOEA	1 KINA
10 KINA	100 KINA	1000 KINA
10 KINA	100 KINA	1000 KINA

**WEI LONG KISIM PRAIS BILONG YU:**

**5 Toea, 10 Toea na 1 Kina:**  
 - Kisim ol prais bilong yu long ol stua, long ol SP Distributors na long ol opis bilong SP Holdings.

**10 Kina, 100 Kina na 1000 Kina:**  
 - Kisim ol prais bilong yu long ol opis bilong SP Holdings.

**DISPELA RESIS BAI PINIS LONG: 31 JULY 1993.**

**TAIM LONG PINIS LONG KISIM PRAIS EM: 13 AUGUST 1993.**

**SP DISTRIBUTORS:**  
 AITAPE • W & R Parer • ALOTAU • Cheong Supermarket • Alotau Enterprises • Fifita Trading • BIALIA • Newtown Trading • BUKA • Buka Enterprises • CHIMBU • Simbu Wholesalers • Nikwar Dealers • DARU • Daru Trading • GOROKA • Lamana Wholesalers • Negro's • P.S. Dealers • KAINANTU • Kanare Wholesalers • Spirit of Kainantu • KAVIENG • Bisi Trading • Joseph Tong & Co • Niuiland Traders • KEREMA • Nings Trading • KIMBE • Spirit of West New Britain • Kumi & Seto • KIUNGA • Progressive Traders • KOKOPO • Spirit of Kokopo • LAE • Andersons • C&B Chee • Seto Kui • Sullivans • Mico Point Trading • W & N Seto • Rabirad • MADANG • Rabirad Madang • Ho Kit • M & S Tsang • Olambu Trading • Bogia • MAPRIK • Garamut Enterprises Pty Ltd • MIENDI • Kips Liquor • Sullivans • MT HAGEN • Kips Liquor • Sullivans • POPONDETTA • Kumusi Traders • Popondo Trading • Wing Hay • PORT MORESBY • Jmm Trading • JJ Wholesalers • Patrick's Transport • Choula Trading • Seto Kui & Co • RH Trading • Terimal Trading • P & B Cheung • SCS Trading • Papuan Produce • RABAU • Andersons • Rabirad • Spirit of Rabaul • VANIMO • Vanimo Trading • WABAG • Kips Liquor • Sullivans Wholesale • WEWAK • Garamut Enterprises Pty Ltd • George Seto & Co • Tang Mow (1960) Pty Ltd • Wini Trading

# EMI PEPSI LONG PNG



# BEARS! AT WAR!



Dressed to kill... (clockwise from above) Commando conditioner Pat Jarvis; the elusive David Hall; Top guns Craig Wilson, Peter Jackson and Greg Florimo; Paul Conlon aiming up; "Jacko" under attack. Photos: STEVE VOTE



## ... but it's all good fun

NORTHS' giant-crushing secret is out. Softball! That was how the Bears prepared for the 40-point romp over title-holders Brisbane in their last home game.

"The players have been at it since November and we realised it was important, particularly during the split rounds, to give them some variety and some sort of release," explained Norths operations manager and conditioner Martin Hulme.

It was also Hulme's idea for

the Bears to spend an afternoon playing war games in the lead-up to last Friday's night clash against St George. Trading footballs for guns proved to be a big hit with the Bears.

"It was great fun and great for morale," said Peter Jackson, who led an army of players into battle against Mario "Gomer" Fenech's platoon.

Skirmish is simulated war where paint-balls replace bullets.

The pellets hurt but you always carry to fight another day.

The games revolve around defending and attacking flags and, according to Hulme, they are a good test of a group's ability to communicate and plan on the run.

"You certainly find out who your mates are," said five-eighth Greg "Red Dog" Florimo. Fenech and Hulme will readily concur.

There was no shortage of

firing-squad volunteers when Fenech transgressed skirmish convention by opening fire in a no-shooting zone, while Hulme was a target all afternoon.

"I worked the boys really hard at training two days before and they took great delight in getting me back on the battlefield," said Hulme.

Les Kiss was on the spot to shoot Hulme in the back just as the conditioner was poised to pounce on a flag.

*Rugby League Week*

# Kiunga laik bikhet na salim tim long Goroka

IAN KAKARERE i raitim

KIUNGA Ragbi Lig (KRL) i tingting long salim wanpela anda 17 tim i go long Goroka long stap insait long Nesenel Kosing Kem na inta son trails em bai kamap long Goroka long Julai 10.

Dispela em long soim kros bilong ol long tingting bilong Mosbi long holim anda 17 trails bilong ol yangpela mangi long Mosbi tasol. Na makim wanpela tim husat bai makim Sauten son long anda 17 kem.

Seketeri bilong KRL, Buni Mapo i tok Sauten son presiden Mans Kei long mun Epril i bin tok-save long Kiunga long holim Sauten Son trails long taim bilong Kwins Betde Wiken.

Tasol ol i bin holim dispela trail long Mosbi na Kiunga i no bin salim wanpela tim i go.

Ol opisal billong KRL i no bin amamas long Mosbi long holim trails. Ol i no amamas bikos dispela trails i mas kamap long Kiunga na i no Mosbi. Ol i tok Mosbi i no gat rait long wokim samting long laik bilong ol na makim wanpela

anda 17 tim bikos ol i no kisim tingting bilong ol arapela lig insait long rijon.

Mapo i tok Mosbi i bin lus tingting long ol kain senta olsem Kiunga, Tabubil, Balimo, Kerema na Alotau bikos ol i memba bilong Sauten son.

Em i tok, Kiunga i gat samting olsem 400 junia pilaia husat i save pilai long anda 13, 14, 15, 17 na 19. Na dispela namba winim ol manki i save pilai long Mosbi.

"Ol Kiunga junia pilaia i save baim wan kain pilaia registresen olsem Mosbi na ol i no ken stapim rait bilong ol dispela pilai long pilai," Mapo i tok.

Nau yet kodineta bilong Mosbi Skulbois Ragbi Lig, Sam Kaia i tok em i no bin save olsem Mosbi bai kisim wanpela tim i go long Kiunga. Bikos no gat man i bin tokim em long dispela ol samting.

Mosbi i makim pinis tupela tim, wanpela em Possibles na narapela em Probables. Ol i bin makim dispela tim bihain long trails bilong las wiken. Fainal skwat bilong Mosbi anda 17 skwat bai kamap long dispela wiken bihain long pilai bilong dispela wiken.

*I no meri nating...Bipo ol man i save tok ragbi lig em pilai bilong ol man tasol. Nau nogat, ol meri tu i wok long suvim nus long mekim wok bilong lig. Olsem long Buka, Josephine Kusi (long foto) i save wok olsem seketeri bilong Buka ragbi lig.*

## Open futbol helpim Tabubil long autim Morrie Stuart sil

TABUBIL i bin winim Morrie Stuart Sil pilai em ol i bin holim long Sande, planti ol ragbi lig sapota long Tabubil i bin amamas long pilai Kiunga i kamapim.

Ol lain long Tabubil i bin amamas taim Kiunga i putim kamapim stail pilai. Kiunga i bin pilaim open gem ol i bin tro-moi bal i go i kam na

paulim tru ol pilaia bilong Tabubil. Tasol ol boi long aspels Tabubil i winim pilai wantaim 36-14 skoa.

Long dispela taim ples i bin wet na graun i malmalo na i no gutpela long pilai. Tasol ol boi Tabubil i save long stail bilong ol long pilai long kain ples olsem. Na ol i abrusim tru ol pilaia bilong

Kiunga na skoa, ol fowat pilaia i bin wok hat tru long skoa.

Planti trai bilong Tabubil i bin kam long ol fowat. Wanpela trai tasol i bin kam long hap bek Jacob Kain.

Seken rowa bilong Tabubil, Jack Labulu yet i bin putim tripela trai. Taim Ronny Izol-zol, Aviro Gereke na

Damine Weo i putim wan wan trai. Weo i bin kamapim gutpela pilai tru taim em i kam senisim wanpela fowat na putim wanpela trai. Huka, Bulage Winol i bin kikim 4-pela gol long helpim tim bilong em long win.

Kiunga i bin kamapim gutpela pilai tru long namba wan hap bilong pilai. Ol i

bin gat 14 poin taim Tabubil i gat 10 poin. Ol boi Kiunga i pilai gut tru na winim tru lewa bilong ol sapota bilong Tabubil. Planti i bin amamas long gutpela pilai bilong Kiunga.

Namba wan trai bilong Kiunga i bin kam long faivet, Cecil Iaroe taim em i brukim

difens bilong Tabubil na slip antap long trai lain.

Pilai i kamap strong moa yet na winga Bowale Giniya na hap bek Charlie Nago i putim wan wan trai. Nago yet i bin kikim wanpela konesen kik i go insait.

Long taim bilong givim aut ol prais presiden bilong Tabubil lig,


Yapsie Tvengkofa i tokim ol sapota na pilaia olsem ragbi lig i stap laip yet long Westen provins.

Em i tok Papua Niugini Ragbi Futbol Lig na Sauten Son i mas luk-sav long ol pilai na opisal bilong ol.

Yapsie i tok long neks ya ol bai holim pilai bilong Morrie Stuart Sil long Kiunga.



*Klia long rot...I luk olsem dispela em hap toktok bilong dispela pilaia bilong DCA long baksait taim em i holim jesi bilong wanpela pilaia bilong Wests na laik rausim em klia long rot bilong poro bilong em. Tasol DCA i no strong na Wests i bagarapim stret sindaun bilong ol, 62-24. Foto: Ivan Bayagau.*



# CAMBRIDGE KING SIZE



*Wests vs DCA..Tupela poto long antap i soim sampela kain stall bilong pilal i bin kamap long las wiken taim DCA i pilal wantaim Wests. Tasol i luk olsem wara bilong Kerema i strong tumas na Wests i wilwilm ol bol Porebada. Wests i winim pilal, 62-24 long las wiken long Mosbi. Poto: Ivan Bayagau.*

# CAMBRIDGE



*I go yet...Sir Danny Leahy bilong Collins & Leahy kampani i karim bikpela SP Inta Siti Kap em Lahanis i winim long Mosbi Vipers. Poto: Sape Metta.*

GOVERNMENT WARNING - SMOKING IS DANGEROUS TO HEALTH

# SPOOKY MAIK

MI NOGUT OZ?



NAU SEKETERI BIKMAUS LONG MINISTA !!!

NEKS WIK BAI OL ODITAS I KAM NA SEKIM OL PEPA BILON HAMAS MONI YUMI SPENDIMPINS! I LUK OLSEM OLGETA FAND BILONG YUMI I PINIS LONG HOS RES, HOS RES, TASOL!! MI LES!



TRU, AH?!  
AEEE MI NO SAVE YAH!

MAIK I WARI TRU TAM EM I HARIM OLSEM OL ODITAS BAI KAM NIA SEKIM PEPA BILONG OPIS!!!

EH.. SEKETERI... INAP YU TROMOI OL RISIT BILONG HOS RES NA PUTIM OL GIAMAN...  
SORI, TRU! MI PUTIM OL LONG KOMPLITA PINS!



NAU MAIK I GO SEKIM KOMPLITA NA EM I KIRAP NOGUT TRU!!!

WEEYAAH! OLGETA MONI I GO LONG HOS RES NA BIA TASOL.. NOGAT WANPELA I GO LONG WOK BILONG GAVMAN!

K100,000 ALOKASEN I GO LONG YUT & REA DEPARTEMEN	
SPENDIM	WOK
K1,000	HOS RES BIA & WAN
K5,000	BIKPELA PINS
K7,000	HOS RES
K4,000	HOS RES
K9,000	HATILANDA HOTEL
K10,000	HOS RES
K7,000	HOS RES



WANI WIK I GO PINIS... MAIK I WOK I STAP NA DUA I PAIRAP!!!



EH.. SEKETERI! INAP YU ANSARIM DUA!?

NOK!  
NOK!  
NOK!

OK, NISTA.. ER MINISTA!

NAU SEKETERI OPIM DUA NA ODITA WOKABAITI I KAM INSAIT WANTAIM BIKPELA SMAIL TRU!!!



GUD MONING!... HONROBOL MINISTA I STAP?

OH YES! KAM INSAIT, EM I WET I STAP!

EM GO INSAIT NA LUKIM MINISTA..

HALOU, HONROBOL MINISTA MAIK... MAN! YU WANPELA BISI MAN TRU!

YE-YES, YESS! S-SINDAUN... ER.. YU LAIKIM KOPI O TIZ... BIA I STAP SAPOS YU "ER" LAIKIM!





# REBO kambek long SITI



## YESA OL PIPEL BILONG PAPUA NIUGINI!!

GAT HEVI WANTAIM DINAU?  
LAIK KIRAPIM BISNIS?

KISIM DINAU NAMEL LONG  
\$5,000 - 1,000,000 KWIKTAIM  
TRU!

Salim pas i kam long:

CASH FACTORY,  
Box 160023 - WA  
ATLANTA, GEORGIA  
30316 OR

Fax: (404) 413 9777 USA.

# Musik Televison na Komik

## Jack Boi: Hailans musik gat kik

GODFRIED NIAKA | raltim

"Ai yo Kenagi ambai Esther yo, wari kondo-o"

### PNG TOP 20

AS AT 5/06/93

NO.	SONG	ARTIST
1 (1)	Swit Finche	Reks Band
2 (3)	Riot squad	Riot Squad
3 (2)	Anita	J. Wong/G. Telek
4 (6)	Rosie	Komowagi Band
5 (8)	Kiaptern	Barike
6 (4)	Heal Our Nation	Higher Vision
7 (11)	Kas Out	Leonard Kania
8 (7)	If I ever Say Goodbye	Kales Gadagads
9 (5)	Talaigu	Painim Wok
10 (13)	Peles Sankamap	Willie Magata
11 (15)	Hai Sikul Meri	Rochus The Kid
12 (10)	Local Raggae	B. Greg/C. Kivovon
13 (12)	Kiri Nauku Vere	K. Kele Rangers
14 (16)	Mangi Wantok	City Hikers
15 (9)	Rock Pretty Island Girl	Shutdown
16 (18)	Abot	Barike
17 (20)	Stand By Me	Last Day Messengers
18 (0)	Dia Hegeregere	Porebada Gospel
19 (17)	Boram Sunset	G. Telek
20 (19)	Rowena	Barike

• Ratings based on requests on Radio Kalang and not cassette sales.

Singil gaul drua Dinga primola Ai yo Kenagi ambai Esther yo, wari kondo-o"

PLANTI pipel long ol Hailans provins i save laikim tru ol singsing bilong ol musikman long hap bilong ol yet.

Long wanem, ol Hailans musikman i save wokim ol singsing long tok ples. Na i no long tok inglis o Pisin.

Ol tripela hap toktok i stap antap ya i bilong wanpela singsing long tok ples Simbu. Nem bilong dispela singsing em *Esther Wari Kondo*.

Dispela singsing i stap insait long musik kaset bilong wanpela yangpela man bilong Goroka long Isten Hailans provins. Nem bilong Apo ya em Jack Boi. Jack i bilong ples Watabung long Daulo Pass. Dispela ples i stap long boda bilong Isten Hailans na Simbu provins. Jack i katim pinis ol singsing wantaim Redio Kalang, na wetim tasol kaset long kam aut.

Jack i no nupela long musik. Em i katim tupela kaset pinis. Long 1989, em i katim namba wan kaset wantaim Chin Hoi Meen studio long Mosbi. Na bihain liklik, em i katim gen namba tu kaset wantaim Pasifik Gol studio long Rabaul. Orait nau em i katim namba tri kaset wantaim Redio Kalang.

Taitel bilong namba tri kaset bilong Jack em: *Jack Boi of Eastern Highlands*. Dispela kaset i gat 10-pela singsing, 5-pela long sait wan na 5-pela long sait tu. Ol singsing i stap long tok ples Siane, Simbu, Lufa, Hagen na Tok Pisin.

Bipo long Jack i kamap olsem wanpela musikman, em i save stap long ples.


### EM TV

THURSDAY 17TH JUNE, 1993		SATURDAY 19TH JUNE, 1993	
1.27	STATION OPEN	1.27	STATION RE-OPEN
6.30	ITN NEWS (G)	1.27	EMTV TOK SAVE
7.00	TODAY SHOW (G)	1.30	RAY MARTIN AT (PGR)
9.00	STATION CLOSE (G)		MIDDAY
1.27	STATION RE-OPEN	3.00	KIDS KONA
1.30	RAY MARTIN (PGR)	4.00	SESAME STREET
	AT MIDDAY	4.00	FAT CAT (G)
3.00	KIDS KONA	4.30	SCOOBY DOO AND SCRAPY DOO
4.00	SESAME STREET (G)	5.00	BIRDMAN & THE GALAZY TRIO (G)
	FAT CAT (G)	5.27	EMTV TOK SAVE
4.30	SCOOBY DOO AND SCRAPY DOO (G)	5.29	EMTV NEWS BREAK
5.00	BIRDMAN & THE GALAZY TRIO	5.30	HOME AND AWAY (G)
	FAT CAT (G)	6.00	NATIONAL EMTV NEWS
5.27	EMTV TOK SAVE	6.30	A CURRENT AFFAIR (G)
5.29	EMTV NEWS BREAK	7.00	SALE OF THE CENTURY (G)
5.30	HOME AND AWAY (G)	7.30	NEIGHBOURS (G)
6.00	NATIONAL EMTV NEWS	8.00	RESCUE 911 (G)
6.30	A CURRENT AFFAIR (G)	8.27	PACIFIC GOLD STUDIO VIDEO CLIP
7.00	SALE OF THE CENTURY (G)	8.30	FRIDAY NIGHT FOOTBALL: EMTV TOK SAVE CRICKET: England vs Australia (G)
7.30	LOTTO DRAW (G)	10.30	EMTV TOK SAVE CRICKET: England vs Australia (G)
7.35	NEIGHBOURS (G)	10.35	EMTV TOK SAVE CRICKET: England vs Australia (G)
7.57	EMTV TOK SAVE	00.27	MEDITATION WITH PASTER WALO ARNI
8.00	FIZZ (G)	00.30	STATION CLOSE
9.00	WINFIELD LEAGUE (G)		
9.10	AUSTRALIA'S FUNNIEST HOME VIDEO SHOW MARRIED WITH CHILDREN (PGR)		
9.30	A COUNTRY PRACTICE (G)		
10.00	NATIONAL EMTV NEWS REPLAY		
11.00	MEDITATION WITH PASTER WALO ARNI		
11.27	STATION CLOSE		
	FRIDAY 18TH JUNE 1993		
5.57	STATION OPEN	1.00	WIDE WORLD OF SPORTS (G)
6.00	1993 US OPEN GOLF	5.00	BEYOND 2000 (G)
6.30	ITN NEWS (G)	5.55	SUPERSOUND
7.00	TODAY SHOW (G)		
9.00	STATION CLOSE		

NEW RELEASE	
6.00	NATIONAL EMTV NEWS
6.30	HEY HEY
8.30	IT'S SATURDAY NCDC NEWS (G)
8.50	TOK SAVE
9.00	BURKE'S BACKYARD CRICKET: "England vs Australia" MEDIATION WITH PASTER WALO ARNI
10.00	STATION CLOSE
	SUNDAY 20TH JUNE, 1993
5.57	STATION OPEN
6.00	US OPEN GOLF
8.00	BUSINESS SUNDAY (G)
9.00	SUNDAY
11.00	WIDE WORLD OF SPORTS
12.00	THE FOOTY SHOW (G)
1.00	RUGBYLEAGUE (G)
	TEST SERIES: Australia vs New Zealand
3.30	LUMEN 2000 - PNG EDITION
4.00	SPORTS SUNDAY (G)
6.00	NATIONAL EMTV NEWS
6.30	SUNDAY NIGHT FOOTBALL: EMTV TOK SAVE
7.25	60 MINUTES (G)
7.30	PACIFIC GOLD STUDIOS VIDEO CLIP
8.27	SUNDAY MOVIE: "Living Free"
8.30	CHIT CHAT WITH SIR PAULIAS MATANE CRICKET: "England vs Australia" NATIONAL EMTV NEWS REPLAY
9.57	MEDITATION WITH PASTER WALO ARNI
10.00	STATION CLOSE
11.00	
11.27	
11.30	



EMNAU STAIL BILONG CHIEF I WIN TRU!  
... I GO MOA NEKS WIK!



TOKTOK BILONG ROT SEIFTI IKAM LONG MOTOR VEHICLES INSURANCE [PNG] TRUST

# EM I GUTPELA LONG WOKABAUT LONG LEK

Long dispela mun ol lain Motor Vehicles Insurance(PNG) Trust i laikim tru long mekim sampela toktok wantaim ol man bilong wokabaut. Maski nogat foapela lek, ol man bilong tromoi tupela lek bai bungim wankain birua o bagarap olsem ol lain bilong ron long foapela lek o holim stia bilong kar. Igat sampela taim we olgeta man long dispela graun isave tromoi tupela lek bilong ol olsem na olgeta manmeri mas klia long ol lo bilong Rot Seifti we isave banisim ol long taim bilong wokabaut long ol rot bilong kar. Yu wanwan mas strong long lukautim yu yet-long wanem nogat narapela man bai tingting long yu.

Taim yu kamap long bikrot bilong ol draiva wantaim kar bilong ol, gutpela samting bilong mekim em olsem yu man blong wokabaut mas sanap na lukluk gut pastaim long tupela sait bilong rot. Planti taim birua isave kamap long yu taim yu no save fret long ol kar na mekim nating. Dispela pasin bilong fretim ol kar mas istap wantaim yu long olgeta taim bai lukautim yu long birua na tu bai banisim yu long ol narapela hevi bilong rot.

Ridim ol sampela liklik toktok istap aninit na luksave long campela pasin bilong lukautim yu yet.

**1. Krosim Rot**  
Long wanpela dei, hamas taim yu inap long krosim rot? Tripela ten, foapela ten o wanpela taim tasol. Olgeta taim yu krugutim sait rot bilong kar, yu putim laif bilong yu long trabel. Planti taim ol man i lusim tingting olsem ol rot ino seif tumas - wanpela giaman tok pilai na bang - yu go pinis. Ol pikinini bilong yu bai i nogat papa. Birua bilong rot isave kamap harip tru na wantu tasol man i dai pinis. Tasol birua i noken kamap sapos man i bihainim ol dispela liklik lobilong rot na lainim gut pasin bilong krosim ol rot.

- a. Olgeta taim sanap long arere
- b. Lukluk long han kais na lukim sapos kar ikam o nogat
- c. Lukluk long han sut na lukim sapos kar ikam long narapela sait
- d. Lukluk gen long han kais Sapos nogat kar long tupela sait wantaim, hariap na krosim rot.

Lainim ol pikinini tu long ol dispela samting taim ol liklik yet na taim ol bikpela bai ol isave long abrusim birua.

### Tingim

- Lukluk long han kais
- Lukluk long han sut
- Lukluk gen long han kais

**2. Ron nating namel long rot bilong kar**  
Planti manmeri save sikarap long painim trabel. Ol i ting olsem em

i gutpela long kalap nating igo kam long ol rot bilong kar. Oli les long bihainim ol liklik han rot bilong wokabaut o sanap na wetim kar igo pastaim. Ol laik ron nating namel long rot na go harip. Em olsem yu krosim rot long hap we i nogat krosing long en.

Taim ol kar ispid tumas na dispela kain man ilaik krosim rot long laik bilong em, turangu isave bungim hevi sapos em ino lukaut gut.

Olsem na tingim - Stap long arere bilong rot inap long taim rot i klia olgeta. Laif bilong yu i moa long ol narapela samting.

**3. Ol Crossing**  
Ol crossing na ol trafik kontrol baton stap bilong ol man isave wokabaut. Em rait bilong yu long rot. Kar mas stop taim man i wet istap long krosim rot na i tambu long kar long stat long ron taim man i wokabaut yet igo long narapela sait bilong rot. Sapos kar i bumpim yu long krosing, yu inap long kisim kompensasen long wanem em i asua bilong draiva na kar bilong em.

Planti taim kar ino save stop long larim yu go olsem na yu mas sanap na lukluk gut long kar long tupela sait wantaim. Taim ol kar i ron isi, yu traim long krosim rot. Sapos kar i ron yet, yu mas apim han bilong yu na stopim. Dispela bai helpim draiva long luksave olsem yu laik krosim rot. Tasol man

bilong wokabaut mas skelim gut taim bilong krosim rot, taim em i sanap yet long arere b'long rot.

Wankain pasin tu mas kamap long ol trafik lait. Taim ret lait i kamap, wetim draiva long slo daun, orait bihain yu krosim rot. Noken traim long ron igo nating - Lukluk gut pastaim.

### 4. Sanap long ples klia

Skin bilong yumi ol Papua Niugini ino gutpela tumas long ol draiva iken luksave long nait. Taim i tutak, mipela ol man tu isave wankain olsem tutak bilong nait na i hat long ol draiva bilong kar i lukim gut man i wokabaut long bik rot o haiwe.

Putim waitpela klos o samting bai sain long tutak taim yu wokabaut long nait bai ol man i ken lukim yu gut; na tu wokabaut long ples klia.


Na tingim - taim yu wokabaut - wokabaut long sait we yu inap long lukim ol kar ikam long yu. Draiva i nonap hat wok long painim yu long rot - yu mas lukautim yu yet.

**5. Kompensasen**  
Olgeta man long Papua Niugini save toktok tumas long kompensasen tasol igat planti kain kain lo isave tokaut tu long wanem taim yu ken kisim kompensasen na wanem taim yu nonap long kisim kompensasen. Wanpela taim we ol ino nap tru long baim kompensasen em long taim yu o pikinini bilong yu i ron igo nating long rot na kar i bumpim em. Em asua bilong yu yet long wanem, yu no lukluk gut long rot. Sapos yu no bin lukim kar, em i no asua bilong draiva tu. Kot bai sori long bagarap yu kisim tasol nogat marimari long kisim kompensasen. Em rong bilong yu yet.

Ol man bilong wokabaut mas tingim laif bilong ol long olgeta dei.

Bilong wanem bai yu bagarapim sindaun bilong yu?

- LUKLUK LONG HAN SUT
- LUKLUK LONG HAN KAIS
- LUKLUK LONG HAN SUT GEN



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.